

## ASO GAFUA, 29 IUNI 2020

*Na toe faaauau Galuega a le Fono Aoaofa Faitulafono i le itula e 3.00 i le afiafi.*

*Na toe faaauau Felafolafoaiga i luga o le faitauga o le Tulafono Tau Faaofi o le Faatatauina o Tupe Faaopoopo (Nu 3) 2019/2020 & Tulafono Tau Faaofi o le Faatatauina o Tupe 2020/2021.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Faitulafono. E faataatiaese galuega a le Fono Aoaofa, o saunoa le Minisita mo Tina ma Tamaitai. Ou te toe tapa lau Afioga i le Minisita e tulai mai e faaauau lau saunoaga.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ma le mamalu o lenei Maota. Faafetai ua maua se faasiligamalosia e ala i le malologa lea sa alo atu i ai le Palemene, e tova ai foi a tatou folasaga o lenei aso. Ia agalelei mai le Atua i toe itula o totoe o le tatou Fonotaga. O fea lava le itula o le a faaiu ai, ia auiliitia i le fesoasoani mai o le Silisili Ese.

Lau Afioga i le Fofoga Fetalai, e fai le tatou malologa, ua oo mai lau folasaga i le tulaga lea o sui tamaitai o tina. E pei ona laga e nisi o sui usufono mamalu o le Palemene. O lea o le a agai atu i ai se faamatalaga. Ua maea foi ona ou faamalamalamaina i nisi o sui usufono sa laga lea mataupu ae le i amatalia ia taulumaga o le tali atu a le Kapeneta. Ae lelei ona toe faamalamalama pea ina ia manino lelei ma atoatoa le silafia e lenei Maota faapea le faafogafoga mai a le atunuu, i le tulaga o lo o faafae ai lea matafaioi a lenei foi Matagaluega.

O le tofiaina o tamaitai o nuu, o lo o aiaia i lalo o le Tulafono autu, o le mataupu Tau Tina ma Tamaitai 1990 ma le Teuteuga o le Tulafono a le Matagaluega o mataupu tau Tina ma Tamaitai 2009. O le vaega la e 16a(1), o le Tulafono toe Teuteu o Mataupu tau Tina ma Tamaitai 2009, o lo o faapea mai. *“O le a tatau ona i ai se sui tamaitai o nuu, mo nuu mavae taitasi o Samoa. O le sui tamaitai, e ao ona filifili mai e le Komiti a Tina, ma o ia o se sui o le Komiti a Tina. O lea filifiliga o le a faamaonia e le fonofa a le nuu, i se faiga tusitusia e ala i le sui o le nuu”*. O lea la ua galulue le Matagaluega ma le Ofisa o le Loia Sili e toe silasila i vaega o le Tulafono e faamalalosia ai. Le i ai o Komiti a Tina i totonu o afioaga uma lava o le atunuu. Ina ia agavaa ai i le sui tamaitai o le nuu. Aua o lalo o le Tulafono o lo o manino, e filifili e Komiti a Tina ona tuu

atu lea mo le faamaonia i le Fono a alii ma faipule o le afioaga. A faapea la e leai se Komiti a Tina, e le tatau foi la ona agavaa e tusa ai ma le Tulafono lea afioaga i se sui tamaitai o le nuu. O lea la ua faagasolo le taumafaiga lea ma faamalasia, ua galulue faatasi foi ma sui o nuu, ina ia faamaopoopo ia tina o le afioaga ina ia i ai se Komiti. E le gata foi i lea, sa faatalatalanoa ma le Ofisa o le Loia Sili, se i silasila ane i se faiga ina ia aloaia tutusa ai ia Komiti a Tina ma sui o tina i nuu taitasi. Ona o le tulaga lea, pe fia, e le o aumaia i totonu o le Tulafono, pe toafia ni tina e agavaa ai se Komiti a Tina, e filifili se sui tamaitai o le nuu. O le faataitaiga, e i ai ia ni Komiti a Tina, o lea e fai mai, o lea e i ai le matou Komiti a Tina, o le a filifili le matou sui, ae saili atu, pe na o le toa 7 toa 8 sui o tina lea e i ai i totonu o le Komiti. Ae saili atu i isi Komiti, e maua le 40 tina o lo o i ai i totonu o Komiti ia. O lea la o lo o tilotilo le Matagaluega i se auala ina ia faa-laugatasia ai, a ia faaofi i totonu o le Tulafono ina ia aloaia ai lea tulaga. O lea la, ua galulue le Matagaluega ma le Ofisa o le Loia Sili, e toe silasilai i vaega o le Tulafono e faamalasia ai le i ai o Komiti a Tina, i totonu o afioaga uma o le atunuu. O le faamoemoe ina ia aofia so o se tina i totonu o nuu ma afioaga i le Komiti a Tina. Ina ia amanaia lo latou sao i atinae o lo o faatinoia i totonu o afioaga. E le gata i lea, ae ia mautinoa, o lo o aofia tina uma i atinae e manuia ma aofia ai tagata uma o le afioaga. O le faamoemoe lava, ina ia tasi lava le Komiti autu a le afioaga, o le a gafa ma atinae e aofia ai atinae tau le soifua maloloina ma le tumama lautele. Atinae o tamaoiga e aofia ai ia falelalaga ma le gaosiina o meataulima, o atinae mo taumafa e aofia ai asiasiga o faatoaga laau aina, galuega o le puipuia o tina ma tamaitai, fanau ma i latou e i ai aafiaga tumau o le soifua, mai so o se ituaiga o sauaga. E faapea foi ma isi atinae mo le soifua manuia o tina uma o le afioaga. O lo o matauina i le taimi nei, aua ua tele foi nai isi faalapopotoga a tina, o lo o ua totogo ae i totonu o afioaga ma alalafaga ona o la e i ai manaoga, there is a need. E pei foi ona tatou faalogologo i ai, o nai tina lea e faapea e le o amanaia i totonu o nisi o afioaga. Ua i ai foi le latou faatasiga lea ua fai, ua taua o nofotane. O le tali atu lea i manaoga o lea foi vasega o tina. O lo o taumafai le tatou Matagaluega ia tasi se tino e galulue faatasi uma ai afioaga, e i ai uma tina o le afioaga ma le tatou atunuu, i lea alalafaga ma lea alalafaga. O lea la ua amata le galuega o le resitalaina o sui auai o Komiti a Tina i nuu uma, ina ia mafai ai, ona iloiloina pe agavaa se afioaga e filifili mai se tofi o le sui tamaitai o le nuu. Sa faatino le asiasiga a le Matagaluega ma ua iloa ai i lea asiasiga na fai ma sailiiliga a le Matagaluega, o le aofaiga o Komiti a Tina i le motu i Salafai e 84. O le aofaiga o Komiti a Tina i Upolu nei, e 119. Ae silasila foi, o le aofaiga o nuu o Upolu e 114, o lea la e sili atu Komiti na i lo nuu. O lona uiga e i ai nuu e tai 2 Komiti a Tina, ma e le o se mea leaga lea mea. O se mea lelei ina ia faamaopoopo uma ai tina aua o isi e tai 4 pitonuu tai 5 pitonuu. A tofu lava le pitonuu ma le Komiti, a o Savaii e 85 ia nuu o lo o i Savaii, o le aofaiga la lea o nuu, ae o le tulaga le paleni lea e tilotilo i ai le tatou Matagaluega, o tulaga ia o falelalaga ia. Aua a faapea e tofu le Komiti a Tina ma le fale lalaga, se

meamanu o se atinae pitosili lea ona uunai e le tatou Malo, le lenei measina taua, ina ia faamalosia ma ia galulue tina. Silasila foi i le tele o manuia o lenei...ua tãua soo i totonu o lenei Maota le tele o le tamaoaiga o lo o tatou maua mai ai. E le gata i le tamaoaiga o le measina e faapelepele ma mimita ai le tatou atunuu, ae o le tamaoaiga tau seleni e tausi ai aiga, e matautia foi le tele o faamanuiaga o lo o maua mai ai ia tatou ie Samoa. Ma o lea lava sa taumafai ina ia uunaia ia tofu le Komiti a Tina ma le falelalaga. O le agaga la lea, o lea ua liliu atu i ai le tatou Matagaluega e taumafai ina ia tulei ai ma uunaia ai tina ina ia tofu ma le falelalaga. Ia i ai foi le latou galuega e fai mo le soifua maloloina ma le tumama, e nafa foi ma le vaiga o le environment po o le siosiomaga i le tulaga i le tumama, ma le matagofie o nuu ma afioaga. O galuega tau tina, e maopopo ma lelei, pe a maopopo foi le vasega o tina i totonu o se afioaga. O sui o le Malo mo nuu e le o ni nuu mavae, o lo o tele lava ina filifili mai i ekalesia eseese o lo o i totonu o nofoaga nei po o settlements, ona e le o i ai ni faiganuu e pei o nuu mavae. O lo o mafai lava ona filifili mai se sui alii po o se tamaitai foi, e fua lava i le ua tasi i ai ia le ekalesia, ona o lea e... talu ai o ekalesia o lo o maopopo i totonu o nofoaga nei i totonu o settlements, e le o ni nuu mavae. O lea la e tele ina ave i ai le faaaloalo latou te filifili mai ai sui, ua i ai foi la le faiga i totonu o ia foi nuu, e le o ni nuu mavae e faasolosolo ai i ekalesia. A uma ona tofi mai lea ekalesia, o le isi ekalesia lea o le a ave i ai le faaaloalo e tofi mai ai e latou se sui o le Malo. O sui la o le Malo i lea tofiga, e le tuliloa faapena na o tama, o le tama po o se tina. Ae o le tulaga lea e taumafai i ai le tatou Matagaluega ma le faamoemoe, ua lata mai se aso e mafai ai ona tagofia e le Matagaluega se auala e faatino ai. Ona e le faigofie pe a tilotilo i le anoanoai ma le faatupulaia o tina i totonu o nofoaga nei, e le o i ai ni Komiti a Tina, ma ua le agavaa ai foi i latou, i le tofia o ni sui tamaitai o tina, ua le agavaa ai foi i le lalagaina o le ie Samoa. Ua le agavaa ai foi i isi faamanuiaga nei, lea o lo o maua e tina o lo o mautu ma lelei a latou Komiti. Mo se faataitaiga, e 67 nuu e le o ni nuu mavae, lea e i totonu o le tatou atunuu. Ma o le aofaiga o le population, po o le aofaiga o i latou o lo o nofoia ia nofoaga, e 46,109. Vaai la i le anoano o tina ia e i totonu i i. A faapea o le afa o tina, o le afa o le population lea o tina, e ova ma le 20,000 tina lea e i totonu o afioaga ia e le o oo i ai le auaunaga lea tatou te mananao ina ia agavaa uma i ai tina uma o Samoa. O le taumafaiga la lea, atonu foi e le o le numera lea o falelalaga, aua e leai ni falelalaga i totonu o afioaga nei, e le o ni nuu mavae. Talu ai ona o le saisaitia ma le noanoatia i Tulafono o lo o faafae ai le galuega. Ae o lea ua amata ona galulue le Matagaluega, ia i ai uma tina i totonu o fuafuaga nei a le tatou Matagaluega ona taunuu lea o le faamoemoe, ma faaigoa ai le Matagaluega lenei o le Matagaluega o Tina ma Tamaitai.

**Afioga Faumuina Asi Pauli Wayne Fong:** Lau Afioga i le Fofoga Fetalai, pe maua lava si tamai avanoa lea.

**Afioga Hon TUITAMA TALALELEI TUITAMA:** Lau Afioga semanu e le i maumaua le taimi o le sui usufono. E le i lauga ai i le mea lea ou te talanoa ai. Ua uma na tali le lauga. O lea na lauga i taiala o lea ua uma ona tali lana fesili. O lea na lauga i le pese, ua uma ona tali le pese. Ua ou le iloa la po o le a le mea lea ua toe tulai mai ai.

**Afioga Faumuina Asi Pauli Wayne Fong:** O lea e talanoa mai le Afioga i le Minisita, i taiala, o taiala ia, o lea o lo o lavea uma ai le tulaga lea e saunoa ai. Ae na ona fia faaali atu le agaga lea i lau Afioga ile Minisita, faafetai lava mo taiala ia mo tina ma tamaitai aua sui o nuu ma tamaitai, faapea foi ma pulenuu. Ae se i tagai ifo lau Afioga, o le toatele o sui tamaitai i totonu o le nuu lenei, e le palota i totonu o itumalo nei. O le aafiaga lea e tau avatu i lau Afioga i le Minisita, pe mafai na i ai se aiaiga, a faapea ua aveia ia ma sui tamaitai pe ua aveia foi ia ma sui o le Malo i itumalo ia o lo o nonofo ma alala ai. E tatau ona palota i totonu o le itumalo lea, leaga e i ai isi, e sui tamaitai i i, e tofi e le nuu i i, ae ese le mea e palota ai. Ma le faaaloalo lava.

**FOFOGA FETALAI:** O lea ua maua atu.

**Afioga Hon TUITAMA TALALELEI TUITAMA:** O lea e pei ua confuse le sui usufono. E ese mamao lava taiala ese tina. E le polokiki tina, e le polokiki foi fuafuaga a le Malo lea e fai, o lea e fai mo tina uma. Pe e te palota pe e te le palota, e tutusa uma tina i le silasila ma le vaai a le tatou komiti. E pei ona ou taua foi i le isi aso i totonu iinei. When you want to make sure no woman or mother is left behind. O le agaga lena o lea e taumafai i ai, ae le faapea e tuli i e o lo o palota, ma e le o palota, e leai, taatia ese le faapolokiki lena. E le aafia i totonu i fuafuaga ia e fai.

**Afioga Faumuina Asi Pauli Wayne Fong:** Lau Afioga i le Fofoga Fetalai, faamolemole lau Afioga e leai ma se faapolokiki o alu atu i i lau Afioga. O le agaga lava lea e taumafai atu i ai, a faapea ua nofo i le itumalo sui o tamaitai o le itumalo, sui o nuu, e tatau lava ona palota i le nuu. Aua e le mafai ona avatu funds ia, po o tupe ia o lo o allocate mai e le Matagaluega e totogi ai sui nei, ae ese le mea o lo o agai i ai. O le maopoopoga lava lea lau Afioga, ae leai se polokiki o lo o i ai, ma le faaaloalo lava.

**FOFOGA FETALAI:** O lea ua silafia e le Minisita lau fautuaga, se i tulai mai le Minisita mo Tina ma Tamaitai.

**Afioga Hon TUITAMA TALALELEI TUITAMA:** Faafetai o lea ua manino le mataupu ma ua manino foi, e le o feagai Vini ma Tapaga i le mataupu a le sui usufono ma le vaega lea ua oo i ai lau faamalamalama. O lea la, o le a faaauau le lauga, i le tali atu. Lau Afioga i le Fofoga Fetalai, o lo o mafai lava ona filifili mai se sui po o se sui tina foi, e fua lava i le ua tasi i ai le ekalesia. Ua oo i ai le faasologa o le tofi. Ma o se

tasi foi ua mautinoa e mafai na ia tauaveina tiute faasui o le Malo, ma e avea foi lea ma fautuaga e molimoli atu i se auala maualalo. A o le faamoemoe o le tatou Matagaluega i sui o nuu ma sui tamaitai o nuu i afioaga ma alalafaga o lo o faafogafoga mai, faamolemole filifili mai ni sui e galulue, filifili mai ni sui e mafai ona asa le togavao ma faasoosoo ia aiga o lo o nonofo i faatoaga. Ma ia mataala i ona tiute tauave o lenei foi tofiga. O se tofiga taua tele, a o le matau, e i ai nai isi foi sui tina laiti foi sui o nuu, e le mafai ona savali i se 100 iata, ua matutua ua faaletonu aao. Ae o lea la, o le mataifaioi e fitoitonu i tatou afioaga ma alalafaga, ae na o se tuualalo ma se fautuaga e faataoto atu i ina, i ou tafatafa e silasila i ai mo le agai i le lumanai.

**FOFOGA FETALAI:** Malie le Minisita, faamolemole o lea e tulai mai Afioga i le Sui Palemia. Tulai mai lau Afioga.

**Afioga Hon Fiamē Naomi Mataafa (Sui Palemia, Minisita mo Punaoa Faalenatura ma le Siosiomaga):** Faafetai lava i lau Afioga i le Fofoga Fetalai mo le avanoa. E matau atu ua faaiuiu le folasaga a le Afioga i le Minisita i le mataupu taua lea i sui o le itupa po o le ituvai o tina ma tamaitai i le galuega o le suia lea o nuu ma afioaga. E taua tele le folasaga, i luga o faiga faavae ma le vaaiga a le Malo, ae ua ou tulai atu lau Afioga i le Fofoga Fetalai. E fia tuu atu i tafatafa o le Afioga i le Minisita ma le Matagaluega, ia le sapaapaia o le faamoemoe lea, ina ia faamaopopo mai le ituvai lea. Ae malie lava lau faalogologo i le saunoaga a le Afioga i le Minisita, o le upu lea Komiti. O le upu Komiti, e le o se upu Samoa, o le upu palagi. Ma na faaaogaina ua amata ona fai polokalame a le Malo, i mataupu tau le soifua maloloina. Faapena ona faasalafa atu i isi foi atinae taua, ae o le mea lea ou te fia tuu atu i tafatafa o le Afioga i le Minisita. O le nonofo ai o nuu ma afioaga, e faavae lava i luga o le saofaiga a matai, i le ituvai o tina ma tamaitai o faletua, tausi ma saoa, faapea foi le aumaga ma le malosia o le nuu. O le faavae na o tatou nuu. E i ai lava le popolega o lou taofi i se vaaiga faatamaitai, e pei a tatou talanoa i le itupa po o le ituvai o tamaitai, ona pei lea tatou te le o faatauaina le faavae o nuu ma le i ai o le itupa lea o faletua, o tausi, ma tamaitai. E pei o le a foliga mai, e ala ona fai mea ia, ona o se polokalame o lo o faasolo atu po o le Malo po o nisi Faalapotopotoga. Ae pei o le a sola le faavae, e i ai le saofaiga a le ituvai lea i totonu o tatou nuu. Ma o le mea moni lava lau Afioga i le Minisita, faafetai lava ua e faaalua mai, e fia komiti i Upolu ma Savaii. E le taumate foi i totonu o le lipoti lena, e tau mai ai, o ai nuu e tetele a latou komiti o ai nuu e laiti. A o le fesili lava lena e tulai mai, po o le a le mea lea e tupu i le saofaiga o le ituvai lea i totonu o le tatou atunuu? E leai lava se tatou faafesili i le saofaiga a alii ma faipule. O le mea lava lena o le faavae o le malosia, tatou te le faapea atu, a mea la o le komiti lea a tamaloloa e faia ia maumaga, po o faigafaiva, po o a foi isi mataifaioi a tamatane. E faafesili lava i lou mafaufau ma o lea e taua ia te au le folasaga a lau Afioga, ma e sea sea foi tatou talanoa i ituaiga mataupu ia. Ae ou te tatalo

atu i lau Afioga i le Minisita ma le Matagaluega, se i outou tilotilo lava i le faavae lea. Le faavae aa lea, e i ai le saofaiga o outou faletua, o tausi o le saofaiga ia ma outou alo tamaitai. Ona e pei e i ai lava le itu lea, a tatou vaai i nuu, tatou te iloa le pulega a alii ma faipule. Ae a tatou tilotilo i le ituvai o tina, e pei e ese le faata lea e i ai le tatou vaaiga. O isi vaega po o totino faavae nei o nuu Samoa, o le saofaiga a faletua ma tausi ma saao. Na o le pau lena o se fautuaga e tuu atu i tafatafa o lau Afioga.

**FOFOGA FETALAI:** Mo le faasaoina o le taimi o le Minisita, se i tulai mai lava le sui usufono mo Faleata i sisifo.

**Tofa Lealailepule Rimoni Aiafi:** Ona o lea na saunoa le Afioga i le sui Palemia i nuu mavae, patino lava. O si au mataupu sa ou laugaina le mataupu lea o sui tamaitai o nuu ia tu taulaga, ona o le mea ua tataua ona faatino. O le mea taua lea na saunoa le Minisita ma aumai pea le upu lea. No one is left behind ia inclusive. Ae ona o lea e saunoa le Afioga i le Minisita, ua lata mai se taimi. Ou te le o malamalama la pe o le a le ituaiga latalata lea e oo mai ai le taimi. Manatua foi lau Afioga o le paketi lea e miliona lea e aumai mo Komiti Tumama. O lona uiga ua misi ai i ina nai tina ia. O lea foi na ou vaai i le pepa o ananafi, pe \$2+ miliona lea e aumai i nisi foi komiti. Aua o le isi mea lea lau Afioga i le Minisita, se i tagai i ai, o lea e tele ina o mai fesoasoani mai fafo o sao i Komiti nei ma NGOs ia e faavae. Aemaise lava i le mea lea o le nofotane ea, sa tataua ona aafia uma i lalo o le faamalu o le Malo, ma i foi i le Malo ua tataua ona faasoa atu ai tupe i mea nei. E tetele fesoasoani nei mai fafo, ae o lea e alu solo i mea nei, o lea e tataua ona tasi le tino e aumai ai, ma ia tasi lava le Komiti a Tina. O maua foi ma le Minisita na ma ola mai i nuu tu taulaga lata mai i, e moni lava e le i i ai Komiti a Tina i aso ia, ae sa fai lava komiti a nai loomatutua ia e faasolo ai le faiga o tui o tamaiti, ma tulaga faapena. Ae tautuana, e faamanatu atu i lau Afioga, po o le a se taimi lata mai, faafetai o lea ua e saunoa i ai. O le a se taimi lata mai e faatino, aua o la e faigofie, o la ua i ai foi sui o nuu, tuu loa i ai ma nai tina.

**FOFOGA FETALAI:** Malie lau Afioga i le Minisita, tulai mai le sui o Aiga i le tai.

**Susuga Mulipola Leiataua Laki:** Faafetai, o lea sa taua i le lauga a lenei itumalo, tulaga lava ia i tatou Komiti. O le agaga maua lava, ia mafai ona oooo le faasoa a le tatou Malo i lea foi ituvai. O le nuu nei, e moni lava e tu i tua, a o Upolu atoa lava lea e nonofo ai Manono, e oo mai i le taimi lenei e tau lava e le o se nuu mavae. O le ala foi lea o le taua i le talosaga. O le isi vaega, talosia o lea ua talitali le finagalo o le Minisita. Ae o le isi vaega e fia faafesili ai, ona o lea taua i le lipoti, e pei e faafuafua foi lea i le tele o taimi pe a sau lava le tele o lipoti ia, e pei na o Upolu lava ma Savaii. E pei e tele lava ina bypass Apolima-tai ma

Manono-tai. Ae i ai foi nai komiti la e resitala mai i tai i le motu pe o aafia i a tatou lipoti ia faamolemole.

**FOFOGA FETALAI:** Malo faafetai. Se i silasila i ai, e le tatau ona tupu lea mea. Se i tulai mai le sui usufono mo Faasaleleaga Nu.2.

**Tofa Namulauulu Sami Leota:** Faafetai i lau Afioga i le Fofoga Fetalai. E faatopetope atu foi se manatu ona o le mataupu lea sa ou laga muamua foi i tulaga ia o sui o nuu. O si ou itumalo, e lua lava nuu tetele, o Sapapalii ma Fusi. O Sapapalii e 3 faiganuu eseese o lo o i ai, e 2 pulenuu ae tasi le sui tamaitai. O si ou nuu lea o Fusi, e i ai le falefa, e lua foi pulenuu o lo o i ai ae tasi foi le sui tamaitai. O lea ua manaia le taiala lea ua tuuina mai aemaise le tulaga lea ua i ai i le galulue o sui usufono ma sui o nuu, o le talosaga lena ua tuuina mai. E tatalo atu i lau Afioga i le Minisita, se i vaavaai lava i le tulaga lea, ia faapaleni lava pulenuu ona e galulue faatasi nuu ma komiti a tamaitai. Ma lou faaaloalo faafetai.

**FOFOGA FETALAI:** Malo faafetai. Se i tulai mai lau Afioga, se i manatua ifo foi le tulaga o le... O Fasitoo e 4 pitonuu, 2 pulenuu ae 1 le Sui Tamaitai, ioe, a o nuu tetele na uma loa ona fai Atamu ma Eva fau loa Fasitoo. Se i silasila ifo pea i ai le saunoaga vae atu le finagalo o le Sui Palemia. Tulai mai le Minisita e faaauau le saunoaga.

**Afioga Hon TUITAMA TALAILELEI TUITAMA:** Faamalo faafetai i lau Afioga. Ia, o lea lava ou te faamaumauina i latou na saunoa, ma o lea foi ou te tali atu i ai ia i latou na saunoa i le mataupu lenei. O nisi la mataupu e ese mai, o le a tapena mai mo le isi a tatou Fono, e faapea foi le mataupu a lau Afioga i le Fofoga Fetalai.

Ae na ona ou tali faapuupuu atu faapea, e tusa ai ma le saunoaga a le Afioga i le Sui Palemia, e taua ia te au lana tuualalo, a o le vaega lea e faatauaina e le tatou Matagaluega, o le upu faa-Peretania lea, o le inclusivity ia i ai uma tina i totonu o le pulega a tina ma tamaitai, otherwise e le tatau la ona faaigoa o se Matagaluega o Tina ma Tamaitai, pe a na o se vaega o tina e i ai i totonu, ae le i ai le isi vaega. O le mea foi lea i lou taofi i le faatauaina o le saunoaga a le Afioga i le Sui Palemia, ua tupu ae ai se lagona i le Matagaluega o lo o tauaveina le tatou Culture, ana faapea la e i ai i totonu o le culture ma i, ae ua taumafai le Matagaluega e faafealofani ma reconcile the culture with the need ma le inclusivity ona atoa lea o tino o Vaatausili. Ae peitai, o lea e tulituliloa lava le mandate a le Matagaluega, ia i ai uma tina i totonu o fuafuaga ia o lo o mafai ona ofoina atu e le tatou Malo ina ia manuia o tatou tina uma. A o le a taoto, atonu e i ai se isi taimi ona agai ifo lea i ai o se finagalo o le Maota lenei, pe toe sui le igoa o le Matagaluega pe toe faaopopo nisi Tulafono e tauave e le Matagaluega, ona faapena foi lea ona usitaia ma mulimulitai le tatou Matagaluega e tusa ma Tulafono o lo o taialaina ai lana auaunaga.

Lau Afioga i le Fofoga Fetalai, e i ai le mataupu lea na laga, e le o se mataupu a le matou Matagaluega, ae leaga o lea ua faaui mai i le matou Matagaluega, lea foi la o le a ou fesoasoani atu i ai e faasino tonu i ai le Matagaluega e agai i ai le mataupu lea.

O le mataupu lea o le pa aute lea e tu i tafatafa o le auala. O le auala puupuu lava la ou te tali atu ai, e le o se matafaioi lena a matou, o lea e i ai e pulea eleele o lo o ui atu ai tatou alatetele, o lo o i ai foi Matagaluega e vaايا fanua o le Malo o lo o tatau ona i le auala, ae sao ai, e ese le faatigamata o mea ia. O la e vaai atu lava ua toeitiiti papai i le auala, ae toto atu ai lava laau i tafatafa o le auala. O nisi foi e agai atu i le itu lea i Sasae, o totonu o autu ua uma ona teu faalelei ae ua o toto ai tiapula, ua toto ai laau, o aute ma isi laau. Ou te le iloa po o le a le mafuaaga o ia mea. E tiga lava ona vaai atu o mea o lea ua tapena mo le saogalemu o feoaiga i luga o alatetele, ae faapea lava uiga, o vaivaiga a ia o le tatou atunuu e tatau foi ona tatou tilotilo i ai ma fesoasoani i ai. O le fautuaga la, o lea foi e faafofoga atu le Afioga i le Minisita o Galuega Tetele a le Malo ma tatou feoaiga o latou lea o lo o silasila i itu ia e saogalemu ai, ma ia aua ne i afaina eleele o le Malo ua uma ona faasino ma fuafuaina mo a tatou alatetele.

Lau Afioga i le Fofoga Fetalai, ia o sina upu lava i le si o ta itumalo. E ui lava o lea ua vaelua, ae o le itumalo lava e tasi, o Aana Alofi Nu.1 i Sasae ma Sisifo. Lau Afioga i le Fofoga Fetalai, avea ia lenei avanoa ou te faapai atu ai ma le agaga faaaloalo i le tapuaiga a si ou itumalo i le paia i Aiga Satuala, Aiga o Mavaega ia faapea foi le Aiga Taulagi, alo o Tuiaana Tamaalelagi ae faapea foi le Tamaitu ma le Maugafa, ae tainane le alaatai o le Faletolu ma Fuaifale. O paia lava e tumau, e le mafai ona toe faaitiitia, a o le agaga faafetai ona o la outou tapuaiga, o lenei o le Tala mulimuli lenei o le Tupe mo lenei Paeaiga, ma ua amata foi ona faaiuiu galuega o lenei 5 tausaga. O le a se taumafaiga a lo outou sui usufono e tusa ai ma le tauaveina o le nofoa o le tatou itumalo, sa fai lava i le mafai e gata ai, ae galulue faatasi foi ma le Malo, e seu foi le manu ae tagai i le galu aua fuafuaga fai ma le maua o seleni e faatinoina ai o tatou manaoga. Ia o le faasoa lea a lo tatou Malo, e faapea foi e o lo o ua tofofi aua le faasoasoina o le seleni i lea vaitaimi i lea vaitaimi. A o le agaga faafetai i lenei tausaga ma lenei foi Paeaiga, o lea ua tele lava le sao o lo o faasafua atu e le tatou Malo mo le tatou itumalo. Silasila foi, masalo po o le faaiuga o le vaiaso nei po o le amataga o le vaiaso fou lea e tatala aloaia ai le tatou vai lea i Sapulu. A ua 2 nei Paeaiga o tatou galulue i lenei vai, e le faigofie foi le amatalia mai, na alu alu i le Paeaiga talu ai le viliga o le vai lea, na gau le ofe, toe saili mai le ofe aua e maualalo tele, sa taumafai e tuutuu i uta, maouta ia magalo lelei le vai. Ma o lea e feoloolo lava le loloto o le mea na vili i ai le vai lea ma na iu ina faaletonu ai le masini, ma o lea sa talia foi. O le ala tuai lea ona faagasolo le galuega lenei. Maea le viliina o le tatou vai ua maua, ae paga lea ua manuia na o aiga e pito i tai ae le oo le suavai i uta, lea foi la na toe fai ai le isi galuega a le tatou Malo e fau le tane i uta, pamu i ai le vai mai le tatou vaieli lea ona toe tufa mai lea i aiga o lo o pito i uta o le tatou



vai. E le taugofie nei mea, tusa a tuufaatasi, e tusa lava o le poloketi o le eliga o le vai, o le poloketi o le fauina o le tane, o le poloketi o le faataoto mai o paipa e toe faasoa mai ai le vai, e le faigofie. E tusa o le tauaofai o lenei poloketi atoa o le vai, e \$3.6 miliona. O se tupe tele lea pe a fuafua i le anoanoai o itumalo o lo o talosaga foi mo nei lava faamanuiaga, a o lea lava e tau faasoa le seleni a le tatou Malo.

E le gata i lea, a o le tatou auala lea i Sapulu e tau i uta i Aleisa, o lea ua i ai le fuafuaga ma faataoto, i le tausaga nei a o le i faamutaina pe faaiuina le tatou Paeaiga lenei, e galue atu le tatou auala lea i Sapulu mai tai i le aai e tau i uta i Aleisa.

Lau Afioga i le Fofoga Fetalai, ia o lo o taoto foi i futia ua sola le tele foi o le feseseaiga o le tatou itumalo ona o tatou faleaoga, lea la ua molimauina nei le maualuga ma le taua o lea fuafuaga. Silasila foi, o le lauga lava na tatala ai le faleaoga i Moamoa, sa saunoa le Palemia, na o le tatou nuu lava lea ua lua aoga tulaga lua, ioe. Ua tatou talepeina le Tulafono sa ave mai ai i futia ua sola fuafuaga fai a le Malo aua le faasoaga o le seleni. O a nei la? Ua tutumu uma aoga, tumu le aoga i Sapulu, tumu le aoga i Moamoa, ua oo i le tai 400 tamaiti i le faleaoga e tasi. A na le seanoa la lea fuafuaga i le fausiaina o le faleaoga lea, e faapenei ua sue solo ni aoga e o i ai a tatou fanau ua le ofi le tatou faleaoga. Ae ui i lea, e leai se isi na te iloa le lumanai o mea, ua na o le Atua na te silafia le mea o le a oo mai, ae tatou te galulue lava ma le faamoemoe ia i ai faapea. O le tatou nuu foi ua tofu lava ma le auala galue, auala Tauoo, auala Moamoa, aua Lealalii, O le auala o Sapulu ona e fesootai ma Aleisa, o lea lava e tausii atu lava e lo tatou Malo. Ia, o faamanuiaga na ma nisi o faamanuiaga e le mafai ona tolaulauina, ae leai se mea e natia i le silafaga a le tatou Silisili Ese, aua e le mafai ona nana le tamaimoa, e ioio ane lava.

Ia tau ia ina ia manuia lau tapuaiga Samoa, faafetai tatalo mai, faafetai tapuai mai, ia manuia tele le tatou agai atu mo le faaiuga o lenei tausaga.

**Susuga Hon Papaliitele Niko Lee Hang:** Lau Afioga i le Fofoga Fetalai, na o si mea lava lea laitiiti e fia malamalama i le saunoaga a le Afioga i le Minisita. Sa taua e se sui usufono mamalu le maumaga ma mea o pa aute ia e fai i talaane o le auala, ou te fia malamalama po o fea, ae tataua ona faasao mai, e tataua ona tatalo mai i le Minisita o Galuega, leaga e sao ai le saunoaga a le Minisita, e le faia ni tulaga ia o ni pa aute ma ni maumaga. Ae sao foi le Matagaluega, fafai loa le maumaga ma aumai e faaoga. Ma lou faaaloalo lava.

**Afioga Hon TUITAMA TALALELEI TUITAMA:** Ia, faafetai. Lau Afioga i le Fofoga Fetalai, na o si faasaoga lava lea e le mafai ona tuuaunoaina leaga o la e faafofoga mai le itumalo, o le misprint lea ua feaveai ai itumalo ua maea ona tapena a latou taiala ma ua faalauiloa foi, lea la e i ai le itumalo o Vaisigano Nu.1, ua maea ona tapena ma faalauiloa le latou taiala lea sa misii i lau faasalalauaga muamua, e faapena foi le itumalo o Falealili Nu.2, ua maea foi ona tapena le latou taiala ae

le i faalauiloaina. E faapena ma Palauli Nu.3, e leai o Palauli Nu.2 lea e le i maea ona faamautu le latou taiala, a o Palauli Nu.3 ua maea le latou taiala ae le i faalauiloaina.

Ia o le faaaliga lea lau Afioga e toe faasao atu ai nai vaega ia sa paia. Ma le faaaloalo lava.

**Tofa Aumua Isaia Lameko:** Lau Afioga i le Fofoga Fetalai, na o si mea lava e fia faasao, o Falealili Nu.2 ua maea, a o Falealili Nu.1 ua maea ona tapena ae le i faalauiloaina. A o lea ua fai mai le Minisita...

**FOFOGA FETALAI:** Malo. Ia se i silasila ifo i ai le Matagaluega, ae pei o le mataupu lena, ae faafetai tele o lea ua maea le saunoaga a le Minisita.

Ia se i tulai mai le Minisita.

**Afioga Hon TUITAMA TALALELEI TUITAMA:** Ia ua ou toe tu atu lava leaga o le itumalo e faigata, o lea tatou te pepese ai, ua ta fia Falealili fua. Ae afai ua i ai se vala i i le vaega lea, e le o se mea e toilalo ai se itumalo, o lo o i ai lava le faasoaga ma le faasaoga, auliuli sau se taimi ona faasao lea i totonu o tatou pepa ma faamaumauga, ae faafetai i le sui usufono le fesoasoani mai. Ma le agaga faaaloalo.

**FOFOGA FETALAI:** Ia, pei o le mea lea sa tulai mai ai le Minisita mo Galuega, pei o le alu atu lea i le Vaimauga i le faasolo atu lea i Fagalii e i ai pa aute na toeitiiti lava tutu... E pei o le tulaga lena.

**Afioga Hon TUITAMA TALALELEI TUITAMA:** E lelei ona tulai mai pea o le sui usufono mo Safata, o ia lea sa na taua le pa aute lea. Se i faamalamalama lau pa aute faamolemole.

**Afioga Leaana Ronnie Posini (Safata):** Lau Afioga i le Fofoga Fetalai ona o au lea sa ou laga le mataupu lea. E leai o le vaaiga lautele lea i le feoi mai ai i le taulaga iinei aemaise le itumalo lea o Vaimauga lea e te taua lau Afioga i le Fofoga Fetalai. Sa faalauaitete leaga o auala e feafioai ai le tatou atunuu. Ma le agaga faaaloalo.

**FOFOGA FETALAI:** Faafetai. E taua le soifua maloloina, ae le taua le pa aute e tataua ona fuafua le mea e toto ai. Ia o le tulaga lena e tau ai Vaimauga...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, leaga o lea ua taua lenei itumalo.

**FOFOGA FETALAI:** Ia o le tagatanuu lea o Fagalii lena e faapena.

**Afioga Sulamanaia Fetaiai Tauiliili Tuivasa:** Masalo o lea ua faalogologo atu lenei itumalo, masalo o le a fai le tulaga lea. E manaomia

foi i le Afioga i le Minisita mo Felauaiga ina ia aumai ai se tupe e ave i aiga ia e totogi ai foi le tulaga lea, ae ua lelei o lea o le a fai le tulaga lea i pa aute mo le saogalemu foi o le atunuu femalagaai.

**FOFOGA FETALAI:** Faafetai. Ia, avea ia le leo o le... Ia se i tulai mai lava le Minisita le Afioga ia Papalii.

**Susuga Hon Papaliitele Niko Lee Hang:** Lau Afioga, o lea e manaia le saunoaga a lou uso a Minisita i le taeao analeila, o lea ua toe saunoa mai la le sui usufono mamalu i se fesoasoani a le Malo. Manaia le tala lea na fai atu, fai sau mea mo lou atunuu ae aua e te faamoemoe mai i le Malo e fai lena mea. A faamama lava le pa aute e leai se tupe e alu ai. Ma lou faaaloalo lava lau Afioga.

**FOFOGA FETALAI:** Malo faafetai. Ia avea ia le leo o Apulu Toleafoa e momoli atu ai le faafetai e fai ma sui o le itumalo o Aana e momoli atu ai le faafetai ma le faamalo i lau Afioga i le Minisita mo Tina ma Tamaitai i lau saunoaga matagofie ma lou faapai foi i le itumalo, e faapena. O le upu lava a le itumalo, ua malie mata e vaai, ua malie taliga e faalogo. O le upu foi e fai i Atua, ua se togi le seuga lagatila ua faapulou le tualima, ua faamalo le fai o le faiva. Ia tatalo le itumalo i le Atua, afai o le a e malolo mo le taufetuliga, ia alofagia e le Atua ia foai mai se isi toa pei o oe, ioe, e tauaveina le nofoa o le itumalo, ae afai o e malosi lava, e le mafai ona aveesea lou nofoa leaga o oe o le isi toa o le itumalo. Faafetai. A o faafofoga mai le itumalo, ia o Apulu lea ua faia le faafetai e fai ma sui o le tatou itumalo. Ia toe tulai mai se isi sui usufono.

Ia, o lea ua oo mai le faasologa i le Afioga i le Minisita mo Pisinisi, Alamanuia ma Leipa. Ia, tulai maia oe e falefa i ai Tumua.

**Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa):** Faafetai i lau Afioga i le Fofoga Fetalai. Sa ou faapea ai o le a toe amata le tatou toe faatalanoaga o le tatou mataupu faalauaitete, faafetai tele mo le avanoa.

A o le i faia se tala lau Afioga a le sui usufono mo Satupaitea, e muamua pea ona ou faatulou i le malae o Tiafau nei, o le malae o Malo, o le malae o le faalelegafulu a Samoa, o le malae foi o le faautugatagi a le atunuu.

Ou te faatulou foi i le Maota lenei, le afio i lau Afioga i le Fofoga Fetalai, afio lau Afioga i le Palemia, Sui Palemia faapea le mamalu o le vasega o le Kapeneta. E faatulou atu i le afifio o Minisita Lagolago. E faatulou atu foi i lena Itu i le afifio o Taitaifono o Komiti faa-Palemene ma outou sui a Komiti, tainane foi le mamalu o sui usufono uma o le Maota lenei.

E faatulou atu foi i le tafatolu o faigamalo, i le afio o lau Afioga i le Faamasino Sili, tainane alii ma tamaitai o le Faamasinoga. E faatulou atu i le paia i tupu ma ee, o tupu ma tamalii o le tatou atunuu o lo o taitaia Matagaluega a lo tatou Malo, Sui Taitai, o i latou o lo o taulamua i le faatinoina o atinae mo lo tatou manuia.

E faatulou atu foi i le tapuaiga a Samoa, i le afio o lau Afioga i Le Ao o le Malo ma lau Masiofo, lau Afioga i le Sui o le Fono a Sui Tofia ma lou faletua, a o lo o po fala foi le tapuaiga a le Talalelei i fatafaitaulaga e fia i totonu o Samoa o lo o outou faanonomanu ma faafalelemalu aua se manuia o Samoa ma ona tagata.

E le faagaloina foi le tapuaiga mai fale ma maota i Aiga o Tupu, Aiga o Nofo, aiga sa tufalaia ma tufalatoa, a o lo o silataufao mai foi le mamalu i le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatulou atu foi i le tapuaiga a o tatou uso mai sasae, i le afio o lau Afioga i le Kovana Sili ma lau Masiofo, afio le afioga i le Fofoga Fetalai ma Maota e Lua, o paia lava ia aua Sua ma le Vaifanua, Fofu ma Aitulagi, Saole ma le mamalu i le Launiu na Saelua. Afio o lau Afioga i le Laau na Amotasi, Faatui o le Motu, faapea Tootoo o le Faleula, ma upu ia te oe le Manuatele. O paia na o Samoa i Sisifo ma Samoa i Sasae.

A tafa ai le malama i Saua ona malamagia lea o le maota o le tamaitai o le Alataua i Agalega, tulou, tulou, tulouna lava. Lau Afioga i le Fofoga Fetalai, o le a se i ou oo i lou itumalo pe a uma ona fai lau lauga.

Ae ua ou tulai atu i lenei itula e fai atu se tala e uiga i le faagasologa o mataupu sa laga e sui usufono mamalu o le Maota i nisi o Matagaluega o lo o ou tauaveina, ma o le a ou taumafai ou te tali atu i ai i lona tulaga aoatetele, se i vagana mataupu faapitoa sa laga mai e sui usufono mamalu ona ou alu lea i ai e auiliili.

Mo le silafia e le Maota lenei, e toa 9 Matagaluega o lo o i lalo o lau vaaiga tumaoti po o le direct responsibility. Ma o Matagaluega uma nei, o le Matagaluega o Pisinisi, Alamanuia ma Leipa, o le Matagaluega o Faalapotopotoga o le Malo, Faalapotopotoga o Fale o le Malo, Faalapotopotoga o Fanua o le Malo, o le tatou Ofisa o Taaloga ma Petipetiga, Ofisa o Atinae o tatou pisinisi laiti po o le Samoa Business Hub, Faalapotopotoga o Tauai mo Faalavelave Faafuasei le ACC, o le tatou Faalapotopotoga o Fale ma Malae Taalo faapea le tatou Kamupani Vaalele. E i ai la nisi o Matagaluega nei sa afea i saunoaga ae o le a ou taumafai e faamalaulauina atu nisi o mataupu.

O le Matagaluega lea o Pisinisi, Alamanuia ma Leipa, o le anavatau lava a le Matagaluega lenei, ina ia fausia se siosiomaga lelei ma faigofie mo le atinae o pisinisi ma faatupulaia avanoa faigaluega. O le anavatau lena. E faapefea la ona faataunuu galuega ia taunuu le anavatau lea? E matua lautele ma gaogaosa mea uma o lo o i totonu o le Matagaluega lenei, a o le auga lava lea e tulai mai i i. Lelei pisinisi, maua galuega a tagata.

E 3 la vaega taua i totonu o le Matagaluega, lea e galulue ina ia ausia le anavatau lea. Vaega 1: Atinae le vaega o pisinisi tumaoti ma le faafaigaluegaina o tupe, develop private sector and develop encourage investment, foreign investment.

2. Uunaia le siitia o punaoa ma fefaatauaiga talafeagai, ia fausia faiga faatauvaga amiotonu, encourage industry productivity and fair trade to ensure healthy and a competitive market.

Ma lona 3, faatupulaia avanoa o galuega mo tagata Samoa i se siosiomaga saogalemu, faa-soifua maloloina, mo e ana galuega ma latou e faigaluega. O vaega la ia e 3 o lo o galulue ina ia maua le anavatau lea sa ou fai atu ai muamua. O a la gaoioiga o lo o fai e le Matagaluega, faia e le Malo ae faauai atu i le Matagaluega lea e uunaia ai tatou pisinisi tumaoti ma ia lelei le faafaigaluegaina o tupe?. E tele vaega o le tatou Matagaluega o lo o galulue faatasi ma le tatou private sector ina ia maua uma lava e le tatou Pisinisi Tumaoti le avanoa ina ia atinae ai a latou pisinisi, ma le fesoasoani a le Malo, ina ia taunuu i se taunuuga o la e mananao i ai. Le latou taunuuga lea i le oo i ai le latou pisinisi ma le fesoasoani atu a le Malo. E i ai auala e galulue faatasi ai i le faiga o Faiga Faavae ma tulaga uma faapena, ae i ai foi fesoasoani tuusao a le Malo i le vaega tumaoti. O le faataitaiga, e i ai le tatou fesoasoani foi lea, i tausaga uma e \$200,000, e tuuina atu i Faalapotopotoga, Asosi a i latou o faipisinisi, e fesoasoani ai ia lelei le faagaoioiga o galuega fai, administration, a le latou Matagaluega. E amata mai lava i tupe tai \$50,000, i Matagaluega uma ia e ausia uma lava ia matatia, o lo o gapatia a outou Matagaluega, e taua asosi laiti, e maua a latou tai \$4,000 tai \$5,000 i tausaga uma lava, e tuusao atu lava le tupe i le lima. Ona toe mulimuli atu foi lea o le Matagaluega e sailiili po o faatino lelei le faaogaina o tupe nei i mea lea na talosaga mai ai. O lo o i ai isi tatou fesoasoani foi a le Malo, lea foi e i ai le polokalame lea e taua o le Gode 121. E fesoasoani atu ai i isi pisinisi e le ausia tulaga tetele, a o lo o taumafai, e i ai le tupe faavae e tataua ona oo i ai le latou pisinisi i le tausaga ona agavaa lea mo nai fesoasoani ia, e i ai i lalo o le faamalu o le fesoasoani lea e taua o le Gold 121. O i ai foi le isi fesoasoani e tuusaunoa ai ia tiute, o le duty concession faapitoa la ia mo pisinisi tumaoti o lo o fia fai ni a latou pisinisi i le faaleleia o mea tau turisi i totonu o le atunuu. E tasi lona fesoasoani o lo o alu atu i le Matagaluega lenei. O le atinae lava lea o le pisinisi tumaoti o le Private Sector. E i ai foi isi fesoasoani lea sa saunoa le isi sui usufono, faapea le fesoasoani foi lea e ave mo pisinisi laiti, o le micro business. O lea sa faatupeina ma faagaoioia e le vaega lea o le SBEC, Small Business Enterprise Centre. O lea la ua faaigoaina nei o le Samoa Business Hub ona ua le o toe na o pisinisi laiti, o lea ua i ai ma pisinisi feololo, ua le o toe i ai le Small Business, a e o lea ua alu o le Micro Small Medium Enterprises po o le MSMEs. O le faatupega lea e faatupe faatasi e le tatou Malo ma le Malo o Niu Sila. O le reform lea na toe fai nei i le tausaga ua mavae, lea ua ese ai le tulaga lea, ua oo i pisinisi feololo, lea ua sui ai loa i le Samoa Business Hub. Sa fesiligia e le sui usufono faapea le faiga o le fesoasoani lea e ave i tatou pisinisi laiti nei, po o le a le mea ua le mulimuli ai i le faiga la ua fai ai e le Development Bank. O le tali puupuu, e sili atu le mea lea ua fai e le vaega lea, i le mea la e fai e le Development Bank. Ua i ai se suiga, lea e pei e i ai le latou faiga lea, lea e pilot pei se mea e faataitai ai. E maua ai le fesoasoani a nai tagata laiti lava, lea e i ai le micro business. O lea e oo i le \$10,000, e i ai le vaega e guarantee ina le nonogatupe a nai tagata laiti na. O le naunautaiga lava, ia faafaigofie ona

maua e tagata nei tupe easy access to finance. Lea ua taumafai i ai le vaega lea, e oo la i le \$10,000 e mafai ona guarantee e latou insure lene ua fai. E faafaigofie foi, na ua fai i luga o telefoni, o le MTala. Lea e fai i le telefoni alu ifo tala lana tupe i o. O tagata nei, o lea ua uma ona fai i ai suesuega a le vaega lea, e le soona avea. Ae faafaigofie, e le tau o mai mai Savaii e tau avatu tupe, e alu atu lava tupe i luga o le telefoni, ona o lea faaoga. E i ai le isi vaega, e i luga atu, o le vaega lea mai le \$10,000 agai i luga, o lene foi e faigofie ona guarantee e le vaega lea a le Business Hub, o luga atu mai le... e 80% e gurantee ai le vaega lea ma le 20% e guarantee e le tagata. Ua faafaigofie la, o lea e galulue faatasi ai ma le Development Bank ma isi foi banks a le tatou Malo. E tasi lene fesoasoani tuusao lava a lo tatou Malo i le taumafaiga ia develop le tatou private sector. O le tulaga i tupe faafaigaluega, investment, o lo o taumafai lava, ina ia tilotilo mai tagata mai fafo, o Samoa o lo o i ai i se siosiomaga lelei mo le faipisinisi. E lelei Tulafono, e lelei le faiga o latou tiute, e malamalama e transparent mea uma, tulaga uma e faafaigofie e uunai mai ai ia tagata mai fafo e o mai e invest i totonu o Samoa, o lea lava la e taumafai le Matagaluega i mea uma na. ia toso mai latou i totonu o le tatou atunuu, ia fai a latou pisinisi. Aua a tele investments, tele foi lene o galuega e maua e o tatou tagata. O le isi lene vaega o le anavatau. A tele le Private Sector e uunai a latou pisinisi, ona o lea faafaigaluega o tatou tagata. O mai tagata mai fafo, fai a latou pisinisi tetele i inei, o ai e penefiti ai? E penefiti foi tatou tagata faigaluega. E maua ai tupe, e tau faamalau atua. E tausi ai nuu ma aiga ma ekalesia, ae atinae ai foi lo tatou Malo.

O nisi vaega ia e taumafai ina ia fai tauvaga lelei, amiotonu. E tasi lene vaega taua o le Matagaluega lenei. Ia malamalama le aufaipisinisi, e ogatasi lava faapea le mea lea pei o le malae lea o le a taaalo uma ai. E taumafai foi le Matagaluega, ia aua nei i ai se isi e taalo mai i totonu i i, ae maualuluga le mea la e taaalo ai isi, level plaining field. E tutusa uma le avanoa o tagata e tauva ai mo le maketi, e tauva ai mo consumers, maua le latou vaega, ae o la foi e fiafia le consumer. E tasi lene faiga o lo o fai ina ia amiotonu le tauvaga. O lea foi na fai le tatou Tulafono foi lea o le Consumer and Competition Act, lea na manaia. O le manaoga foi o lene vaega, ina ia tauva lava i latou nei e ona oloa ae penefiti ai le tagata faatau, penefiti ai le consumer. O le mafauauga sa i tua o na mea, e leai nisi e manao e tauva i le consumer ae nofo tuu i luga le tau o lana oloa. Pe ana iloa o lea e faatau i i le tagasuka e \$5, e le mafai la ona nofo ia ma sii i luga le tau o lana tagasuka i le \$7, o ai la a alu e faatau i o. O le manatu lene sa i tua o le competition lenei. O lea la ua faataatiaese i le taimi nei, mo oloa foi ia essential goods. Tulai mai le faamai, atonu ua tau i ai le vaega foi lea, tatou faalogo i ai i la nuu, tupu loa le faamai, panic loa tagata ua o i faleoloa ua lau mai oloa, na tou te silafia isi oloa ia sa matua lau e tagata Ausetalia, e le iloa po o le a le mea na soona lau ai na mea. Ua alu le panic buying, lea la o le a tau tupu foi i inei, te i lava ua faataugata ia tau o oloa ia e masani ona sulu ai le atunuu. O suka masina alaisa falaoamata eleni, lea la na toe manatu ai le Malo e toe

faataatiaese le Competition Act, ae faamalosia le PriceControl. O lea la e alu ai nei, e tasi la lea vaega o le taumafai ina ia tutusa le tauvaga, healthy competition and fair. O lea la e i ai le vaega lea e o e asiasi i tua i tau o oloa nei. Ma isi vaega ia e tatau ona faamalosia i faleoloa, sa fesiligia e isi sui usufono le tulaga lea. Ma ou te tautino atu lava o lo o fai ma le faamaoni le galuega lea a le Matagaluega. E leai lava se faiga faatalale, e pau lava le talosaga ia logo pea e i tatou le au faatau, faafofoga mai Samoa, sa ou lauga foi i le mea lenei muamua. Afai e tou silafia se faleoloa o lo o solitulafono i le tau o oloa ma isi mau tulaga, e manaomia lo outou logo mai i le Ofisa i Salelologa ma le Ofisa iinei, o lea ua i ai le manatu o le Matagaluega, o le a fai se laina e vili fua mai tagata, atonu o le mea lea e soona fai ai lava e isi faleoloa le mea sese, faapea e le vilia e uma ai le credit. E le vilia e leai se credit a le toeaina lea, ona fai ai lava lea o faiga lea. O lea la o le a i ai se suiga, e fesoasoani i le monitoring ma le compliance o tagata i tulaga ia e tuu atu ai, ia ogatasi lelei le tatou taaloga. Ia tutusa le competition, ia healthy le competition alu lava i le tau o oloa, fai le service e o atu ai tagata. Faatele oloa e o atu lea o tagata e faatau ai. Ae o le lipoti lea o le suesuega lea na alu nei ia Mati, mai le faaiuga o Tesema e oo ia Mati. O lea e 438 ia faleoloa sa asia. E le faapea na o tamai faleoloa, o faleoloa uma lava, o mea uma lava e tau o faleoloa. E 131 Upolu ae 307 Savaii. O mea nei sa asiasia, o le tusia o le tau o oloa i luga o oloa. O le i ai o le tusi lisiti, o le lelei o le fua, aua e tasi lena mea e fai ai foi togafiti a tagata, o le faasese o le fua. E avatu e le atoa se afa kilo ae o la ua kilo le mea la ua tilotilo atu i ai. O mea uma na e fai e le Matagaluega ina ia tutusa uma mea ia e faaaoga. Ia aua nei i ai se isi e faitogafiti. Ma faaaoga le tatou vaega foi lea o fua o kilo, e le o toe faaaogaina ni pauna. O le vaega la o compliance i Savaii, e 82%, 90% mo tusi lisiti, 92% mo fua faatatau o oloa. O Upolu e 86% i o latou tau, 87%, 99%, 97%, e le o ni pasene faapea e laiti. O la lava e tele lava la e comply i mea ia e fai atu. Ae e i ai lava le misu, e i ai lava le sasi. O nisi la nei o faleoloa po o misu, o le isi foi mea, pe uma loa ona o atu le asiasiga taeao foi, ona toe tuu foi lea i le mea na i ai. E le mafai ona tatou faia pea, faia pea e faapea e i ai se isi e 24 itula o nofo ai i i le faleoloa lea. E faamoemoe ia i latou e faatau, latou te logo maia i le Matagaluega faleoloa ia ua taugata tele a latou oloa. E le o faapipiia le lisi lea na aumai e le tou Matagaluega, e le o tusia le tau o oloa. O mea na e manaomia. O lea la o le a i ai le tatou laina lea, vili mai, se vili mai. E oo foi i Savaii, vili ifo i ai, tau i ai le igoa o le faleoloa, ona o atu lea o le Matagaluega pau lena o auala e mafai ona tatou faapea. E tele le tatou aoga i le faiga o le tatou mataupu lea. O le mea foi lea o le o lea tau i si sui usufono, sau foi lea o si sui usufono iinei, ae o la e i ai tagata. The onus is on the consumer. E logo mai, matau mea na e faaletonu. O le vaega faatupulaia o avanoa faigaluega, e pei ona sa fai atu, e maua galuega a o tatou tagata, e uunaia le tatou Private Sector, uunaia tatou investment mai fafo, faafaigofie le o mai o tagata. E i ai foi nai a tatou vaega ia o tagata galuega faavaitaimi, lea ua toatele, lea ua oo i le 3,000 avanoa. E 3,000 tagata o le tatou atunuu sa le faigaluega ae o lea ua maua galuega. O se matua

aoga o lea foi faiga o lo o uunaia e le Matagaluega lenei. Ua le gata i le au tauapu ae ua i ai ma isi. Ua i ai ia avanoa 3 tausaga e faigaluega ai i Niu Sila, le aukamuta. E ese foi le scheme lena, o le aufasimanu ese mai i le autauapu. E faapena foi i Ausetalia, e ese lava le Seasonal Work, ese le Pacific Labour Scheme. O lea e o ai pe 3 foi tausaga, e oo i le 5 tausaga e mafai ona o ai, e faigaluega i le faletalimalo. E i ai foi le aufasimanu e 3 tausaga. Ua matua tele lava nei avnoa, ae o lo o manaomia mai o tatou tagata, aisea? E malolosi, e faigaluega lelei, e lelei le pulega o latou amio, e o atu iinei ua uma ona fai i ai le aoaiga. Ua uma ona toso mai alii ma faipule, latou te molimauina tagata ia o le latou nuu o le a o, o tagata lelei. E le pei o se mea foi lele, na ona togi mai lava e o outou e maua ai ai tou tupe. Aua e sese loa, se isi o latou aafia atoa lava le latou nuu. E le toe i ai lava se avanoa. O lea foi la ua malamalama i ai, e le toe i ai lava ni avanoa e tuua i ai. E o a la, ua malamalama lelei, lea e ala ai ona tupu le lelei o galuega. O lea ua tulai mai le faamai, faapea ea na i ai se isi na mafaufau i lenei tulaga. O lea ua taumafai le Malo e toe aumai uma i latou. Sa tele galuega e faapea e maua i le taimi lenei, i le tulai mai o le faamai, toe sau ma le tau malulu, ua ese foi galuega e fai i Niu Sila, ae ua matua sui lava le tau. E ese mea e fai i le tau mafanafana, e ese foi galuega e fai i le teuga o laau lava nei. E masani a la e le toatele tagata e faigaluega i le tau malulu, i galuega ia, e pei o le tauga o le apu ma le tauga o isi mau laau uma, lea e manaomia ai o tatou tagata. O le tulaga la ua i ai, ua le maua uma ni galuega a nai o tatou tagata e pei sa fuafua i ai. Sa fuafua lava e ono maua uma a latou galuega. Ae peitai ane ua le o gatasi le futia ma le umele. Ua toatele foi tagata Niu Sila ua leai ni a latou galuega, ona ua aafia i le faamai. O lea la ua o e sue galuega i o, i togalaau nei sa alu ai tatou. E moni ua o ese le au pack packers foi ia ae ua toatele tagata Niu Sila la ua o e sue galuega ai. Ua faamuamua lava e Niu Sila o latou tagata, pe a oo i mea faapea. O lea la ua toe taumafai malo e faafoi mai o tatou alo ma fanau. Afai foi o faafogafoga mai Samoa, ia e avatu lava le fautuaga, aua le popole, o lo o saogalemu pea a tatou fanau i na foi nuu, o lo o fesoasoani malosi foi i ai i latou sa faigaluega ai, o lo o nonofo ai pea. O lena foi ua tuu mai le tauau o Niu Sila i se auala e mafai ai ona fesoasoani i alo ma fanau ma le toe faafoi mai. O lea ua amata ona gasolosolo mai i latou. O fuafuaga e le i i ai se isi na iloa e tupu le faamai, o le tulaga lena, ae o lo o fai lava galuega a le Malo, o lo o fesootei pea o le Matagaluega lenei ia mautinoa e leai se isi o tatou o maua, ma o lo o saogalemu, ae o le tulaga lena ua amata ona tau la'u la'u mai. I taumafaiga ina ia maua galuega, e i ai foi galuega e tataua ona tuu i ai le faamuamua, ina ia lifi i luga le tomai. Mo le silafia foi, o galuega foi ia e o e tau apu, o lo o i ai lava le manaoga o le Malo, o la foi e silafia e Niu Sila, ia fo'i mai tama nei, ua i ai nisi tomai, pe ua iloa ave loli pe ua iloa ave palau, pe ua iloa fai masini ia pe ua i ai sona laisene. O tulaga uma na o la latou te silafia, o la foi e fai e latou, ia o mai o tatou tagata ua i ai nisi tomai, i lo o le o i o na o le tau apu le mea o lo o fai, e toe o mai, o le tau apu lava. O lo o galulue lo tatou Malo, atonu ua i ai nisi nuu ma alalafaga ua latou iloa tomai ua sili atu i tama nei ina ua toe foi mai. O le



vaega lea i le aoao o tatou fanau, o lalo lava o le sini autu o le MCIL, ia maua avanoa faigaluega o tatou tagata. O le vaega lea e faatau foi i fuafuaga a le tatou Malo mo le atinae o Samoa. O le Strategy for the Development of Samoa, ia tele le aoaoina o tatou tomai faamatata eseese. E leai lava se faafinauga e faia i le tulaga lea, aua e le faapea e loia uma lava tagata, e le fomai uma tagata, e le suetusi uma ni tagata, pe saienisi uma tagata o se atunuu. O fuafuaga uma lava ia a le Atua na fai. E i ai lava i latou e tomai i aoaoga, academically gifted. E mafai ona latou aulia tulaga maualuluga o aoaoga e oo ai i galuega nei. O se mea lelei, ae e i ai foi latou e le faapena, e pei ona ou fai atu o galuega na a le Atua Silisili Ese. Ia paleni uma tagata o se atunuu. O lau tala lava lea e fai i le taimi ou te alu ai e fai faauuga o le au aperatureniti. Po o le a lava le manaia o le taavale a se loia, ae usu atu i le taeao faaola atu ua pe, e fiu lava lana faaloia e pe le taavale lea, seiloga lava e vili atu i le fale inisinia, tuli mai lava sau inisinia, e sau lava le inisinia tago atu ola. Sau le palama pa le paipa i le po i le fale o le fomai, e moe lelei lava le fomai ae sisina ifo le vai, aua na te le iloa le mea e fai. Malama le taeao vili i le palama, sei e sau se i e... sau lava le tamai palama a'e i luga na te iloa le mea e fai. O tomai na o lea e manao le tatou atunuu e atinae, o tomai faamatata eseese. Lea e ala ai ona uunai lava le tatou polokalame lea faa-aperenitisi a le tatou Malo. E 50% le tau o le pili o le faa-aperenitisi e totogi e le Malo, o le 30% e totogi e le falefaigaluega. O le 20% e totogi e le aperatureniti.

**Afioga Tafua Maluelue Tafua:** Lau Afioga i le Fofoga Fetalai,

**FOFOGA FETALAI:** Tulai mai le sui usufono mo Aleipata Itupa i lalo.

**Afioga Tafua Maluelue Tafua:** Ou te vaai atu lava ua saunoa lau Afioga i le fomai, ae na e emoemo mata o si fomai na e i ou talane, si ou uso lena o Tuitama. Ou te le iloa la, masalo o lea faapea ua ou faalavelave atu, ae pe tulai ae Tuitama e poto foi e palama. Na ona ou fesoasoani atu, o le mea lena ua ta alofa atu i lau saunoaga. E emoemo lava mata o si fomai na e i ou talane, ma le faaaloalo.

**Afioga Hon LAUTAFI FIO SELAFI PURCELL:** O le uiga o lau tala, o le fomai e le i atoa le 60 tausaga, a o tama ia o le matua matata eseese lava. E leai, o tala faatusa, o tala faatusa e iloa ai le aoga o le mea lea e taumafai i ai lo tatou Malo. E fai o tatou fale tetele nei, e tataua ona i ai ni tatou tagata faimoli. E tataua ona i ai ni tagata uelo, e tataua ona i ai ni palama, o atinae uma o le atunuu. O le faiga o taavale, o le valiina o taavale, o le faiga o pusaaisa, o le faiga o air condition. Aua o le mea lea ua i ai, o le mea lena o le air condition i taimi o ou ola ae au. E tasi lava le fale sa i ai le air condition, na o le fale lava o Makesi. O le faleoloa o Makesi. O le taimi la lenei, ou te iloa ua tofua lava tatou ma na tulaga. O le atinae o Samoa ua i ai, o lea ua tofua lava tatou ma le air condition. E tataua foi la ona i ai ni tagata e iloa fai mea ia, a leai, o lona uiga e aumai

lava mai fafo o tatou tagata. Ae o le atinae na o lea e naunau ai lo tatou Malo, atinae ia infrastructure atinae ma tagata e galulue ai i mea ia. Aua nei o tatou faamoemoe i e mai fafo. Sa laga e le sui mamalu se tulaga o le faa-aperenitisi, e pei o le grade test lea 2 ma le 1. E taua, o le vaega lea e taua o le grade test o le vaega lea o nai tamaiti foi ia e aulia le Form 5, ona alu loa lea faigaluega, alu atu loa faigaluega i se mea lea. Alu atu, sau loa i i, e solo suauu ai i i ma aoao ai lau fai taavale. Ona fai lava lea, ua amata ona lelei, ua ova atu i le tausaga o faigaluega ua naunau i ai. E tasi lona auuala, e mafai ona au ai i le faa-aperenitisi. Pe a pasia le grade 2, aua e muamua le grade 2, ma le grade 1 ona mafai loa lea ona agavaa e alu i le tausaga 3 ma le tausaga 4 i le aperenitisi lea. E le faapea la ua gata ai i i le 1 po o le 2. O le naunautaga a pasi i, ona see loa lea e alu i le faa-aperenitisi official, lea e galueaina i uta i le NUS. O le fesoasoani lona mo nai tamaiti ia, aua e 2 lava auuala e au ai i le aperenitisi, o le uma o lau aoga mai le NUS le Pre Apprentice Scheme a aoga, po o lou pasi mai i matata eseese ia e i ai nei, o Don Bosco o le Punaoa ma isi Technical Institute o lo o i ai nei. E pasi mai i ina, ona agavaa lea i le Apprenticeship Scheme. A o e la e le au i le vaega lea, nai tamaiti ia e drop out mai aoga, ae o la e tinou. Ae o la e fia faigaluega i le tomai lea, pe alu atu lava i se falefaigaluega amo paipa ai lava i se palama, ma vaai atu lava e tinou e learn mea tau palama. E mafai loa ona tuu mai lona suafa e le falefaigaluega i le komiti latou te iloiloa. Afai o la e tinou le tamaiti ia, o le avanoa tonu lea mo ia. E pasi lana grade 2, pasi le grade 1 ona oso loa lea i luga i le Year 3 ma le Year 4 maua loa lana certificate. Afai la e ave le certificate lea grade 1 ma le 2 e le Matagaluega i le tagata lea, ae le uunaia e alu e faaauau le apprenticeship, ia o le lost lona a latou, aua lona uiga o lea o le a faaauau le tomai o lenei tagata e le i oo i le mea e tatau ona oo i ai, ia a o lea o le a faaauau pei o ia o le faimoli. O le mea la lona e faamoemoe la i le tatou Matagaluega o lo o vaaia ia mea, o lo o pasia fale i le aufaimoli, e i ai latou associations foi lea o le aufaimoli, palama, o tagata la na e set ina standards faapena. A o atu la e asiasi le fale i le plumbing o se fale e le o talafeagai ia e pau la i le tagata e ana le galuega i le faafaigaluega o tamaiti. O le naunautaga o le Malo, o latou i luga, o le fesoasoani a le Malo lea ua avatu. Ave loa i luga e faaauau ai lana aoga i luga i ina ona pasi mai lea ma le full apprenticeship certificate ae aua le vave faamutaga lona fiafia e le i gata lona tomai.

E pei o le fesoasoani atu lona i le sui usufono mamalu sa tulai mai, e faatau tele e le Malo le scheme lenei. Ia, ua tatou... pei ona ou fai atu o le tatou fesoasoani i le tatou private sector, o lona ua uma ona laulau atu le isi vaega, e i ai foi le tatou awards foi lea e fai e le vaega lea o le uunaia o mea o manufacturing, lea e i ai le awards a le SAME lea foi e ave i ai e le Malo tupe ina ia atinae mai ma tulei mai ai e o lo o gaosia oloa, fai faalelei ia entitle ai i mea nei ma ia faalauiloa ai i lalo o lea foi faamalu a latou oloa o lo o fai. Lea foi na tatou, lata mai nei lava na tatou ofi atu ai i nisi o feagaiga e puipua ai a tatou meatotino tau le atamai. O mea uma nei e fesootai uma lava galuega nei, o meatotino tau le atamai po o intellectual properties i lalo o vaega ia o feagaiga lea na tatou i ai ma le

protocol lea na muamua tatou o i ai i le tausaga lea ina ua ofi atu foi tatou i nisi foi feagaiga e 3, o le puipuia lava o meatotino tau le atamai a o tatou tagata pe a oo i le taimi o la ua i ai le tulaga o mea ua latou gaosia e puipuia ai a latou lava meatotino intellectual properties ia aua ne i faoa e nisi, aua o mea nei, o le atamai lava o le tagata ia na faatu ai e ia nei mea ma galue ai, a o lea o le a gaosi e le isi tagata. O lea la ua faafaigofie uma e le tatou Malo i lalo o le tulaga lea ua tatou ofi atu i ai, e tasi lava le resitalaina o a uma au mea ia e fia resitala i lalo, e alu uma i nuu ia e ova i le 100 o lo o i totonu o faalapotopotoga nei, ona puipui ai lava lea e le mafai e se isi ona faataua ni oloa na, pe a iloa e le o alu atu i tagata e ona... o le aoga foi lena, o le fesoasoani foi lena i o tatou tagata, o le faataua foi lena mo tatou fanau aoga, lea e faia ai foi e le Matagaluega aoga ina ia ignite foi lea le atamai o tamaiti ma le manao e suesue, e maua ai e latou tomiai. E faalua ona ou alu i mea nei a aoga, vasega maualuluga ia le Year 12 ma le Year 13. Ou te matuai maofa i mea la e aumai aoga, faatauva foi aoga, renewable energy, mea o le faaogaina o mea faa-organic, tele ia o mea. Ou te maofa e le i taitai oo i ai lou malamalama i la mea i le taimi o ou aoga au. E matautia le maualuluga o tomiai o tamaiti. Lea la e taumafai atu i ai tatou. Aua a mafai ese tamaitiiti se mea i le taimi lena, a o se mea e ono ave faa-commercialize, e tataua la ona puipui i i, o le meatotino tau le atamai a le tamaitiiti lea po o le teineitiiti lea. O le aoga lena o tatou mea nei e puipui ai, e tigaina le isi e mafaufau ma fai ae sau le isi pue le ata alu fai. A o le mea lena o lea ua faamalasia, ua faafaigofie foi ona fai, ua resitala uma lava i luga o tatou mea faatekonolosi i le taimi lena. E tele lava nisi mea, ua galulue faatasi uma tatou Matagaluega o le MCIL, o le Revenue, o le Immigration, Leoleo, ia puipuia le saogalemu ma ia uia uma ala o le Tulafono e tagata o lea e fia omai i totonu o Samoa e fai a latou pisinisi. E i ai le Komiti e i ai uma i latou nei, latou te iloilo ina uma po ua uia uma e nei tagata tulaga uma ia aua ne i sao mai i totonu o Samoa ni tagata faaletonu ma omai faipisinisi i nei, a o lo o i ai ni tulaga faaletonu faapena.

O lo o fai lava asiasiga foi a le Matagaluega i tua e faamalalama i le atunuu, o mea ia o lea e fai e le Matagaluega, a i ai ni mea fesoatai mai, e o ai foi ma isi Matagaluega e pei ona ou fai atu ai, ACC, e o faatasi uma. Ia aua ai le mea lea o le o atu o le isi Matagaluega nei, vaiaso lea toe talimalo foi le nuu i nisi foi Matagaluega. E o uma lava Matagaluega nei i lalo faaopoopo i ai ma le Revenue, e o e faamatala i tagata mea, ona tasi ai lava lea o le o ifo o tagata o le nuu, e tasi lava malamalama uma. Ia, o se taumafaiga lava ina ia alu lava le outreach, malamalama le atunuu, ia aua ne i i ai ni tulaga e faaluafesasi ai ma tulai ai ni tulaga faaletonu.

Lau Afioga, o le a ou see atu mai i le isi au Matagaluega.

**FOFOGA FETALAI:** Ia, ou te faamalulu atu i le Afioga i le Minisita, o lena o le a see i le isi vaega o le saunoaga, a o lea ua tatou taunuu tonu lava i le taimi o le tatou malologa. O le a faaauau lau saunoaga, ae ou te

faasilasila atu ua faataatiaese Galuega a le Fono mo lana malologa masani.

*Na faataatiaese Galuega a le Fono Aoa mo lana malologa masani i le itula e 4:45 i le afiafi ma toe faaauau i le itula e 5:11 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.*

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoa Faitulafono.

E faataatiaese Galuega ma Taualumaga a le Fono o lo o saunoa le Afioga i le Minisita mo Pisinisi, Alamanuia ma Leipa ma Faalapotopotoga Tumaoti a le Malo. Ia ma lou faaaloalo ou te tapa lau Afioga i le Minisita e te tulai mai, atonu e le o toe tele nisi vaega o totoo o lau saunoaga.

**Afioga Hon LAUTAFI FIO SELAFI PURCELL:** Faafetai atu i lau Afioga i le Fofoga Fetalai. Atonu o lea ua saoi le taliga foi o le sua, ua maua foi se faamalositino i lau Afioga ma le mamalu o le Maota. E 9 au Matagaluega, ae na o le 1 lea ua uma, ae o le a faatopetope atu.

**FOFOGA FETALAI:** Malo faafetai.

**Afioga Hon LAUTAFI FIO SELAFI PURCELL:** Lau Afioga, o le a ou oo atu i le isi au Matagaluega, ae toe tasi lava si mea lea ua galo ia te au leaga e taua tele i le fesootaiga o fuafuaga a le Malo ma Matagaluega. E momoli atu lau faamalo i le Minisita o Aoga ma le Matagaluega i le reform lea ua agai i ai le Matagaluega lea o Aoga ia vave ona matauina i latou e tataua loa ona faasee ifo e atiae o latou tomai faa-matata eseese e le pei o le mea lea e masani ai e alu lava le isi tamaitiiti, e alu pogisa lava, tiga ua le toe fia aoga, ae ona o le a i lalo lava o le faiga sa fai ai.

I fonotaga sa ou auai atu ai i le Matagaluega lea o le Faalapotopotoga o Galuega a le Lalolagi, po o le International Labour Organisation, o le vaega tonu lava lea e faataua e latou, e pei foi ona ou talanoa atu i le Afioga i le Minisita ma le Ofisa Sili i le aso sa fai ai le la folasaga i le Kapeneta, e te tilotilo i galuega mo le lumanai, jobs of the future and the future of work, po o fea e agai i ai. O le vaega o lo o faataua e latou e tataua i atunuu o le lalolagi ona tilotilo i ai, faaipoipo le curriculum a aoaoga ma le maketi o galuega, aua e leai lava se isi mea e ala ai ona o e aoga, o le fia maua o le tomai ma maua ai se galuega. O lea la ua finagalo le Afioga i le Minisita ma le Matagaluega o Aoga, o se tulaga

laalaa i luma, tulaga vaai mamao, ona tatou te le iloa po o galuega lava ia e faataua i lenei taimi, i le isi 50 i le isi 100 tausaga, po o le tulaga lava lena e i ai. Ia o lea la o le a amata ona tatou tilotilo i tulaga agai i luma, e tatou te taulai pea i ai tatou aoaoga i lenei vaitau ma le agai atu i luma.

Ia lau Afioga i le Fofoga Fetalai, o le isi au Matagaluega lea na aafia ai nai fesili ma manatu foi o sui usufono mamalu, o fanua o le Malo po o le SLC. Mo le silafia e le Maota, e 24,000 eka na tuuina mai e le SLC i le Malo mai fanua sa i lalo o le WSTEC i le tausaga e 1990 i le faiga o reforms nei na faatuina ai lea o le SLC latou te galueaiina faapisinisi ia maua mai se return o fanua nei ma auala foi e fesoasoani atu ai le Malo i tagata limavaivai latou te le gafatia ma e le o i ai ni o latou fanua. O lea la e faagasolo ai faapena le faagaoioiga o le Matagaluega lenei. E tusa la na o se vaega o fanua nei ua faatoa, lea ua uma ona fua, ae ova atu i le afa o le 24,000 eka lea e le i fuaina lava, ma o lo o faagasolosolo atu lava i ai galuega a le Matagaluega. O le tele o nei vaega e le i fuaina, o le tele lava o le motu i Salafai. O lo o galueaiina foi e nuu, ia ae le i oo atu lava i ai le Matagaluega e fua lelei ma vaevae lelei ia tofufusia nuu ma ni fanua e galulue ai. A o fanua o le tatou Malo, o lo o i ai auala lea e faagaoioi ai, o fanua nofo lea e faalisi e le Malo residential, faapisinisi, faatoaga ma isi fanua o lo o tuuina atu i isi Matagaluega a le Malo e pei o le EPC, o le Suavai ma vaega faapena, le Ofisa o Faatoaga. A o ituaiga faagaoioiga na o fanua na o lo o i ai nei.

E i ai fanua lea ua uma ona fua nei, ma o la e lava e fua, o lo o i tuamaota ma tualaoa o nisi o alaalafaga iinei i Apia faapena foi i Savaii. Oinei la i Apia lea ua faagasolo atu le fuaina ma lisiina loa ia i latou lea ua tuu i ai e le nuu le afa 5 eka po o le 1 le eka ma tulaga faapena, fanua ia e i tuamaota o nuu, ia maua le mea e galulue ai, a ia maua mai foi se tupe a le tatou Malo. O le faiga la e galulue faatasi le SLC ma alii ma faipule o lea nuu ma lea nuu, lea sa laga e se sui usufono lea ua maua atu se fanua e galulue ai foi lo latou foi alaalafaga. Ia o le manatu lena o le Malo e fesoasoani ai i nuu na, maua ni mea e galulue ai ma maua fanua e atiae ai lava tagata lea ua ave i ai le lisi, lea ua avatu le ata i lea itumalo po o lea nuu, ona nonofo lea o latou ma vaevae i ai tagata ma matai o le latou nuu i fanua na ua fua atu, ona fai ai loa lea o lisi a le Matagaluega ma tagata ia e nonofo ai i fanua ia. A faaletonu la, ona tau foi lea i le nuu e faaletonu le tagata lea e faia lisi nei, a o lisi lava o lisi taugofie. A fuafua la i lisi foi ia a tagata o fanua tumaoti ma tagata taitoatasi, o le matua taugofie lava o lisi ia e fai mo tulaga faapea. E i ai foi lisi faapitoa lava mo nuu ia e tau o nuu tu taulaga, ma e faapitoa lava la le faaiuga na fai i nuu nei, lea i ai Vaitele, Saina, Toamua i Faleata, Fagalii, Vailele ma Letogo i Vaimauga. O le finagalo o le Malo, ona o nuu nei o lea e latalata tele mai i le taulaga ma nuu mavae nei, e ono aafia fanua nei o le Malo i le lolofi mai o tagata i nuu nei le urbanization drift lea e omai tagata mai tua e nonofo ai, lea la na fai ai le faaiuga a le Kapeneta e faatau fanua ia kuata eka i nuu ia, i se tau faapitoa, e \$35,000 i le kuata eka, o la e lava e tumau le tau lena i le taimi lenei. E \$35,000.

E masani ona lauga se tasi o sui usufono mamalu i mea ia, a o le tulaga lena. Na ala ona fai le faaiuga lena pei ona ou fai atu, ae tumau pea le fanua o se fanua tau Samoa. Ioe, o le mafuaaga, ina ia aua ne i mafai ona faatauina fanua ia, faatau ese atu, faatau e tagata o le nuu, na o tagata lava o le nuu lea e mafai ona latou saofaga i le faamanuiaga lea, tuu foi la i alaafaga, e i ai komiti o eleele a nuu nei, o latou na latou te faasoasoina fanua nei i tupu ma ee o le latou pitonuu, ae tumau fanua tau Samoa ia aua ai ne i mafai e tagata nei ona latou faataueseina fanua ia ua tuu atu ia i latou. Ona maua ai lea o le tulaga foi lea, o le puipui i le pulega mamalu a alii ma faipule, ia aua ne i uma ane, ua faatau mai e latou ona o loa lea faatau i tua i tagata mai i ma o, ona uma ifo lea ua tumu i tagata mai i ma o le nuu lea. O le tulaga tonu lena, o le fesoasoani lena a le Malo ia mautu pea le pule a alii ma faipule, o tagata lava o le latou nuu lea o le a faatauina fanua nei e penefiti ai lava ia ma lana fanau pe a uma atu ia see ane i lana fanau, a o le tulaga lava lena e tasi, o le tulaga lena.

Ma na pau lava lea o nuu na fai ai le faaiuga lena, E i ai foi la ma isi fanua i tua atu mamao atu i gauta atu o lo o galulue ai foi nisi o alaafaga nei, e ese mai fanua ia na vaevae e faatau tai kuata eka. Ma e oo mai i le taimi lenei, ua sololelei nisi nuu ae o lo o faafitauli foi nisi nuu. O luitau lava o lo o taumafai le Matagaluega e foia ona ua fai foi si leva o alaala ai tagata nei i luga o fanua, e mafua fai mai foi latou ua taugata ae a o ese, e tataua ona totogi atu e le Malo ni tupe. Ia o lo o gaoioi pea le mamalu o le Komiti Faatonu ma le Matagaluega e taumafai ia galulue faatasi ma Komiti o Eleele ma alii ma faipule o nei nuu ina ia taunuu i se taunuuga lelei. O nisi foi o fanua, o lo o nofoia lava e nisi o aiga, ua avatu lava i ai e le Matagaluega faamaumauga maumaututu o fanua o fanua o le Malo, ae o la e foi fai mai lava latou o latou fanua, ma faafaigata ai lava foi galuega. Ia a o lo o faagasolo pea i ai galuega a le Matagaluega, o le naunautaiga lava ia nonofo i fanua i ni auala faaletulafono, ia aua ne i i ai se tulaga o la e nonofo i fafo atu o le Tulafono, e taua la le vaega lena ia latou, aua afai o la e nonofo faasolitulafono, e faasolitulafono lava e uma ifo lava, e manumalo lava le Tulafono. Ae o lo o galulue pea le Matagaluega i le Taitaifono ma le mamalu i le alii Pule ma le Matagaluega ina ia foia faafitauli nei.

O manatu sa tuu mai e nisi o sui usufono, o lo o i ai fanua o lo o silasila atu le sui usufono e pei e le o faaaogaina. O le tulaga ina ua ou oo mai i i, o i ai fanua e tai 50 eka, tai 100 eka sa nofoia e nisi. Ona ou manatu lea, faasoasoa le manuia ona vaevae ai lea o isi fanua, tuu ai pe na o le 40 eka ia i latou sa ia i latou fanua tetele nei, ae faasafua i nai isi foi tagata o lo o fia maua ni mea e nonofo ai ma fai ai a latou foi atinae. O le manatu lava o le Malo, ia maua le avanoa mo tagata uma e atiae ai o latou aiga, o le fesoasoani foi lena i le atinaeina o le tatou tamaoiaiga ma le tatou Malo. O lena la e i ai nai fanua na ua toe vaevae. O lo o i ai lava fanua lapopoa na o lo o i ai i tua, iinei i Fiaga ma nuu na, ne i sese le sui usufono faapea ai e le o faaaogaina, a o le tulaga lea ua i ai, ona sa i ai i lalo o isi foi aiaiga faaletulafono. E tau saisaitia la le Matagaluega i le o

atu foi lea e se i mai fanua ona o la e i ai sainigalima e fia tausaga o le lisi, ma o le mea lea e faaaoga. O le mea la lea ua taumafai le Matagaluega ina ia i ai i totonu o feagaiga fai, a 3 masina e le faaaogaina le fanua, o le a toe aumai i le 3 masina ona o le naunau la ia avatu le fanua faaaoga, ona toe totogi mai lava lea e le fanua ia i le Matagaluega le tau o le fanua, ae aua le avatu taatia foi lea e faavaoa ae faapea mai se i oo ise taimi fai lana atinae. O le tele o lisi, e ova i le 2,000 tagata e mananao i ni fanua. O le tulaga la lena ua i ai le taimi lenei i feagaiga fou tau lisi o lo o i ai nei, e 20 lava tausaga toe faafou. A oo atu i ai e le o faaaogaina le fanua i le 3 masina, ona mafai lea ona toe se i mai faasafua i isi tagata. O isi lisi o la e faapea e le o faaaogaina, a o la e faaaoga e fai ai lafumanu, o lo o ave i ai le tuualalo, faaaoga fanua, faaaoga. O le naunautaiga o le Malo, faaaoga fanua e fesoasoani i le atiaaina o le tatou atunuu. O lo o faapea mai foi se tasi o sui usufono, faataugofie tau o tatou lisi, e i ai lava faiga faavae e alu uma ai lisi, o lisi nofo, lisi o faatoaga, lisi o pisinisi, pei ona ou tau laulau atu. O lo o i ai faiga faavaaitau o lisi na, ma o tau lava na e tumau, e le mafai ona sui nei, sui le isi sui le isi. O fea le mea o le a tatou fai i ai? E pei ona ou fai atu, faaaoga le lisi, e vave lava ona totogi mai e le lisi ia le tau o le lisi, i lo le le faaaogaina ae fai mai ua taugata tele. Ia o se tali atu lena i le mataupu a sui usufono mamalu.

O se tasi o sui usufono mamalu foi sa talosagaina le auala lea e alu i Fiaga. Ia ou te molimau i le sui usufono lea mai Faasaleleaga. Se i vaai e nofo i Faasaleleaga ae sili atu le tele o le maumaga i uta i Fiaga? Lea la e aafia i le leaga o auala nei aua o i ina o le matua tele lava o le talo lea e sau ai a tatou, ma ua uma foi ona talanoa i le Matagaluega, se i tilotilo ae taumafai e fai le tou auala pe a vave se taimi. O le auala foi lea na fai e pei foi o le saunoaga a le sui usufono, ae ona o le tetele lava o tafega ma le malosi o le vai, o i ina e vave lava ona faaletonu ai, ae taatia mai le mataupu i le auala o lea ua faaoo i le Matagaluega, atonu e le o toe umi se taimi ona fai foi lea o se galuega. E tele foi galuega a le Matagaluega lenei i lalo o le tatou stimulus package lea sa faasafua foi le totogiina o pisinisi laiti ia e i totonu o tatou maketi, lea e le o i ai ni lisi o totogia mo masina ia pe 6 ea. Tasi lena fesoasoani a le tatou Matagaluega lenei, fesoasoani a le Malo i le tatou stimulus package na tea atu nei lea na faalaulau atu, e i ai foi ma isi Matagaluega ia, o le Housing lea foi e i lalo o lau vaaiga, lea foi e fai latou stimulus package e fesoasoani i tagata sa fai a latou nonogatupe aua ni o latou fale. O lena foi Matagaluega, o lo o tele lava le latou fesoasoani i tagata le tagolima ina ia mafai ona maua ni fale lelei e alaala ai ma afifio ai.

E faapena foi le vaega o le ACC, tasi foi lena vaega o lena foi sa fai le latou stimulus package lea a le Malo e fesoasoani foi. O le maketi lea e i i i Fugalei, ioe i Fugalei, lena foi e faasafua totogi o lisi ia i latou uma na e fesoasoani i a latou pisinisi ona ua faaletonu ona o le faamai, o le tulaga lena i le... O fanua na o le tatou Malo, o lo o taumafai lava e tofutofusia uma tagata, e tele tagata e mananao i fanua. O nisi foi, e tiga ona i ai o latou fanua, ae toe omai lava i i e talosaga nisi fanua. A o le naunautaiga,

ave le avanoa i nai tagata e leai ni fanua, mai Savaii, mai tua, e omai e fai ai ni o latou fale e atiae ai o latou aiga ma fesoasoani i le faaaogaina o fanau ma e latalata i galuega. E tofu lava tatou ma le aiatatau, e tatau ona i ai sona ia foi sao... sana ia foi galuega e fia fai mo le atunuu i totonu o kamupani po o le Malo, ae paga lea, seiloga e usu mai le pasi i tua. O le tulaga lena o lea e taumafai le tatou Malo ia aoga ona fanua ia fesoasoani i le atiaeina o le tatou atunuu e ala i galuega ma aoga a le fanau.

Sa i ai nisi sa faafesili mai ma faia ni lafoga e uiga i tupe faasili a le tatou Malo, e pau lava le tali e faapuupuu atu ai, o la e i ai faiga faavae i mea nei tau le dividend, policy. O vaega uma lava nei e taua o faalapotopotoga fefaatauaiga po o public trading bodies, e tatau ona tofogi a latou tupe faasili mai le tatou Malo e fesoasoani i le tatou paketi lea. Talu ona faatu mai le Matagaluega lea o le MPE, ua tele lava le suiga, tele le suiga o le sao o faalapotopotoga nei, o lena e nofo mai le Taitaifono o le Komiti o Tupe i le paketi na tea nei, lea sa ia acknowledge ina lava le tele o le suiga o i ai i tupe maua a le Matagaluega, talu ai lea ua mataituina tatou tino nei, faalapotopotoga nei tau fefaatauaiga ia fai mai lo latou sao. O le mafuaaga lava na faatu ai faalapotopotoga nei tumaoti, aemaise lava le vaega lea o fefaatauaiga, ina ia faagaoioi faapisinisi ma ia maua le tupe faasili ia pei lava o kamupani e le o ni kamupani a le Malo. O lona uiga, a lelei lava le aluga o le pisinisi, e maua lava le tupe faasili. E le tatau foi ona felavasai tau o eletise, tau o le vai, ma le mafai po o le le mafai ona fai le tupe faasili lea, le dividend lea. E le tatau ona fesootai le lua lea, e fua lava le tariff ia, ae fai lava le galuega ia e ese mai e iloa ai pe i ai se tupe faasili pe leai.

**FOFOGA FETALAI:** Se i tulai mai le sui usufono mo Palauli le Falefa... Lau Afioga i le Minisita, se i tulai atu le avanoa lea.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, faafetai i lau Afioga, se i fai foi se malologa a si ou uso a Minisita. Sa ou taua le vaega tonu lava ua oo i ai le saunoaga. E manuia tupe faasili e le o se mea leaga. A o i i le Vaega lea o le Faaputugatupe o Mavaega Tausi e tai pei lava o le Penisiona a le Palemene lea e fai e le NPF e leai se tupe e tipia. E faapena foi le saofaga a nai tagata ia e fai iunite. Pei la o lau tuualalo ina ia sui le tulafono e toe faafoi ai tupe ia e totoe i le faagaoioiga o a latou iunite lea e ave e invest. A foi mai la le tupe ua le uma ona faaaoga e le Kamupani o Pulega e tatau ona foi i le tagata fai iunite manuia ai le faapau koko, manuia ai le tagata fagota, manuia ai le faifaatoaga, foi i le tagata e ona iunite ae le o le ave e toe faatupe ai...o lea e tele lava tupe e faatupe ai galuega a le Malo. Ma lou faaaloalo lava.

**FOFOGA FETALAI:** Se i tulai mai le isi sui usufono faauilavea, sui o Faleata saunoa mai



**Tofa Lealailepule Rimoni Aiafi:** Faafetai atu i le Afioga i le Minisita. Sa taua foi i lau lauga nisi o Faalapotopotoga ia a le Malo Public Trading Bodies ia e aumaia fesoasoani i le stimulus package. E toatele lava nai SOEs ia e aumai a latou fesoasoani ma o le a aafia ai a latou polofiti maua. Po o le a le fuafuaga a le MPE? E tatau ona faapafala lea mea i lenei tausaga po o se isi 2 pe 3 tausaga ae fesoasoani i lo tatou malo. Faafetai lava.

**FOFOGA FETALAI:** Malo faafetai. Se i tulai mai le Afioga i le Minisita.

**Afoga Hon LAUTAFI FIO SELAFI PURCELL:** Faafetai i lau Afioga faapea foi le sui usufono, o le tulaga lea i le UTOS e pei o lea na ou fai atu e i ai lava faiga faavae a lo tatou malo. O le UTOS Management o le kamupani lea sa faatuina i lalo o le Companies Act, o la la e faagaioi faa-kamupani ae faafetai i le manatu o le sui usufono. O lea o le a faatonu le Ofisa Sili o le Faalapotopotoga e talatalanoa i le Management a le UTOS po o le a le tulaga i a latou fees ia e charge, le iloa pe o i ina lea e ala ai ona tele tupe e alu fua i ai, ae ua talia le fautuaga se i toe tilotilo i ai. Pei ona ou fai atu o tatou e mulimuli lava i faiga faavae o lo o faagaioi uma ai tulafono ma faalapotopotoga nei tau fefaatauaiga.

O le mataupu lea na tulai mai ai le sui usufono lea o Faleata, se ua leva foi ona mafaufau foi i ai, e le o po se lilo pei lava o isi foi faalapotopotoga. A fai lava galuega na fuafua, ae fai atu ua le fetai foi fuafuaga ma tupe maua o i ina e avanoa lava le ofisa e oo atu i ai e talanoa ma fai le solvency test ona iloa ai lea pe tatau ona totogi se tatou dividend i lenei tausaga pe leai. E fetuunai lava e le Matagaluega a le MPE ma le MOF ia ma Matagaluega taitasi. E le o po se lilo o pisinisi, o le taimi ua lelei o le taimi foi ua faaletonu. Ona fuafua lea i ai le mafai ona tali mai i se dividend pe leai. Faapena foi la le mataupu lea ua laga mai, ia atonu e i ai se fautuaga foi e tuu mai i le Matagaluega e ave foi le Kapeneta i le tulaga e pei ona saunoa i ai le sui usufono.

**Tofa Olo Fiti Afoa Vaai:** Lau Afioga i le Fofoga Fetalai..

**FOFOGA FETALAI:** Lau Afioga se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le tulaga lea e faagaioi ai ia faalapotopotoga nei kamupani, pei o le isi lea luitau, manatua foi o le tasi lea o faavae e aofia ai le malo. E mafua ai le Privatization Policy ona o le tulaga foi lea e fai ma tau faiga teisi i latou Kamupani a le Malo faatusa i kamupani i tua. O le mulimulitai la o i latou nei e le MPE, tasi lenei o auala e uunaia ai faalapotopotoga nei ina ia mafaufau ma faagaioi faa-pisinisi. Ae a maua ni tupe maua ona faasee mai lea i le Matagaluega o le Tupe e faatupe ai le tatou paketi. Aua o faalapotopotoga ia po o kamupani e narrow lava le mea o la e agai i ai

ana galuega fai e oo foi i la i le Board of Directors lea e i ai. E leai lava se vaai lautele i le tulaga o le malo ma le tulaga e manaomia ai tupe e faasafua mai i le lautele o galuega ia e fai a le malo. O lona uiga la o le mataala o le MPE o se tasi lena o auala e push, push, push i taimi uma ia faalapotopotoga nei e galue faa-pisinisi. Manatua foi o le mafuaaga lea lau Afioga o lea na fai ai le mea lea o le privatization policy. Leaga a le uunaia, o le mea lena e i ai e alu alu lava leai se vaai i tua atu o le mea e tataua ona vaai i ai, aemaise le manaomia e le malo o tupe nei faasili e aumai e faagaioioi ai mea ia tou te talosaga mai ai. E pei e i ai lava le mea ou te popole pe o le malo o se malo o la e tafe mai ai tupe. Tau tupu ai le agaga lea aua le avea i o, aua le avea i o, ae faapefea ona faatupe galuega ia a le malo? Lau Afioga i le Fofoga Fetalai o le mea lena ia outou manatua i taimi uma. O le fesoasoani atu lena lau Afioga i le Fofoga Fetalai.

**FOFOGA FETALAI:** Se i tuu atu lava le avanoa i le sui mai Salega. Atonu e le umi se mea o fia saunoa....

**Tofa Olo Fiti Afoa Vaai:** E ese foi si au mataupu lau Afioga i le Fofoga Fetalai. Faafetai atu i le Afioga i le Minisita, ua manino mai le vaega lea o le fetuunaiga o mea ia e pei o dividends i SOEs fua i le taimi lenei. O si au talosaga ona e eseese SOEs, o isi SOEs e mafai lava ona operate i le taimi lenei. Ae a fua tatou i le aufaigaluega a le malaevaalele ma se vaega o le Shipping. Pe e le o i ai se fesoasoani e tauala atu i i se tulaga e sefe mai tagata faigaluega lea o le a lay off i le tulaga o latou totogi. Manatua foi o nai nei tagata faigaluega o lea e faamoemoe i ai aiga i mea uma nei. Pei o si ou tulai atu lena ma le faaaloalo lau Afioga.

**FOFOGA FETALAI:** Se i tulai mai le Minisita.

**Afioga Hon LAUTAFI FIO SELAFI PURCELL:** Faafetai i lau Afioga, faafetai foi i sui usufono mamalu, faafetai foi i le Afioga i le Palemia mo le faamalamalamaina atili o tulaga ia. O le tulaga lena sa tau oo atu i ai se manatu. Ia a le totogiina mai la i i ae faapefea isi mea o lea foi e faamoemoe foi i ai le Matagaluega o Tupe. O taumafaiga na a si Matagaluega lea e uunai mai, faagaioioi mai a tatou pisinisi ia. O pisinisi e pei na ou fai atu, na fai ia run e pei o se pisinisi. Afai la e i ai ni mea foi ia e tuu lava i ai Komiti Faatonu e i ai tomai i le faiga o pisinisi. E le faigofie, e le faapea e sau lava soo se tagata, e matuai fai lelelele sailiiliga i tomai e tuu i pisinisi nei a le malo ina ia ola pea ia le manatu ia atinae le pisinisi, maua tupe e faatino ai galuega a lo tatou malo. E le faapea o ni tupe e aumai toe ave i fea, e toe alu lava i ai i i. O le tulaga lea na tulai mai ai le sui usufono, ia taatia mai o la e tilotilo i ai le Matagaluega ia ma aumai le latou lipoti, po o a ni a latou galuega o lo o fai ina ia aua ai ne i lay off tagata. O le naunautaiga o le malo ia aua ne i ai ni tagata e leai ni galuega. A ia manatua foi o le taimi lenei, o taimi o faalavelave faafuasei e faigata ia ona fuafua o le a oso mai se mea faapea.

A tilotilo i na foi atunuu ua ova miliona ma miliona tagata ua leai ni galuega. Aua tatou te faapea e sao mai tatou i le tulaga lena, pau le mea o le tapenapena po o a ni tulaga e faaitiitia ai le faamaloloina o tagata. O lea foi e i ai le fesoasoani a le tatou stimulus package lena e fai i tulaga faapena. Ae taatia mai seia oo mai ni a latou Matagaluega ia po o le a se fuafuaga lautele a le malo e fai i ai. Lau Afioga i le Fofoga Fetalai, lea na taua e le Afioga i le Palemia le mea lea o le privatization. O lea lava foi e faagaoioi e le Matagaluega lea, lea foi e faagaoioi nei lava le isi foi kamupani ua tataua ona faamatuu atu i tua. O lea e i ai le isi vaega lea, o le mea mulimuli lava lea sa fai o le Agriculture Store lea sa faamatuu atu i tua, o lea ua alu lava i le atoa le agriculture store ia i le faapisinisi o la ua ola i le faapisinisi. O le mea foi lena e i ai isi Matagaluega a le malo, e oo atu foi i nisi o pisinisi, e leai se mea e tauave ai e le malo ae faamatuu atu i tua i le private sector o lo o i ai le tomai e galueaina ai tulaga faapisinisi ua le mafai ona faatino lelei i le taimi lenei, po o a lava tulaga ua le mafai ai. Lau Afioga i le Fofoga Fetalai, ona ou see mai lea i le tatou vaalele. E muamua lava ona molimoli atu le faafetai ma le faamalo i le maota nei i le tulaga i lo outou lagolagoina pea o lenei atinae a lo tatou malo. O se atinae ua matuai aafia lava i le taimi nei ma le tulaga o i ai, a o le atinae foi o lo o aofia ai le lalolagi atoa. O le matua o la tatou atinae lenei ua 2 ma le afa tausaga. E le i ai lava se mafaufau e oo mai i le taimi lenei, 2 ma le afa tausaga ua maua ni tupe mama a le vaalele. Leaga o le industry e matuai faigata ona faaoso ma alu loa i le tulaga e oo mai i le 2 tausaga po o le 3 tausaga ua i ai ni a tatou tupe mama, tupe lea bottom line pe a fua e nisi. O le aoga po o le le aoga o le atinae lenei, ona o lea ua 2 ma le afa tausaga e lei maua lava se tatou vaalele, a tatou lava ia. Po o le 2 ma le afa tausaga e le i ai lava ni tupe mama. O le tali moni lau Afioga, ou te le iloa i ni kamupani vaalele faapea e tasi se latou vaalele e 5 tausaga ua maua se tupe mama. O le atinae e taugata ae matuai faigata ona oo i se tulaga e vave ai ona maua ai ni tupe mama. Ae a o tatou tilotilo i le vaaiga lautele, o iina la e iloa ai pe aoga le atinae lenei pe leai mo le atinaeina o Samoa. O lea o le a 3 nei a tatou vaalele ua lisi i le vaalele lea o le a taunuu mai. Ma o lea ua fai uma feutanaiga, e oo atu pei o le faaiuga o le masina fou po o le amataga foi o Aokuso ua aumai le tatou vaalele. Pe afai lena e oo atu i ai ua tatala femalagaiga i nuu foi o lo o i ai le vaalele o lo o i o i Europa pe mafai ona aumai pe leai. O lea foi tatou te tilotilo lava i tulaga o lo o i ai le tapuni ma le tatala o a tatou maketi lata mai lea e faamoemoe lava i ai la tatou vaalele, Niu Sila, Ausetalia, tilotilo atu foi i isi atunuu o le Pasefika ma le faamoemoe i luma atu po o le malaga i Hawaii. A o lea la ua tupu mai le faaaitaui lea o le a toe galulue la tatou kamupani i ni auala e mafai ai ona mitigate ia ni tulaga o le tau o le vaalele pe afai e oo atu i le taimi lena o la lava e tapunipuni. Pei ona ou fai atu, e le i mafaufauina e tupu le faamai, ae o lo o faatalatalanoa i le taimi nei nisi auala i le lau mai o freight ma avatu a tatou tagata feoai i o, po o le turisi pe fai si tuai ona aumai, ae tatou faamoemoe foi i o tatou tagata ma le tatou aufaipisinisi e faaoga tatou vaalele pe a oo atu i le taimi e aumai ai. O le tau o le tatou vaalele e

taugofie atu i lo o vaalele muamua. O le mea lea sa faigata ai le suega. Faafea mai, ia o la ua tele vaalele lale ua idle i isi nuu, e le faigofie, it's not as easy as that. Ua fiu e sue se vaalele e fetau lelei ma tatou, ia aua ne i aumaia se vaalele tuai. Aua lona uiga e aumai pe, leaga le afi, e taugofie ae tigaina foi e fai. Aumai se vaalele e aua ne i tatou tigaina ai, aumai se vaalele e mafai ona alu i lalo o tulaga ia o le dry lease, ina ia faigaluega ai o tatou tagata. O le toatele o le tatou aufaigaluega a le tatou vaalele ua faamalolo seia i ai se taimi, o i latou lava ia ua pau sao lava i ai le ulu o le samala, o nisi o lo o faigaluega ae afa o latou totogi, o le naunau lava ia aua ne i motusia le tatou auaunaga ma tatou galuega i le faatinoga o le tatou vaalele. O lo o i ai nai malaga ia i Tutuila, lea e faigaluega ai nisi o tatou tagata o le tatou vaalele, a o le tulaga lena ua toatele lava ua malolo seia toe taunuu mai le tatou vaalele ona toe aami mai lea. Ae i le tilotilo lava i le tatou vaalele lea ua i ai nei, o le vaalele lava lea e sili atu ona taugofie mo tatou, e maua ai se tatou tupe maua ise taimi puupuu i luma. E fai lava si taugata o vaalele ia sa tatou lisiina. E 4 ni mea tetele lava lea na aafia ai lava tatou, aafia i le aafiaga e matua tigaina ai. O le tapunia lea o femalagaiga a le vaalele lea o le Boeing Max, toaititi, ua uma ona vali le tatou vaalele o le a sau ae oso loa ma le mea lea, taofi ai loa i o. A ua alu lena o le vaalele lea sa ia tatou muamua o la e foi ua manaomia mai e Italia ia, sau, ua leai ni tatou vaalele ua grounded uma Boeing. Ia alu loa ae meme ai tatou. Ia, na taumafai lava lea o le Malo ia sue se vaalele e faaauau ai le tatou auaunaga, aua le momoo i le mea foi lea we live our people high and dry, a. Fai pea, lea na tatou o ai aumai le Melindo, e aumai le Melindo, e fai lava si taugata o le lisi ae sa taumafai lava ina ia faagaoioi pea le tatou vaalele ma lau mai pea tagata i totonu o Samoa, o turisi, tatou tagata feoai. O le aoga lena o le vaalele sa mafaufau i ai i le taimi na fai ai le faaiuga mo lenei atinae. Ia faigofie ona femalagaai o tatou tagata aua e taugofie le pasese. Ia tele turisi e omai, ia mafai e o tatou tagata ona feoai, o atu i o omai. O le uiga lena, o le fesoasoani lena i o tatou tagata. E le faapea foi lea tatou te mananao ia tatou tutusa ma isi vaalele, aua o lona uiga e leai la se uiga na fai ai le tatou vaalele, ae sa taumafai lava ina ia affordable, ae tuu ifo foi i se isi tulaga ia i ai lava sina mea mama e totogi ai expenses a le vaalele, o lea na faaauau ai.

O le lona 2 o le oso o mu tetele ia na mu i Ausetalia, na aafia lava le gasolo mai o tagata ma le o atu o tagata i Ausetalia, tatou malaga foi lea e alu i Ausetalia e 3 malaga i le vaiaso, tasi lena aafiaga tele. Sosoo mai ma le misela ua leai ni tagata e fia omai i Samoa. O tulaga uma ia na aafia ai le tatou industry lea, oso mai loa ma le tama tele lea ia o lena tou te silafia aafiaga o le lalolagi ua i ai. O vaalele tetele uma ia ma kamupani vaalele, e leai, leai lava se kamupani pei lava na o le QATAR AIR le kamupani la e lava e alu latou, ia aua o latou ia e tele le tupe. E tele le tupe. A o isi uma kamupani, e oo i le vaalele a Fiti, Air New Zealand, Emirates, o a uma vaalele tetele, o lena ua matua vaea tai afe ma afe tagata e le faigaluega, ua fuafua lava e latou e tasi vaetolu le latou pisinisi o le a i ai, talu ai le mea lea po o le laitiiti ifo foi. So, o aafiaga la o le

Aviation Industry i le faamai, o se matua... it's a global lea tatou te iloa o le global, a o lea lava e taumafai tatou ia i ai se tatou vaalele, ia aua ne i toe oo tatou i tulaga ia sa tatou i ai, alu atu i o foi mai ae fai mai e \$4,000 le pasese. O ai e mafaia nei ituaiga mea? Ae a na le faia le tatou vaalele, e le pau foi vaalele a le tatou competition. Lea lava ua mafaufau foi ia fai se tatou paaga ma isi vaalele ia pe a toe oo i le taimi e toe feoai ai tagata e pei o le Qantas, ia o le Air New Zealand foi. E moni lava o le tatou competition, ae i ai lava ni avanoa e mafai ona tatou galulue faatasi, e faapena foi i Fiti o lea e faaauau le tatou feutagaiga mo se tatou group share ma Fiti. O le pona foi o le mea lenei, e le faapea na ona fai mai lava, ia fai le tatou paaga fai loa, e tataua ona sui uma tatou system i systems e mafai ai ona faatino mea nei, e le taugofie la. O systems ia e faaoga e kamupani vaalele tetele nei, e tai miliona ma miliona le tau. E le gafatia e tatou. O lea tatou te taumafai lava i le system e mafai ai ona fai tatou mea, without breaking the bank. Lea la e i ai le system lea o le Radix, lea e tau foi e upgrade le version o le radix tatou te galulue ai ma Fiti, ona mafai ai lea ona fai atu mea iinei ae oso i masini foi a Fiti latou, e faapena foi ma isi atunuu. E taugata la systems nei e le afford ina e tatou, ae tatou te taumafai i le system taugofie lava lea e i ai e mafai ona tatou afford ina, it's not too big ae te i ua fai ifo e le work, e le mafai ona tatou afford ina ma tulaga faapena. Ae o lo o taumafai ina ia fai ni a tatou faiga faapaaga ma nisi vaalele.

O lea foi sa atagia i le saunoaga a le Palemia, o lo o tilotilo foi i ni auala e fai ai ni share a le private sector i tagata, ua leva ona talanoa foi le mea lenei, e le o se mea faapea faatoa mafaufau i ai. Ua leva ona mafaufau i ai ae se i tau stabilize le tatou vaalele ia ona draw mai foi lea o tagata e fia invest i totonu, e tele tagata o lo o enquire mai e fia invest pe i ai ni avanoa o ni share. Ia o le taimi lenei na fai i ai, e le o i ai se manatu i ai i le taimi lenei, o la e mafaufau i ai, ae i ai se taimi faatino. Ia, a o tulaga uma lava ina ia tulai mai le tatou atinae. O lo o mafaufau lava ina ia atinae atili le tatou vaalele lea o le Samoa Airways, le tatou vaalele e alu i Fiti, o le region a tatou aua o le mea lenei, o lea e omai vaalele mai le Air New Zealand ma... omai talau tagata o le tatou region, a o la e nofonono tatou ma isi nuu lea e i ai foi latou vaalele, ae pei o la e fao e vaalele tetele nei tagata o le region ae le tuu mai i vaalele lava a atunuu latou o le tatou Pasefika.

Lau Afioga, i le tilotilo mamao la ma le tilotilo lautele i le aoga o le tatou vaalele, e pei o lea na ou fai atu, a tilotilo lava faapea o le aoga o le vaalele e determine mai lava i le bottom line i tausaga uma, e le i taitai la ona oo i se taimi e faafiafia ai se isi i le aoga po o le lea o le vaalele pe afai o le fuaga lenei. Ae o lea e ia te au nei faamaumauga na tuu mai, o se suesuega po o se exercise na fai e le Matagaluga o Turisi i Niu Sila mo le tatou Tourism Industry. Lea la e sau ai i i le latou faagaioiga, le latou calculation o tupe faaalu a tagata pe a omai i Samoa nei e fua la i le 5 aso average, fua i le tupe na taunuu mai tagata faaoga le duty free, le tupe na omai faaoga i inei, o le average e 5 aso, lea la e maua ai le tupe lea. O le tupe a le tagata i le 5 aso i inei i Samoa, tusa e \$2,800 tala

Samoa. A fuafua la i tagata na lau mai e le Samoa Airways i le 2019, e 92,395, o tagata na na lau mai e le Samoa Airways i le 2019. O le 37% lena o tagata uma lava na omai i Samoa, e sili atu lava le Samoa Airways i lo se isi vaalele. O le tu 2 o le Air New Zealand e \$81,000 tagata po o le 32%. A fuafua la i le tupe lea e fai mai le survey lea, o le tupe a le tagata toatasi e \$2,800 i le 5 aso. A fua la i le \$99,395 tagata lea na aumai e le Samoa Airways, o le aoga o le tupe o le tatou vaalele i le aumaiga o tupe i le atunuu, e \$187 miliona na aumai e le Samoa Airways mo le economy o Samoa. O i ina la lea ou te tilotilo au i ai i le aoga po o le le aoga o le atinae lea, tagata femalagaai mai ma aumai i totonu o Samoa e faaalu ai a latou tupe. O i ina lea e tatau ona tatou tilotilo i ai. O le tilotilo lena a le Malo lenei taimi. E pei ona ou fai atu, e le i i ai se mafaufau e 2 pe 3 tausaga ua maua se tupe mama. A o isi la mea nei, isi aoga nei. Ae le uma ai i i pei foi ona saunua le Palemia i le tele o mea ia o spin offs, e sau lava mai le faletalimalo e tau lava i le tagata lea e fagota i i, fagota fee i tai i i, le faifaiva lele e alu e fana mai pone ma alogo e faatau i faleaiga, faleoloa ma faletalimalo e fafaga ai tagata ia e omai mai fafo, se i tulou. O manatu na, o mea ia e tutupu, o lea la ua oo i le taimi nei ua leai se vaalele, o lea la ua tatou iloa le aoga o tagata e omai totonu, lea ua tatou iloa, o lea ua oo lava i Matgaluega a le Malo, aua a leai ni tagata, e leai foi la se mea e ki ai moli, ua le faaaogaina foi la le EPC ia, ua alu i lalo le latou tupe, ua alu i lalo le faaaogaina, faapena foi le vai. So, I think e tatau lava ona tilotilo auiliili i ai ma manatu i le manatu lautele ina ia tatou iloa uma aiaiga uma o aoga o tatou atinae nei. Atonu e foliga mai e le o maua se tupe, ae i ai aoga tetele la ia i lona aotelega, lea ou te faamalamalama atua, ae o lau talosaga, ia lava pea lo outou faatuatua i faaiuga ua fai e le tatou Malo. E i ai le upu foi lele, e toe oso foi malama, ona toe foi lava lea o le lalolagi i le mea sa i ai, ia, a ia tatou taumafai i le taimi lenei tatou te onosai ma sue auala tatou te... let's get pass this, we will go through it, tatou te maua le malu ae o le faiga o le lalolagi ua i ai nei, e le na o tatou o aafia, ua aafia uma lava le lalolagi, a ia lava le tatou onosai ma tatou faamoemoe pea i le Atua ia vave ona faatea ese lenei mala, ae toe aumai manu i le lalolagi, aemaise foi si o tatou atunuu.

Lau Afioga i le Fofoga Fetalai... E a o le TV bingo lena o le a e talanoa ai?

**Afioga Afoa Amituanai Faleulu Maui:** Lau Afioga i le Fofoga Fetalai, pe maua sina avanoa...

**FOFOGA FETALAI:** Ia, tulai mai le sui usufono mo Palauli Sisifo.

**Afioga Afoa Amituanai Faleulu Maui:** Faafetai i lau Afioga. E fia momoli atu lau faafetai i le Afioga i le Minisita lea le afioga ia Lautafi. A lailoa lava lau Afioga e tau faamalamalama, ua malamalama uma le atunuu i tulaga o faafitauli lea e i ai le tatou vaalele. Na pau o le mea, e taua lava le faatuatua, e sao lelei, a lava le tatou faatuatua le tatou Malo, ua tatau ona lifi uma i luga ia lockdown lea e i ai, lifi uma i luga mea ia

e i ai, ae ia tatou focus i le tatalaga o le tatou border, fetuunaiga o tatou ma Niu Sila, o Ausetalia ma Fiti, ua lava ma totoe atunuu na. A vave ona faatino tatalaga o tatou borders...

**FOFOGA FETALAI:** Se o le faalavelave lea o ta mea e foliga e malu ae ivia foi lea. O lea na amata i le faafetai, ae le talia foi ni faafetai i ni faasao. Ioe, a o lea ua e toe oso lava i le tulaga lea sa e saunoa muamua ai.

**Afioga Afoa Amituanai Faleulu Maui:** Ia, toe tasi lava e fia faamalamalama i le tulaga lea i le...

**FOFOGA FETALAI:** Se matua e faamisa tele. Se malie ia...

**Afioga Afoa Amituanai Faleulu Maui:** Ia o lea o le a faauma atu lau Afioga pe a e finagalo i ai.

**FOFOGA FETALAI:** E leai ou te le finagalo i ai e faauma mai lena mea sese. O lou finagalo ae alaala i lalo le sui usufono. Ia, faafetai. Ia se i tulai mai e faauma mai loa le saunoaga i lau Afioga.

**Afioga Hon LAUTAFI FIO SELAFI PURCELL:** Na tulai mai loa lou uso lea mai Palauli, ou mafaufau loa i le TV bingo, faapea, ai foi a... ae faafetai mo fautuaga lau Afioga i le sui usufono mamalu.

Sa taua le faaauau o tatou faigamalaga i Maota, o lea sa saunoa atu foi le Minisita mo Galuega, o la e lelei le malaevaalele, faafetai foi i le Matagaluega e ui lava e le i i ai, ae o la e lava e faaauau le faaleleiga. O lea foi ua talanoa le tatou Matagaluega o le tatou Vaalele ma i latou o le aufaipisini e taumafai e fai se tulaga foi lea, settle ni vaa ni flights i aso faapitoa ina ia mautinoa e profitable, e lava le tupe maua. Aua foi tatou te o faapea na o le alu lava ma sau alu ma sau, ae tilotilo i se faiga ia maua tupe ia sikuea le alu, sikuea le sau. O tagata lava ia o le aufaipisini a Savaii. Pei o latou na e fia lele mai toe lele i o sau faigaluega i inei, malaga i Savaii i le faaiuga o le vaiaso, e faapena foi i latou o lo o galulue i Savaii, e galulue i Savaii i le vaiaso ae felele mai i le aso Faraile, a o la ua oo i ai le fuafuaga a le tatou Matagaluega. Ae faafetai atu i sui usufono mamalu foi sa saunoa i le vaega lea. O le mea ua ta fia tietie foi i se vaalele i Savaii, ua leva foi e le i toe... maua ma si ou uso ia Faumuina, tau lava ina ma tietie atu ai ona pue mai lea o le vaaalalo e sau ai.

Ia, lau Afioga i le Fofoga Fetalai, toe tasi si au Matagaluega lea e le i oo i ai sau faamatalaga o le Matagaluega o tatou Fale ma Malae Taalo, faapea foi taaloga tau tupe. Ia o lo o taumafai lava foi le latou pitolaau, e faigata foi le maintain ina ma le taumafai pea ia lelei tatou fale taalo. A o lea lava e molimau le atunuu, e oo lava i le taimi e fia o atu ai e faaoga, a o la e lelei lava le vaaiga o le Matagaluega o tatou aseta tetele na ma le fesoasoani mai foi a nai tatou paaga mai Saina, ia o lea lava e lelei le faiga o tatou fale aau, aua e faigata ona maua i inei na ituaiga, e se tagata

tomai. Ia a o lo o maua tatou fesoasoani mai Saina ua matua masani ai lava le Ofisa Sili lea o le SSFA, ua iloa foi faa-Saina. E talanoa lava faa-Saina ma le konekarate lea mai Saina. O isi taimi ou te talanoa faa-Samoa atu i ai ae faa-Saina mai le Ofisa Sili ia te au...

Lau Afioga i le Fofoga Fetalai, ua maea ai i i...

**Tofa Olo Fiti Afoa Vaai:** Lau Afioga i le Fofoga Fetalai, leaga o lea ua saunoa leaga o mea sao ma mea e fai i totonu o le tatou Palemene, ae manaia lava ae sue mai le Ofisa Sili e fai mai sana faa-Saina pe moni, po o lea e tuu mai luga i i.

**FOFOGA FETALAI:** Ia, malie ia lau Afioga i le Minisita, aua e te amanaia...

**Afioga Hon LAUTAFI FIO SELAFI PURCELL:** Se lenei tama se matua... Leaga o le faa-Saina a lau Ofisa Sili, na o au lava e malamalama ai, e le mafai ona malamalama ai se isi, ioe, leaga o le faa-Saina a Lufilufi e te le malamalama ai.

Ia, lau Afioga, o le a se i ou oo atu i si ou itumalo. Ae ou te le i oo atu i lou itumalo, e momoli atu lau faafetai i Ofisa Sili o Pulega o Matagaluega o lo o ou vaaia i le taimi nei, faamalo i lo outou onosai, faamalo foi i lo outou galulue i le taumafaiga o tatou Matagaluega uma, ia taui atu e le Atua lo outou faamaoni. A i ai foi se taim ua tau tetele atu le Minisita, ia o le faiga lava o tatou mea. Ae faamalo atu ia te outou i lo outou galulue ma le punouai aua le atinaeina o Samoa.

Ia, ona ou oo atu lea i lou itumalo lau Afioga i le Fofoga Fetalai. Lou itumalo pele o Satupaitea, ia, o le susu lava lea o Asiata o oe o le Vaimalae e falefa i ai Tumua ae ono i ai Pule, susu foi le Aiga o Samoeleoi ia Gasū ma Tavui, afifio alo o Lilomaiava ia Faanana ma Tuimaseve, afifio Tapaufanua Sa Valomua ma le suafa o le Fauatea. Afifio Tapaau, alaatai oe le ituaiga o le Alataua, Tapaulefano, Nofo a Pule ma le Matuafia. Tainane le tapuaiga a faletua ma tausii, saoa ma tamaitai, le malosi o le tatou nuu. Ua le galo foi le tapuaiga mamalu i auauna a le Atua i totonu o le tatou itumalo, ua faamalo le tapuai.

E faatalofa atu i tina matutua uma lava ma tama matutua o le tatou itumalo o mafai ona faafogafoga mai i lenei itula. E faafetai faapitoa atu lava i si ou tina ia Nasoa, e le taumate foi lava o la e lau lana rosalia ma faalogologo mai, faafetai i lo outou tatalo leleoa a o alo lo outou sui usufono e galue mo le tatou itumalo. O le galuega a le sui usufono na fai lava i le mea e gata ai le mafai, o tomai ma agavaa na tuuina mai e le Atua. Afai o faamalieina le tatou itumalo, o le mea sili lena. Ae afai e le o faamalieina, pei ona ou fai atu, ua gata le tomai ma le atamai ma le malosi e fai ai mea uma nei. Ae ou te faafetai atu i lo outou taputapuaia mai, e moni o lea ua latalata ina uma foi lenei Paeaiga, ae toe i ai lava isi mau avanoa ou te toe tautala atu ai i le Maota lenei i le tatou itumalo. Ae mo le taimi lenei, ia faamanuia tele le Atua i le tatou itumalo ae ola pea le leo o Lautafi. Faafetai i lau Afioga.



**FOFOGA FETALAI:** Malo faafetai. Ia, e i ai le manatu o lea ua oo mai le faasologa i le paia o le Kapeneta i lau Afioga i le Sui Palemia. Ou te tapa ma le faaaloalo lau Afioga i le Sui Palemia.

**Afioga Hon FIAME NAOMI MATAAFA:** Lau Afioga i le Fofoga Fetalai ma le paia o le Maota Fono o Samoa, tainane foi le tapuai mai o le atunuu i lenei afiafi. Ia ua mavae atu malama analeila, ua ufitia tatou i le pogisa o le fuafuaga ma foafoaga o le aso, ia ua oo i le taimi o malologa a o lenei lava tatou te faapenei.

Ma o lea ou te faapai atu ai i le agaga faaaloalo i lau Afioga i le Fofoga Fetalai i so matou va lelei foi ma le Afioga i le Palemia ma Minisita o le Kapeneta faapea foi Minisita Lagolago. Afifio mai lena Itu o le Malu i a outou Afioga i Taitaifono faapea sui usufono mamalu o le Palemene. Ua tatou faatasi foi i lenei afiafi ma Ofisa Sili o Pulega o Matagaluega ma Faalapotopotoga a le Malo, aemaise foi le Failautusi o le Fono ma le Matagaluega o lo o faia le tautua ma le auunaga aua le galuega a le Fonousu a Samoa.

Ou te faatalofa atu i lenei itula o le afiafi, ma ou te manatu foi ua vela le fala ua alu le aso analeila o lea foi o lo o faaauau le tatou galuega. Ma ou te manatu lau Afioga i le Fofoga Fetalai, o le a agatonu loa le tautalaga i le auga o le galuega e pei foi sa saunoa i ai Afioga i Minisita o le Kapeneta i le talifuaitau i le tatou felafolafoaiga i le Tala o le Tupe ua faapea ona taatia i luga o le Laulau a Fono.

Lau Afioga i le Fofoga Fetalai, e le tele naua ni mataupu sa saunoa mai ai sui usufono i Matagaluega o lo o ou tauaveina. E lilifa lava finagalo na faaalua ma saunoaga i le aafiaga o le suiga o le tau, ma e i le agaga lava o le talifuaitau i le tulaga aoao i faiga faavae a le Malo, e ao ona ou faapea atu lau Afioga i le Fofoga Fetalai, o le vaaiga po o le faiga faavae a le Malo i le suiga o le tau, e faapea ona faasalafa i vaega eseese o le Malo i le nofo a Matagaluega ma Faalapotopotoga. E pei ona silafia e lau Afioga ma le mamalu o le Fono, e le faapea o i ai se Matagaluega o tau o le Matagaluega o le suiga o le tau, ae ua faapena ona i ai le vaaiga a le Malo, e oo atu lava aafiaga o le suiga o le tau i vaega eseese o le soifua o tagata, ma e faapena foi la le tali atu a le Malo i le nofo a Matagaluega.

Lau Afioga i le Fofoga Fetalai, e lua lava gaoioiga e faia mo le suiga o le tau. 1. O le taumafaiga e faaitiitia le faatupulaia o kasa leaga o lo o faapea ona vevela ai le lalolagi ma faapena ona usi ai pole i matu ma saute ma ua siitia ai le tai ma lofia ai nisi o atunuu, aemaise foi atunuu tumotu e pei ona i ai le tatou itulagi i le Pasefika. E faapena foi ona faatupu ai nisi o faalavelave faalenatura ua masani ai foi tatou e pei o afa, timuga ma lologa. Ia, sa i ai le taimi a o lo o taoto pea uiga o le tau i se taotoga foi lea e faatulaga lelei, ae peitai o le mea lea ua oo i ai le kelope ma le tatou molimauiina o le suiga o le tau. Ua ese lava uiga ua faaalua, ua faateteleina faalavelave faalenatura, ua siitia foi le malosia o lo o luita ai le tatou siosiomaga.

O le gaioioiga la a le Malo ia pei o le upu lea faapapalagi o le mitigation o lo o ave le tatou faamuamua i le itu tumaoti lea o le malosiaga po o le energy. Ma o lo o faapea ona agaga faatasi le Pasefika i ana ia foi taumafaiga mo le faaitiitia o emissions ma isi foi atumotu o le Pasefika, ma ua ave le faamuamua i le sector lea le vaega o malosiaga. I le see ese mai i le malosiaga e faamoemoe i le suauu, ae tatou see atu i le malosiaga e maua mai i le toe faafouina e pei ona i ai le tatou solar lea ua i ai, faapea ona i ai le eletise o lo o maua mai i le savili. O lea foi sa saunoa le afioga i le Minisita o lo o nafa ma le STEC, o lea foi ua amata le isi poloketi i le malosiaga e maua i le susunuina lea o laau. E malie lava i lau Afioga i le Fofoga Fetalai ma le tatou Fonotaga, sa tatou talanoa i le tamaoiga ma le itu faapea e vaeane foi le tatou afiafi. Aua le tuua uma a tatou fuamoa i le ato e tasi. E i ai foi le vaaiga lea i le itu tau malosiaga, ina ia le ta tasia le mea tatou te faamoemoe i ai e maua mai ai le tatou malosiaga. O le ala lea ua eseese ai ia fuafuaga e saili mai i ai le malosiaga faafouina. E pei ua pau ia te au le tatou poloketi tele foi lea ua leva ona i ai, i le eletise e maua mai i le suavai, tatou hydros ma o le taua foi o le eseese o auala e maua mai ai le malosiaga faafouina, aua a le susulu le la e faapena ona afaina. A tele le la matutu le suavai, ua faapena foi. A pe foi le savili, ua le ola a tatou peapea tetele lea e i o i le atu Aleipata. E pei o se faamatalaga lena i lau Afioga e faamalamalama ai le taumafaiga lea e ave i ai le faamuamua a Samoa, ma tatou uma lava i le Pasefika i le vaega lea o le energy. E pei la o le itu o galuega faatino e tali atu i suiga o le tau, o lea e pei e lilifa i ai saunoaga a sui usufono, i le tulaga nei i o tatou taligalu, o talivai, o tatou auala sola, po o auala galue foi, faapea le totoina o laau. E le gata i le laueleele, ae faapea foi i le gataifale e pei ona i ai a tatou togatogo.

Ou te tautala ma le faaaloalo i le aotelega, ole tali atu a le Malo i itu ia o galuega faatino. Ma sa saunoa le Afioga i le Minisita o le Matagaluega o Tina ma Tamaitai, i fuafuaga faataatitia a le latou Matagaluega, e pei e faavae lea i luga o itumalo, ae pei e lilifa le auga o le tapenaga a le Matagaluega lea, agai i pulega lelei, o atinae ma isi tulaga i totonu o nuu ma afioaga. Ma e faapea foi le tapenaga sa taimua ai le Matagaluega lenei, ae faapitoa lea mo fuafuaga faataatitia mo itumalo uma, e amata mai i le tuasivi e agai atu i le gataifale. O fuafuaga faataatitia i galuega faatino po o galuega manaomia, aemaise lava mo le tali atu i suiga o le tau. Ma o lau Afioga i le Fofoga Fetalai, ua uma ona fai fuafuaga nei mo itumalo uma o le tatou atunuu. Ma e 2 ni poloketi o lo o faapena ona lagolagoina ia fuafuaga nei faataatitia. O le poloketi mai le faletupe o le lalolagi e tau o le Adaptation Fund e tusa lea ma le \$8.5 miliona. Ma na tuuina mai mo tausaga e amata mai i le 2012 seia oo atu i le 2019. O le isi poloketi o lo o taua o le Climate Resilience Coastal Resources and Community po o le PPCR. Ma o lena foi poloketi, e \$16.6 miliona, e faagasolo lona faatinoga mai le tausaga 2013 seia oo mai i le tausaga lenei. Lau Afioga i le Fofoga Fetalai ma le mamalu o le Palemene, i fuafuaga faataatitia ia ua uma ona tapena mo galuega faatino ia i le tali atu i suiga o le tau. E fai o a tatou tupe ia e maua mai ia tatou poloketi

ma fesoasoani mai a tatou paaga, ae o lo o i ai foi i totonu i ina tatou tupe faigaluega mai lea Tala o le tupe seia oo atu i lea Tala o le tupe. Ma e avea foi fuafuaga nei, po o fuafuaga mo le tali atu i suiga o le tau, pe i o fuafuaga ia sa saunoa i ai le Minisita o tina ma tamaitai. A o faavae ia, e fuafua i ai le Malo i ana galuega faatino. Ma e pei ona ou faamalamalama atu, e faasalafa le vaaiga a le Malo i galuega ma gaoioiga i le tali atu i suiga o le tau. E faapena foi la le faasalafa atu o tupe nei i Matagaluega eseese e faapena ona faatino ai a tatou galuega. O le tele lava o Matagaluega e pei ona afifio atu ia Minisita nei ma a latou Matagaluega e faapena ona faaogaina ai a latou tupe ma tatou fuafuaga ia ua faataatitia.

E pei la lau Afioga i le Fofoga Fetalai, e pei o se faamatalaga po o se oototoga foi lea i le tulaga aoatetele i Faiga Faavae a le Malo ma nisi o seleni ua faapena ona faaagaga e fai ai galuega mai lea tausaga ma lea tausaga. E pei ona maua mai, e pei o poloketi ia sa faamalamalama atu i le 2012 i le 2019, 2013 seia oo mai i le 2020. O lona uiga e au tausaga le faasologa o tatou Polokalame ia. Lau Afioga i le Fofoga Fetalai, o se tasi lava o gaoioiga e pei o lea ua amata ona tapue tele mai i saunoaga a sui usufono, ma gaoioiga foi o lo o faatino o le vaavaai lea i le talafatai i tatou togatogo. E taua tele lea, e le gata i le tautao fiofi o le siisii o le tai, a o togatogo o faatupu eleele ia e faaopoopoina i le tatou talafatai po o tatou coasts.

Ma o se gaoioiga e tataua ona tatou galulue faatasi uma i ai. Malie le saunoaga a le Minisita o Tagata Tafafao Maimoa mai fafo, i lona finagalo faaalua, aemaise lava lenei vaiata ma le luina o tatou ona o aafiaga o le faamai o le Koviti. I le itu foi lea i se vaaiga e pei na o le Malo e tali atu i faafitauli o lo o tulai mai. E auai foi lou taofi i le finagalo faaalua o le Afioga i le Minisita. O taimi nei, e ao lava ona tatou galulue faatasi, e pei la o gaoioiga nei e pei o togatogo, o le totonu o tatou laau. E i ai lava galuega e mafai lava ona faatino e tatou lava ia. E le tau fai atu foi le Malo, o lea o lo o i ai le maopoopoga ma le malosiaga o puleaga a nuu ma afioaga. E faapea ona faatino ai a tatou gaoioiga ia. Ma o se tasi lena o gaoioiga i le tali atu i le suiga o le tau, le puipua mai o le solo atu o le talafatai. E ao lava ona tatou faataua. E pei o iinei le taulaga, o le togatogo i Moataa, e pei o se faataitaiga lea pito i lata mai mo tatou ae o lo o faapena ona faatino ai gaoioiga.

Ona ou oo mai lea lau Afioga i le Fofoga Fetalai, sa i ai nisi mataupu sa laga mai i le itu lea o moli. Sa i ai le poloketi sa faapena ona tufatufaina atu ai moli auala tetele i le atunuu. Aua e pei sa faasalafa atu i tua, sa tufatufa atu i tua aemaise o mea o lo o i ai ia Faletapu, nofoaga faitele ina ia malu puipua ai nofoaga faapea ma maua ai le malamalama. O moli e alu i le la, ma ou te iloa o le fiafia ia o le atunuu i lena poloketi i le tufa atu i tua o moli, o lea o lo o maua o lo o talosaga mai pea a outou afioga. O lea e tau saili po o fea se isi mea e toe faaopoopo ai le tatou poloketi lea, e tele foi lona aoga.

Lau Afioga i le Fofoga Fetalai, o se tasi o mataupu sa laga mai, o uamea foi ia o taavale tuai po o taavale pala. Sa fesiligia po o a ni fuafuaga, o lo

o fai i ai. E fia faamalamalama atu, o le mea muamua ua i ai se Faalapotopotoga ua faia nei e i latou o lo o nafa ma otaota po o le waste, po o a lava tulaga faapea. Ua faia le Faalapotopotoga lea e tuufaatasi ai foi i latou o lo o galulue ai i lea foi galuega taua ma le manaomia. Ae maise o le faamamaina o le tatou siosiomaga. Ma o lo o fai paaga ai ma le matou Matagaluega, ma o le isi foi itu lea ou te manatu e taua i le tatou talatalanoa foi i le tamaoaiga. O le vaega lea o le waste po o otaota ma tulaga faapena. O le isi foi avanoa lea e faatupu ai pisinisi i totonu o le atunuu. E maua ai galuega a tagata ae aoga le auunaga mo tatou uma.

Ae o le tali lava ia mo uamea nei scrap metal, e toa 5 ni Kamupani po o ni Faalapotopotoga o lo o latou tauaveina ia lea gaoioiga. E faapea ona tuufaatasi ma avatu i fafo e faatau atu e toe fai ai foi isi gaoioiga. Ae a tatou talanoa foi i taavale tuai ma taavale malepe, e o faatasi foi ma suauu tuai ma tulaga faapena. O le isi foi vaega lea o lo o i ai foi i latou o faamaopoopoina suauu tiai, ina ia faapena ona faia nisi gaoioiga e toe faamama ai ma toe faaoga po o le aveina atu i fafo ia i latou o lo o i ai a latou pisinisi foi faapitoa e faaoga i ai ia ituaiga otaota tiai.

Lau Afioga i le Fofoga Fetalai, e pei na o le pau ia o nai mea na laga mai e sui usufono i le matou Matagaluega.

**Tofa Lealailepule Rimoni Aiafi:** Lau Afioga i le Fofoga Fetalai

**FOFOGA FETALAI:** O ai a faauilavea i ai, ua maea le saunoaga a le Sui Palemia. Se i aumaia pe mata e taligofie lau faauilavea. Saunoa maia lau Afioga.

**Tofa Lealailepule Rimoni Aiafi:** A e loto lava ou te nofo i lalo ou te nofo ae faafetai. O le tulaga tonu lava lea sa ou tautala ai i le mea lea i tagata ia ma taavale ia. Le auala lea ou te nofo ai i Vaitele, e lua faleinisinia na e i lalo mai. Lau Afioga ua uma ona faaputu i autafa ae ua faaputu i luma. Ua le gata i le mataga, ae ua tele ma faamai e ono tupu mai ai. E sao le afioga i le Minisita i Kamupani ia, ae sa ou talanoa i ai, o le latou tala, e le o toe faia e latou le latou le vaega lea, ua pau maualalo le tau o mea nei. Ua le mafai ona ave. Ae o lau tatalo lea na avatu i le Minisita, pe le mafai ona tagai tatou i se masini foi lea e faaoga e fafo e faatu i se mea i uta i o, e taumafai ona lau atu i ai, ma faalaiti ai ma faigofie ona lau i fafo. Ma le isi vaega mulimuli lea faamolemole, o vilimaa lea e i lalo mai i, o lau vaai o la ua 3 vilimaa la ua i lalo i Vaitele i totonu i le mea ua nofoia e le toatele o tagata. Ou te talitonu ua le toe talafeagai ma lea vaega o le atunuu ia mea, faamolemole lava i lau Afioga faafetai.

**FOFOGA FETALAI:** Mo le faasaoina... e i ai le sui usufono lea mo...sa tulai mai foi toa tasi ae o lea ua toa-lua. Faapuupuu mai.

**Afioga Leana Ronnie Posini:** faafetai tele i lau Afioga i le sui Palemia po o lau Afioga i le Minisita. E manatu o lenei foi itumalo na

amata mai lava i le 2016, o matou lauga i mea ia o taligalu. Ae ou te matau lava i lau afioga e tele lava ina saunoa lau Afioga i le aoatetelega i tulaga o le suiga o le tau aemaise lava i taligalu. Ou te masalo o na e silafia e lau Afioga na agai atu lo matou nuu o Sataoa, e talosaga ia le taligalu lea ua savalivali i le 20+ tausaga e le i maea ona fai, faapea foi lo matou nuu o Saanapu. O la ta ita lea faitau lau Afioga, po o i ai se saililiga a Matagaluega, po o fea e ave i ai le faamuamua i le faiga o mea ia o taligalu. Ma le faaaloalo.

**Tofa Aumua Isaia Lameko:** Lau Afioga i le Fofoga Fetalai, mo le faasaoina o le taimi o le Sui Palemia. Sa ou lauga i le mea lea, o le Water Catchment Area le vai lea e i Saleilua ma le vai lea e i Sapunaoa, i se poloketi a le tatou Matagaluega ina ia faapena ona totoina ai laau mo le tatou Water Catchment Area, ma le agaga faaaloalo.

**Afioga Tafua Maluelue Tafua:** Lau Afioga i le Fofoga Fetalai, pe maua so ta avanoa a ta nofo umi foi ua ta fia moe, vae atu lau Afioga ma le mamalu o le Maota. Se i faasao le taimi o le tamaitai Sui Palemia.

**FOFOGA FETALAI:** Malie ia lau Afioga i le Sui Palemia, saunoa mai Tafua.

**Afioga Tafua Maluelue Tafua:** E ese le manaia o le aotelega o le silasila mamao a le Matagaluega a le Sui Palemia aemaise le Malo, e momoli atu ai le agaga faafetai. E puupuu lava si au mataupu, o le laau foi lea o le togotogo, po o le togo lea e tele foi i Moataa ma i ina i Fagalii i si ou itumalo. A o le togotogo lea e ola i le va o Malaela ma Lotopue, sole e tataa ai malauli. E i ai isi paipa, le vaipaipa lena e alu atu lava le vai, e alu i totonu, a sua le tai ua o mai malauli i totonu, a pe foi le tai ua toe o mai i fafo. Matou te matamata ai lava ma si faifeau lena e i ina e suafa ia Malo, o le manaia ia o le nofoaga. Ua faalua nei ona ou talosaga, pe i ai se fesoasoani a le Matagaluega, e toe toto ai le vaega lea. O lea ua saunoa le Sui Palemia, o le togotogo o lona aoga o le faatupu eleele, e i ai foi ma le isi aoga, o le faamama po o se filter foi lea e faamama ai le sami e tafe i tai. Ae o le talosaga lea ma le faaaloalo. Manuia le Fonotaga.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai, mo le fia faasaoina o le taimi o le Saofaapito. Leaga sa taua foi i le lauga a lenei itumalo ia taligalu. Silasila foi, o le itumalo lenei e tu lata i le sami. E pei o lea e matau atu, e leai lava se agai mai. E pei o le lauga a lenei itumalo, faafetai i le Atua e le o mafai ona i ai ni mala faale-natura, aemaise lava i le nuu lea o Lauili. E pei ona taua o le itumalo lea, a o le nuu lenei o Lauili e leai se aau. A oo foi i le taimi e timuga ai lau Afioga, toetititi lava fati ia galu. Ae o lea e matau sa avatu foi le lauga a lenei itumalo i se taimi, pe le mafai ona aumai tupe i itumalo e faatino ai. Aua o lea e pei e faatiga taliga foi ia outou afioga, avatu pea avatu pea, ae o lea e aumai, e pei e aumai i le aotelega. Ae faafetai i le Atua o lo o

alofagia e le Atua lenei itumalo. E pei o le agaga lena, e avatu ai le talosaga po o le a le tulaga o i ai. E le mafai ona lou itumalo. E pei ona saunoa le Minsita e faatatau i le saunoaga a le Minisita o Turisi, e faapefea ona o e fai e leai ni masini e fai ai taligalu. A o atu foi i uta e sosola i uta, ae pa mai le vai. Pei o le agaga lena e ala ai ona faatuatua ma avatu le talosaga i le Malo, se i alofa mai, o lea e matau atu na amata mai lava i le \$8.5 million, sau ai lava sau ai lava, ae se i vaai ifo nuu ia, faamuamua afioaga o lo o mafatia i tulaga i le saogalemu i le sami.

**FOFOGA FETALAI:** Faafetai mo le saunoaga faalauaitetele a lau Afioga i le sui mamalu. Tulai maia lau Afioga i le Sui Palemia e te saunoa.

**Afioga Hon FIAME NAOMI MATAAFA:** Ia, lau Afioga i le Fofoga Fetalai, ou te vaai atu e pei e tetee le uluga i le tali atu faalauaitetele. O le Tulafono a tatou i le tatou felafolafoaiga lea, e talanoa i le tatou Faiga Faavae. A tatou laa atu loa i le mataupu lea o le auiliili taitoatasi. Ia sau loa outou, tali atu le Taitaifono o le Komiti o tupe, po o a tupe na e faaagaga mo a outou atinae. E te i ua faapea ua ou le fia tali atu ia outou afioga. O le tulaga lea i taligalu, e pei foi ona ou faamalamalama atu, ua tofu lava ia tou itumalo ma outou fuafuaga faataatitia. E le o se fuafuaga la a lau Matagaluega na fai, ae o le fuafuaga na fai, o le faatalanoaina o tou afioaga ma mea o lo o fia faatino ma mea e ave i ai le faamuamua. O lau vaai atu i ai, aua o lea ua i ai le fesili, po o le a ea le Faiga Faavae mo taligalu. E pei ona ou faamalamalama foi i le tatou Tala o le tupe lea o le a maea nei, le tatou Fonotaga o le tausaga lea. O le Faiga Faavae lea e i ai le vaaiga a le Malo, e ave le faamumaua o taligalu i le puipuia mai o tatou aseta tetele, e pei o tatou auala. O aafiaga o le talafatai i nuu ma afioaga. O le vaaiga lea o lo o i ai, aua a fai pea fai pea lenei mea o taligalu, ae siisii pea ia le tai. O le a alu ai pea lava tatou tupe i le faiga o taligalu. A o le fesili i le mea e faaoga lelei ai ia le tatou tamaoiga ma a tatou fuafuaga alualu mamao. Ia pe tatau ona tatou see ese atu ma talafatai, agai i uta i le mea e le o lamatia ai ia nuu ma afioaga i le siisii o le tai. O le saunoa mai o le sui usufono i si ona nuu o Laulii, o lea ou te uu leleia lava le fuafuaga mo le tatou afioaga lea. O le faamuamua lea e i ai, o le vaai o talivai, e faafaigofie ai ona solo ese mai le suavai mai vaitafe ma le lolofia ai le afioaga. O le tulaga i le taligalu lea e saunoa mai i ai ona faapea e leai se aau, e sao lelei lau Afioga e leai se aau, e matuai tui lava maota ma laoa o lo o i ai i le vaega lea o le afioaga. Ae tuu atu pea le fesili lena, aua o lea ua tatou malamalama uma i le tulaga lea, ma o le tatou tali, tatou see atu ma vaega lea, o lea sa fai le talanoaga i auala, le afioga i le sui usufono o auala e o ai i uta le nuu. A o le mea lava ia, a faapea e sue le tupe ona e tele tausaga o lumanai, alofa atu ia outou Afioga ne i te i ua faapea, e le o faatauaina ia taligalu, a o faafofoga mai outou itumalo. Talanoaga lea ia tatou walls e tui pea tui pea tui pea, aua e leai lava se siisii.... ia tatou te le ma iloa, pe ua aveia foi le faamai ia o le Koviti ma amioga a le lalolagi. Ona tau tuu mai lea i lalo o le

afaina o tatou i le tau, ona o eleele ia a pue, e tele foi laau i o outou afioaga. Fai i le toeaina ia, e sue ma faapena ona toto a tatou laau ma faaopoopo i ai i le tatou poloketi foi lea o lo o faagasolo.

**FOFOGA FETALAI:** Manatua foi e i ai le Palemia e tali i lona aotelega.

**Tofa Lealailepule Rimoni Aiafi:** O le fesili lena o le fesili i le Sui Palemia ae faafetai lava.

**FOFOGA FETALAI:** Malo aua e te popole, o le tofia o le tama o le va. Faafetai, ua saunoa le Sui Palemia i mo fofo o faafitauili. O le mea la lea, e silasila totoa i ai e toamalie i se taimi umi. O lea ua toai taunuu i le malologa masani pe a tatou foi mai, i le tatou malologa...

*Na faataatiaese Galuega a le Fono Aoa mo lana malologa masani i le itula e 7:11 i le po ma toe faaauau i le itula e 7.44 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.*

**FOFOGA FETALAI:** Ou te faasilasila atu ua toe amatalia Taulumaga ma galuega a le Fono Aoa Faitulafono. Ua i ai le manatu ua maua foi le isi malosi faaopoopo i le paia o le Palemene e faaauau ai le tatou galuega. E faia le malologa ua maea le saunoaga a le Afioga i le Sui Palemia.

Ia ma le o le avanoa lena e tapa ma le faaaloalo lau Afioga i le Taitai o le Malo, lau Afioga i le Palemia, ia e tulai mai mo lau saunoaga i nisi o mea, e faapena ona le i maua lelei lona faamalamalamaina e le mamalu o le Kapeneta. Ma le faaaloalo i lau Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai ma sui usufono mamalu o le Fono Aoa Faitulafono, o le Maota e tulutulu i tao ua soo lona taiao, lea ua maea ona saoialo le faasiligamalosi lau Afioga ma le mamalu o le Maota nei. Faamalo foi i sausaunoaga a sui usufono mamalu o le Maota, ua agai nei i le 3 vaiaso o tatou faaaaogagase i le soalupuleina o le Tala Autu o le Tupe mo le Tausaga Faaletupe o le a sosoo nei.

Ua maea tali fuaitau le Sui Palemia ma Minisita o le Kapeneta i mataupu sa lagalaga ai finagalo faaalua faatupu manatu i le tau faufauina o le sa o Samoa o le sa e fau tele. Ia, toe o nai mea iti o lo o totoe, o le a ou le

faaleauataina ona tatou agai ai lea i le laasaga faaiu, pasia ai le Tala Autu o le Tupe i le tausaga fou 2020/2021.

O le a lava ia le fuaitau eseese o finagalo o sui usufono, e le tauiso le tasi o le faanaunautaiga ia ulimasao le tatou folauga i le tausaga fou faaletupe ua fougou mai. O lea ua amata faataumuaava le tatou sa ua lalago foi foe o le savili. Ma ua faalelea foi lafala faalelealaafa, aua aso o le louloua o le tau, ma matagivale ua le masino i nei vaitau sui fesuaiga matuia o le tau.

Pe a matau, a o sausaunoa sui usufono mamalu o le tatou Maota nei, sa o matou tutulai atu e faamalamalama mataupu e le o ogatasi ma faiga faavae, a lo tatou Malo o lo o faataoto atu e au, le Sui Palemia ma Minisita o le Kapeneta. O le Kapeneta e alu atu ai faiga faavae a lo tatou Malo.

Ao upu masani o a tatou felafolafoaiga, vave faasao le uamea pio a o vevela e faigofie ai ona fai. O uiga ia o le Faigamalo a le HRPP, mai lava i le taimi na faatoa tulai mai ai i le foe o le sa o Samoa, i le tausaga faaiuga o le tausaga 1982. E le milia faauu foi upu o le tatou felafolafoaiga, o aga masani ia. Ma e afua mai i a tatou tu foi ma tatou agaifanua. E oo loa ina faasoa taumafa o le nuu, o le taimi pito sili lea ona pisapisao ai le nuu.

O lea foi sa matau, e fetaai lava Minisita o le Kapeneta ia ma sui usufono lava o le Vaega Faaupufai lenei, e le o saofafai i totonu o le Kapeneta, ua taua lava i latou o le Itu Agai a le HRPP lava ia, e toe agaia le HRPP, e oooo lava i le mea e gata ai. O se faiga fou faavaega faaupufai lenei, e toe fesiligia ai lava e sui usufono o le vaega lenei le Malo o le HRPP i totonu o felafolafoaiga nei a le Palemene, e faaopoopo atu i nisi foi avanoa, e feiloai le faafaletui, ma toe laga ai mataupu mo le faamalamalamaina atili. Pe oo lava i tuluiga o le fesiliai o taofi, ae matua lava i le oo.

E le faamaonia ai upu e faapea, e le o saoloto le fefaaaliai o taofi i totonu o le Palemene lenei. A lea e tumatila ma molimauina finagalo faitau eseese, o tatou felafolafoaiga i totonu o le Palemene lenei. O lea lava e le tau taofiofia le sui usufono le Afioga ia Lealailepule Grey, e toe finau lava ma lana ia lava Minisita. Faapena foi Sulamanaia, finafinau mai lava ma Minisita.

Ua maea ona autalatalapipi e le aiga Minisita faiga faavae o tonu fai a lo tatou Malo o Samoa aua atinae eseese o lo o faagasolo nei. Ma isi fuafuaga mamao e tusa ai ma tiute ua uma lava ona faasoa maoti, e lea Minisita ma lea Minisita faapea Matagaluega, ma Faalapotopotoga Tumaoti. Ua faaaupegaina ia le aufaigaluega tomai, ua i ai le potu masani ma agavaa manaomia mo le faatinoina o latou foi matafaioi faapitoa ua uma lava ona aiaia faaletulafono.

O le fesili o le a le auga? O le a le faamoemoe ola o nei mau atinae eseese o lo o faatino e le Malo? O le tali puupuu manino, ia maua gofie e o tatou tagata oloa faaneionapo. Oloa e mananaia, e lelei, e le taugata tele. E pei ona aeae ai foi isi tagatanuu o isi Malo o le lalolagi. Ia lelei aoga mo tatou fanau. Ia maua togafitiga lelei faafomai pe a mamai. Ia



maua vai taumafa mama, e tai atu i totonu o fale ma tatou matamata i ata o le Koviti-19, i le tele o atunuu e i ai papalagi. E laina e taufao le paipa e tasi, paipa ki i le tele o aiga e utu ai ia latou pakete vai.

Ua leva ona tatou le toe faia ia uiga. Ua leai foi se oge, i le maua pea o taumafa o mea aano ma mea lelei e maua ai le malosi o le tino. Ia tatou ola foi i se siosiomaga e saogalemu, toafilemu, tatou te talatalanoa fiafia ma talie ai, o lo o malupuipua lelei i lalo o puipuiga a alii ma tamaitai o le Malu o le Malo, lagolagosua Pulega mamalu a Alii ma Faipule, ma Komiti o Faletua ma Tausi. E leai foi se tulaga e taofiafia ai, saolotoga o tatou tagata e auai i a latou lava tapuaiga.

O tatou tu ma aga faaleaganuu ia matua faamalosia, ma puipua faaauau. O faamanuiaga faaanamua na, na taitai mai ai lo tatou olaga faasamoa, i le afe ma afe o tausaga ua mavae. O manu faaifo mai lagi nei mai i le Atua o Samoa. Ia tatou pulupululima ma aputiputi ina ia faatumauina ai tatou aiatatau. O tatou pulega faalenuu, na foai fua mai e lo tatou Matai Sili i le Lagi, mafaufauga na faavae ai ia pulega ina ia aua lava ne i faaseseina e se pototo ma i ai latou e le o ni tagata o le nuu. Po o latou o e fai mai i le nuu. Po o latou foi ua matai, ae e le o saofafai i totonu o fonotaga a le nuu ma malamalama lelei i tu ma aganuu a le nuu.

O Samoa, o se atunuu tofi ua faamanuiaina e le Atua, i ona laueleele lafulemu lanu lauava. E ola laufetiitii ai mea toto, o lona sami tioata e oa i figota, ia tatou matua puipui malu. Ia maua pea aua taumafa lelei mo tatou fanau lalovaoa. E faasusuina foi ia lo tatou laueleele i le ua mai le lagi, o le fuga mai o laau toto, fua fuata ma laau toto, fua faasoloatoa e pei o niu, e maua ai pea taumafa. E leai se mea e tupu fua. Aua foi ne i tatou meoina nei foai a le Atua ia Samoa. Aua aua ne i o tatou talasua ai, ma ulagia ma mele faamanuiaga ma vavega eseese e liligi faaua mai e lo tatou Matai Sili o le Faavae o Samoa i aso uma e le aunoa.

O mea matagofie ia, e foai fua mai e lo tatou Matai Sili i le Lagi e tatou te vivii pea lava pea e le aunoa, ma ave ai le faafetai i le Atua Silisili Ese ua tatau ai. Ae fai mai le lauga a se tasi o sui usufono, ua leai se tali mai a le Atua i nei atinae o lo o soona fai, ona o lo o tapuai le Malo ia paala, o le atua faapaupau o tagata foi faapaupau. E leai se atua faapaupau faapea o tapuai Samoa nei. O le talitonuga lea faa-HRPP, upu o le tusi, faaeteete tatou uma, i upu soona lafo...

**Tofa Olo Fiti Afoa Vaai:** Lau Afioga i le Fofoga Fetalai, o se mea e fia faasao. Lau Afioga o se mea e fia faasao.

**FOFOGA FETALAI:** Malie lau Afioga i le Palemia se i tuu atu lava le avanoa lea i le sui usufono o Salega.

**Tofa Olo Fiti Afoa Vaai:** Gasea lava le Afioga i le Palemia, gasea lava i le taufaasese o lea faamatalaga sa fai. O la e silafia uma lava ma malamalama le atunuu i le uiga moni o lau faamatalaga na fai i le mea

lea. Ae o le a soona toso lava faapea. E faapea uma lava mea a le tiapolo o le faasese o mea e sao.

**FOFOGA FETALAI:** O lea o le a te i ua e sai mai ae e le i taua e le Palemia lou suafa. O la e fai lana lauga, ia se i tulai mai pea le Palemia...

**Tofa Olo Fiti Afoa Vaai:** Lau Afioga o au lea sa faia le lauga lea...

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI:** Pe i ai nisi saunoaga, faasau aua le taofia, sau se 100 se i ou faalogologo atu i ai...

**Tofa Olo Fiti Afoa Vaai:** A lailoa lau Afioga, o la e faafofoga lelei lava le atunuu i lou taumafai e faasese tala ia e fai atu.

**FOFOGA FETALAI:** Ia malie lau Afioga i le sui usufono o Salega...

**Tofa Olo Fiti Afoa Vaai:** Se mea foi a tatou toe vevesi foi se... ia faatasi le Atua ma oe.

**FOFOGA FETALAI:** Ia, o ai o au po o le Palemia?

**Tofa Olo Fiti Afoa Vaai:** Ia, oulua uma.

**FOFOGA FETALAI:** Ia lelei faafetai, viia le Alii. Ia se i tulai mai le Palemia.

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai, a i ai lava nisi e fia fesili mai, fesili mai. Aua le poia faleolo, o le a ou faamaumauina i i. A uma ona ou toe agai atu lea i ai i le faaiuga. Ae e fai lava ma ou kiia le button paepae lea, ia tutu ae tagata i luga se i ou malolo ai.

Ia, lau Afioga, o upu a le tusi, faaeteete tatou uma i upu e soona lafo. Aua o upu uma lava e pau mai i le fofoga o le tagata e faamaumau i le Tusi o le Ola, e agelu o lo o matau ma faalologo i upu a tagata i taimi uma o le aso, ma e toe fifi uma e pei o ni malala ola i le tagata lava ana ia lafoga, soona lafo ma le le faautauta i le Atua o lo o Faavae ai Samoa. Ma le lasi o ana meaalofa tuulima mai ia Samoa e le aunoa.

I fuafuaga uma eseese, o atinae o Malo uma o le lalolagi e aofia ai ma Samoa, ia matua faautagia le taiala faaaurolenei. Ia matua faataua tutusa, paleni atinae tetele autu, Economical Development Projects e pei o auala tetele, auala galue malaevaalele ma uafu. E faalagolago i ai isi atinae faaopopo, ia paleni lelei foi atinae autu nei, ma isi atinae mo le soifua lelei fiafia o tatou tagata, e pei o atinae o aoaoga, soifua maloloina, ia ma

isi lava galuega soosoo tauau, e pei o suavai taumafa ma taaloga, social development projects.

Mo se faataitaiga e pei ona sausaunoa le Minisita o Soifua Maloloina, o se atalii ua iu lelei aoga, foi mai ae te i ua gasegase ma uma faafuasei ai le ola, po o se afafine foi e aumalosi, ae faaletonu lona aoaoina i itu ia, e matua liolio i ai fuafuaga mamao uma a so o se Malo e ao ona paleni.

Fai mai se isi taofi, tatou toe foi i le eleele e faatoa. E pei ona sau ai lo tatou Malo ina ua faatoa tutoatasi i le 58 tausaga talu ai. Sa leai ni aitalafu a le Malo. Sa faalagolago tasi i le koko ma le popo. E le sao lea manatu. O le uluai nonogatupe a lo tatou Malo, e matua mama aiaiga o le toe totogiina. Na faia i le Faletupe o Asia i le 1969, a o Palemia Fiamē Mataafa Faumuina II, mo le fausia lea o le malaevaalele faava o malo i Faleolo. O le vaaiga mamao lea, ina ia atiae ia tagata asiasi maimoa mai e televave ia tupe maua a le Malo aemaise teugatupe mo fefaatauaiga.

Na toe faatele mulimuli e le HRPP i le 1983 mo vaalele tetele o le Boeing 747 na tatala i le masina o Tesema i le 1995. Fai mai le sui usufono lava lea na saunoa, sa matitiva fiafia lava le atunuu i na ona aso. Ae o le taimi lenei ua matitiva le atunuu ma loimata. I lou lava talitonuga, o le tagata mativa, o le tagata lea ua le lavalava, leai se tupe e faatau ai ni lavalava. E moe i lalo o niu, e leai se aiga, leai se fale, leai se taumafa o maua. E le maua foi se suavai e inu ai. Ailoga o i ai se tagata faapea i Samoa?

Ae e toatele lava tagata faapenei e maua i isi atunuu e pei o Amerika le atunuu e pito maumea i le lalolagi. Ua ou vaai manino, ua ou vaai manino i ai i le toatele o tagata e momoe i lalo o auala laupapa. E leai ni aiga. Ae o lo o manino foi Afioga a le Alii i ona ausoo, tou te tumau pea ma tagata matitiva seia oo i le faavavau. Aisea? Aua foi, e i ai lava i latou e le fia atiae i le latou lava filifiliga.

Sa feinu lau Afioga i le Fofoga Fetalai i le tele o nuu i Tufu, o vaieli ia e eli i le oneone i le matafaga pe a pe le tai. Sa masani ona ou ativai ai, i le Tufu lenei i le matafaga. E tele taimi e faasualua ai. E asu i pakete vai. O matafaga foi i nuu uma o Samoa po o tuamaota o tatou nuu, ia se i tulou lava, o tatou faleese ia po o toilets. E oo mai nei lava i le 1980, o tumau pea ia aga i nisi o nuu, a vela le oge, ua saili ufi vao, ma pulaa i alia. O meaai ia o le oge e taumafa. E masani ai ia lo tatou atunuu i aso ua tuanai.

O le tali puupuu i manatu ia na laga, tatou te le o faaopeaopea i luga o le ea tulou, o lea lava o lo o pipii mau o tatou vae i le eleele ma toto faaauau talo, niu, koko, fai ma taamu, ufi, manioka. Ia ma faaauau le tatou fagotaina o le sami aua figota mo taumafa. Talu mai ona tulai i le foe a le HRPP i le 1982, ou te le o toe manatua se oge meaai a lo tatou atunuu. O le tali lena o faamanuiaga e lasi mai lo tatou Matai Sili.

E lelei ona tatou asiasi pea i tatou maketi o taumafa mata i aso uma, tatou te iloa ai le tele o fua o faaeleeleaga o Samoa o lo o selesele ai nei. O foai vaaia ia lau Afioga i le Fofoga Fetalai o faamanuiaga mai le Atua i o tatou tagata o lo o nafa ma le atinaeina o le laueleele.

Lau Afioga i le Fofoga Fetalai, ae faapefea mai le koko ma le popo? Lea e pei ona taua. E tulai mai le HRPP i le 1982 ua masofa le fa. Ua oti atoa le atinae o le popo, koko ma le fai, na ola ai le atunuu i le taimi o Niu Sila faasolo mai ai i lo tatou Faigamalo. E afua i faamai, suiga o le tau ma faiga faavae, o faiga faavae sa faavae lava i luga o talitonuga lelei, aepeitai, sa le i mafaufauina ni aafiaga o le a tulai mai.

Ou te fia tautala loa, i atinae tetele nei taitasi, atinae o le fai. Na oo i le miliona pusafai a Samoa na lauina atu i fafo i le tausaga e 1960, ona amata tifato ai lea i lalo, ona o faamai o le lausului, ma isi lava mau faamai mulimuli ane ai. O lea lava e aafia ai le fai e tau mai lava i nei ona aso. O lo o tatou toe taumafai pea taumafai pea. E ala i le Matagaluega o Faatoaga e atiae le fai, ae ua taugata tele vailaau e tape ai faamai o le fai. E taua le tuualalo a nisi o tatou sui usufono. Tatou toe atiae le fai palagi moni a Samoa, na tatou masani ai i na vaitau.

Talo, na malosi tele le atinae o le talo, e tau mai i le 1993, ina ua faaoga faalauaitetele le fanavao, ma vailaau e tetele ai faatoaga, mo le totoina o talo mo maketi i fafo. Na oo i le \$10 miliona na maua mai i le talo na lauina atu i Niu Sila ao le i tupu le faamai lega. Na oo i le 33 ituaiga talo eseese, na maua mai i suesuega a o tatou lava saienitisi, sa galulue ai i le ao ma le po, e saili se fofu i le Matagaluega o Faatoaga, lea na fili ai talo lelei mo le maketi i Niu Sila, lea foi ua faafulisa ma ave ia tatou talo i Niu Sila, ua vavalu. E umi ona faaoga faasolosolo, ma faafaigofie ai foi ona talia e maketi, i fafo a tatou talo lea sa ou talanoa atu, ma taua foi e le Minisita i le taeao nei. O le Esetete Tausi o lea foi ua oo atu le fuafuaga, i le faatauina o tatou lava faleoloa, i Aukilani ina ia mafai ona faatauina tetele atu ai ia tatou talo, ona o le toatele o latou ia o Initia mai Fiti. E le o maua ai se fesoasoani a tatou aufaitalo.

Popo ma le koko. O le ki atoa o le malosi o le popo, ma le koko a Samoa mai nuu i tua, o le faagaioi o le aufaioloa. O le aufaioloa ia e faatu ia o latou faleoloa i totonu o nuu, e fua ai popo ma koko i totonu o nuu. O lala ia o kamupani tetele o Nelesoni, Pipi ma isi. Sa ou faia ia le galuega lea ao ou latiiti o lou alu ane pea ma fai le faatau, avane popo e fua ai i fale popo nei, o lo matou nuu i Lepa. E faigofie tele mo matou nuu i tua le faiga lea. Toe fai ai foi ia latou nonogatupe i faleoloa nei, ae totogi mulimuli i fuagapopo mago ma fuagapopo mata faatasi ma koko, ona o le taua tele o le manatu lenei.

I le tausaga e 1926, e 45 faleoloa, ae 100 falepopo a le kamupani e tasi, i le kamupani tele lea a Nelesoni i Savaii ma Upolu. O se pisinisi pito tele lea i Samoa i lena vaitau. Na laa loa le Malo i le faatuina o le Komiti o le Popo ma le Koko, e fua faamalosia ai oloa nei i Apia, tapuni loa ma faleoloa nei i tua ua le o toe manaomia, oki atoa ma nei oloa na ola ai le aufaifaatoaga i Samoa mo tausaga e tele. Aisea? O le matua taugata lava o le faala o sau ato popo ae sau mai i tua pe e te sau mai Savaii, sau i le vaa, sau i Apia, uma ane, ua leai se aoga. Ua tele atu le tupe alu na i lo le tupe maua. Toe pasi loa ma Tulafono e faamalosi ai, le toe totogi tupe o leipa na galulue i faatoaga koko, o i ina le faafitauli faaiu na tapuni ai loa ma faatoaga koko tetele na faalagolago i ai ia lo tatou nuu, lo tatou

atunuu mo le aveina i fafo o le koko i maketi o le lalolagi i Europa i Peretania faapea foi ma Siamani. Aisea? Tele taimi e fotu mai ai se fuata koko, ae pau ma timuga faatamaia loa ma le fuata koko atoa i le faamai koko o le black pot, leai loa foi ma se tupe e maua e totogi ai labour, sa masani ona totogi i latou nei i taamu, talo ma isi oloa, a o le i pasia le Tulafono lenei. E lelei le agaga na faatu ai Tulafono nei mo le faaleleia o tupe maua a le aufaifaatoaga, a o le faalavelave ua tape ai ma le aufaioloa na ola ai o tatou nuu i tua ma le aufaatoaga.

Sosoo mai loa ma afa o Ofa, Valelia ma isi faafitauli tupu loa ma le agaga musua e toe faaauau le toe faalagolago pea i le popo ma le koko, ua tatau loa ona tatou agai e faaoga le faautautaga tatau e saili isi auala e ola ai le tatou atunuu.

Ua uma ona tolaulau atu e le Sui Palemia ma le Minisita o Faatoaga ma Faigafaiva le mau auala eseese ua faia e le tatou Malo e ola ai le tatou atunuu, e aafia ai ma atinae fou o faatoaga, o togalaauaina ma atinae o teu fugalaau sa tatou le masani ai, faapea ai ma le faatoaina faaauau o le talo ma isi lauu toto, aemaise le faaleleia atili o auala galue ua faata ma le suiga o tulafono o taavale afi e faafaigofie ona maua ai e aiga i Niu Sila ma Ausetalia e lafo mai taavale mo le atinae o aiga o lo o i Samoa nei. Ae a le faaleleia atili o vaa mo femalagaaiga aua le felauaiga o faaeleeleaga i le va o Upolu ma Savaii ma Tutuila, aemaise galuega faavaitaimi mo tatou tagata i Niu Sila ma Ausetalia lea ua oo lava i le 3 tausaga le umi e mafai ona galue ai i le malolo, foi mai i Samoa, toe foi atu toe faaauau.

I le tulaga la o nogatupe o lo o faatino foi e le tatou Malo, o le isi lea auala e ola ai atinae eseese e faatino e le tatou Malo e aofia ai pisinisi a tagata lautele e le mafai ona fai ona e le lava a latou tupe maua. O le toomaga lea mo tagata uma ma pisinisi, agai loa i nogatupe mai faletupe o lo o i ai taiala o le faautautaga tatau, e fua tatau i ai le maualuga o tupe e mafai ona nono mai se faletupe o Samoa o lo o i le tatou Malo. O lo o faaoga faletupe faava o Malo e maua mai ai nogatupe mama aiaiga mo le totogiina, e pei o le mama o tului toe umi foi tausaga e totogi ai. E uma atu ona totogi ua leva ona fanafanau ma saga fanafanau le atinae e maua ai galuega ma toe totogi atoa ai le nogatupe. E toatele i latou o le aufaipisinisi ma tagata taitoatasi i Samoa e ola i aitalafu. O le mafuaga foi lena na faalautele ai e le tatou faigamalo lenei o le HRPP le laisene o faletupe. Tulai mai le faigamalo, na o le faletupe lava o Samoa, Bank of Western Samoa, na faalautele ai ma isi faletupe mo fefaatauaiga, commercial banks, ina ia maua ai le avanoa e le toatele o tatou tagata e fai ai latou nogatupe mo latou atinae. Ae o le eseese tele, na o le Malo e auala mai ai nogatupe ia mai faletupe tetele o le lalolagi na faatu faapitoa e lagolago i atinae a Malo tauatia. O lo o afiafi mai ai le grant element, e oo i le 35% o nonogatupe, ae faaaua mai i le maualalo o tului, toe uumi tausaga e togitogi ai. O isi e oo lava i le 30 tausaga le umi e togitogi ai. E eseese faigamalo ma a latou foi faamuamua e fuafua tatau lava foi e taitai i na vaitau i luitau sa feagai ma latou, sa toaitiiti foi le faitauaofai o tatou tagata i na ona aso faatusatusa i nei ona aso.

Ona faaii ai lea o sau faamatalaga i le atinae tele lea o fesootaiga televavave e faaaoga ai fesootaiga tau initaneti ma telefoni feaveai. O se atinae tele na faamatuu atu i tua e le tatou Malo i lana faiga faavae pei foi ona faamatuu ai i o tatou tagata lautele le vaega tele o eleele o le Esetete Tausi gauaano, e nonofo ai o tatou tagata i nai o latou lisi po o fanua foi ua motu i le taulaga i Apia, faapea le Tusitala gau na faatau, faamatuu atu foi i tua a o faafoe foi e le Malo.

E pei foi o le SamoaTel, le SamoaTel gau i le malosi tele o le tauvaga ma le Digicel, o le kamupani faava o Malo tele mai Aialani, o se kamupani ua i ai le potu faapitoa i ituaiga pisinisi o fesootaiga televavave. O le isi foi lea faiga a le Malo e taugofie ai auaunaga nei i o tatou tagata o le faatauva, e pau ai tau o auaunaga, toe maua mai ai tagata popoto o lo o i ai le tomai, mai le taimi lena na tuufaatasia ai pe na faatau atu ai le tatou SamoaTel i le BlueSky, toe toalua lava tagata tuai lea e totoe i le taimi lenei. Na uluai aumai e le Telecom New Zealand le telefoni feaveai e muta mai Vailele le malosi, e faapena foi i le agai atu i sisifo. A o fesootaiga televavave initaneti na amatalia faalilolilo e le Malo tele o Amerika e faapitoa mo taua, ae faasagasaga faapitoa aua meatau faatonutonu alumamao ia Rusia o se faigamalo Komunisi, o lo o ia umia foi meatau matautia faatonutonu alualumamao o pomu atomika eseese e silisili ona malolosi nai lo le uluai pomu na pomu ai Iapani i le taua lona lua talu ai a le lalolagi ma faaii ai lava ma le taua tele i le 1945 i le malolosi tele o nei mea tau.

Ina ua malepe la le faa-Komunisi Rusia i le 1990, ona fai ai loa lea o le faaiuga a le Malo o Amerika e tatala mai loa i tua i Malo uma o le lalolagi lana auupega lenei o le initaneti mo le faaaoga loa mo atinae eseese, pei ona silafia i le taimi lenei, o lo o tapisa pea lava pea tagata Amerika e faapea; ua toe faaaoga e le Malo o Rusia le initaneti ma telefoni feaveai e spy ai i le faigapalota talu ai a le Malo o Amerika. E faapea se taofi sa faia ia fesootaiga faalilolilo na mafua ai ona manumalo le alii Peresetene o Trump, lale toetiiti sao taumafaiga a le Pati Temokarasi e aveese ai imbeach le Peresetene mai lona tofi Peresetene le alii o Trump, talu ai fesootaiga initaneti nei pei ua aia mai i ai Rusia i mataupu tau le lotoifale o Amerika, o se tulaga ua lamatia ai foi ma le saogalemu o le Malo o Amerika.

Mo Samoa la, na amata tatou tapenaga mo tatou foi fesootaiga televavave i le tausaga e 1999. O le laasaga muamua, o le sui o tatou Tulafono e momotu ai, aveese ai fesootaiga telecommunication mai le Matagaluega o Falemeli ma Uaealesi ae faagaoioi loa faapisinisi. O le mafuaaga lena na ou aveesea ai le EPC mai ia Leafa Vitale ia Novema i le 1998 i le aso na faatauto ai au e avee ma Palemia ina ua faamavae Tofilau Eti Alesana. O lou manatu atoa, ia agai tasi Leafa, le Minisita, ia aua lava ne i toe faalavelave se isi lava tiute, tuu atoa lona taimi e galue i le toe teuteu o le Tulafono lenei o Fesootaiga e faatino ai le faamoemoe. O le suiga la lea o le aveese o le EPC mai ia Leafa ae tuu ia Luagalau le vaaiga atoa na faapogai ai ona tagatavaleina Luagalau e Leafa, ona o mafuaaga ua lauiloa, e tusa ai ma faamatalaga mai le faamasinoga na fai.

E le i tau lau o le faamoemoe, ona ou toe tofia ai lea o Gafa le Minisita e avea ma Minisita mo Falemeli ma Uaealesi. Sa feagai foi Gafa ma isi mau faigata, ona o le malosi tele o le tetee o le aufaigaluega i suiga fou nei e mumusu ai foi latou e fai. Ona ou Minisita loa lea o Fesootaiga, faatoa mafai ai ona tapena vave le Tulafono e aveese ai loa le Telecommunication po o fesootaiga televavave mai le falemeli ma uaealesi e faafoe faapisinisi i le 1999, o le isi vaega lea o le privatization policy a le Malo po o le faamatuuese o fesootaiga televavave e faagaioi loa faapisinisi e taofi ai le gau, lea faatoa fanau mai ai i le lalolagi e le tatou SamoaTel. Ona faasee ae loa lea o Gafa e tauave le Matagaluega o Tiute na vavaeese ai mai le Minisita o Tupe mo le taimi muamua talu mai le 1962 le Matagaluega o Tiute sa masani ona i lalo o le Minisita o Tupe.

I le taimi tonu lea i le 1999, o i lalo lalo lava Samoa i le atinae o fesootaiga televavave. Nei, ua i luga luga lava Samoa. Tapena loa le Malo e matua fai le tauvaga o fesootaiga televavave ia vave siitia ai tatou fesootaiga televavave, ia atili televave ai tatou nai lo isi atunuu o le Pasefika. E tolu kamupani o le a faatauva, o le SamoaTel a le tatou Malo, Telecom New Zealand lea ua i Samoa ma le Digicel na manumalo i le isi foi tauofoga, o le laisene lona 3 sa faasalalau faataufofo. E le i umi le tauvaga lea ae taaifala le Telecom New Zealand sa umia ai foi tatou sea e 10%, totoe loa na o le SamoaTel, o se tamai asini lava e tolotolo tautevateva ma le Digicel, o le solofanua tutuu tutua, o se tauvaga e matua le tutusa. O le Digicel, o le kamupani mai Aialani e tu i tafatafa ane o Peretania tele i Europa, ona ou tofia ai lea o Palusalua e avea ma Minisita o Fesootaiga e faaauau loa e ia le atinae ua faagasolo.

E pei ona silafia, na agai loa le Malo mulimuli ane ai e faatino le isi faiga faavae fou e aoga mo tatou tagata mo taavale e o i le itu tauagavale o alatetele e maua ai ni taavale mai o latou aiga i Ausetalia ma Niu Sila mo latou foi atinae, ona tetee foi lea o le afioga ia Palusalua, o le faapogai lea na aveese ai loa e le faafaletui a faipule o le Pati a le HRPP Palusalua ma avea ai loa ma Taitai o le Tautua Party ina ua uma ona faamavae aloaia mai le Palemene leni, i latou e toatolu e toe o e fesiligia o latou itumalo ae ua toe o nai vaiaso fai le faiga palota lautele. Na toe sao mai ai Palusalua ma Papu Vaai i palota ia na toe fai e tusa ai ma le Tulafono, ae malolo Lealailepule Rimoni Grey, o ia lea na ia faaigoaina le Pati lea o le Lealailepule le Tautua Party ae faapuupuu i le Tautua Party. Lea la ua fanaufouina Mr Rimoni Grey, ae o lo o nofonofo pea ma le patent o le Tautua Party. O mea malie ia na tutupu i le tatou tamai lalolagi o Samoa e masasau tele polokiki, e ao ona faataitai ai latou e fia faatu ni a latou Pati.

Lau Afioga i le Fofoga Fetalai ma sui usufono mamalu, pe a toe tomanatu i le faasologa o le faatulai mai o le atinae leni o fesootaiga televavave faapisinisi, ia malamalama atili. I le 199 pasia le Tulafono e vavae ese ai le fesootaiga, Telecommunication ma le Matagaluega o le Falemeli. I le 2000, faatu le SamoaTel, 2001, fausia faataamilo i Upolu uaea telefoni, the first fiber network i le tauaofai e \$10 miliona, 2003,

fausia uaealesi local loop i Upolu ma Savaii i le tau e \$5 miliona tala Amerika. Tausaga 2007, fausia sites po o nofoaga faapitoa mo towers e 27. 2009 i le 2010, fausia isi nofoaga faapooopo e 27 e maua ai le 54 sites, o le tau fuafua na alu ai e \$18 miliona. Osofai loa Samoa e le Tsunami, o galu fafati tetele na matua malepelepe ai uaea faataamilo ia po o le fiber network, ona sa tatanu i lalo uaea nei i auala taavale i le itu i le sami. Ou te manatua i le taimi lea faatoa uma lava ona oso le tsunami ae alu atu lau taavale, ou te oo atu agai atu i Solosolo, o malepe mai ma laula mai i luga tamai paipa o lo o alu ai i totonu uaea, ua taei uma le aualatele ma e faapena uma lava vaega uma o Upolu ma Savaii na matua afaina i galu tetele, ma faatamaia uma ai le fiber network lenei a le tatou kamupani.

E le gata la i le tsunami o le 2009 na faatamaia ai tatou felavasaiga o uaea fetaiiai mo fesootaiga televavave i lalo o alatetele, ma uaea e tai atu i luga o pou, o nisi nei o afa tetele ma afa laiti na agi i totonu o le lio o le 200 kilomita radius mai Apia na matua afaina ai foi tatou structure, telefoni. Tausaga 2003 i le 2004 i le amataga agi Heta. O le malosi faatulaga faa-afa numera 5. 2004 i le 2005 i le amataga agi mai Olefa, malosi faatulaga faanumera 5. 2006 i le 2007, Afele, malosi faatulaga o le afa numera 2. Tausaga 2009 agi Nisa ia Ianuari i le aso 10, faanumeraga o le afa, Nu.1. Fepuari i le aso 2010 oso Rene, faanumeraga o le afa, Nu.1. 10 o Mati oso Tomasi, faanumera o le afa, Nu.1. 2010 i le 2011 agi i le aso 10 o Ianuari Wilma, malosi faa-afa Nu.2. O le taimi tonu lava lea na faasalalau ai loa sea o le SamoaTel mo le tauofoga. E tasi le tsunami ma le 7 afa a o le i faataua le BlueSky na matua faatamaia ai tatou uaea fetaiiai ma tifato ifo ai i lalo le aoga o tatou meatotino. O isi nei afa e lima na agi mulimuli ane ai, a o lea ua tauave e le BlueSky le tatou kamupani telefoni. 2015 ia Tesema, oso Evani, o le malosi faatulaga o le afa lenei, Nu.3. 2012 Ianuari i le aso 13, agi Gary. O le malosi faatulaga o le afa, Nu.2. 2015 i le 2016, Aperila i le aso 16 oso Aмоса. Malosi faatulaga o le afa, Nu.2. 2015 i le 2016 Novema i le 15, Tuni, malosi faatulaga o le afa, Nu.2. 2017 i le 2018, Fepuari 18, o Gita. Malosi faatulaga o le afa lea, Nu.1, lea foi na matua talepe ai le Vaisigano ma tafea ai isi taavale tietie mai luga o le paaute. O le taua o afa ia e lima mai le 2011, o a mea na faatamaia, na toe faaleleia atoa i le tupe a le kamupani lenei o le BlueSky, e le i toe alu ai se seleni a le Malo mai le 2011 i le taimi lenei, lea ua oo le televave o fesootaiga i luga atu o le 3G, ua faaoga nei le saosaoa sili atu le LTE faapea ma towers feaveai ma le tele o uaea ua faaoga ai le copper e anagata. Ua \$74.7 miliona na toe faaalu ai e le Bluesky mo le toe faaleleia atoa o uaea nei ma masini na faaleaga aua le latou auaunaga.

Ona ou oo mai ai lea i le faatauga o le SamoaTel. O le aso 31 o Ianuari 2011 na fofoga ai le Kapeneta i le lipoti o gaoioiga uma na nafa ma le Komiti Faapitoa o tauofoga ma tapa ai se faamaoniga a le Kapeneta i le latou fautuaga e tusa ai ma faasalalau faalauaitetele na fai. E 15 kamupani ma latou taitoatasi na faaalua le naunautai e tauofo, peitai, na o le tasi le ofo na faamalieina uma aiaiga o le tauofoga i le aso na tatala



ai, o le ofo lea a le Bluesky. O le ofo lea e \$11 miliona mo le 75% o share a le kamupani. O lona uiga, afai e tuuaofai loa i ai ma le 25% e 100% ai sea atoa o le kamupani o le tau po o le value, e \$14.6 Amerika le tau, fua lea i le ofo a le Bluesky. O le isi la 25% o share o le SamoaTel ua faavagavaga mo tatou lava tagata e faaauaala atu i le UTOS, o le faaputugatupe na faamatu faapitoa mo le faamoemoe lea ina ia mafai ai e o tatou tagata ona umia share i totonu ole kamupani lea o le Bluesky ma nisi foi kamupani. Talu ai le tele o meatotino a le SamoaTel na faatamaia e afa e 7 ma le Tsunami e 1, mai le 2003 i le 2011, e tatau ai ona faia se suesuega faapitoa o le aoga, le value o meatotino o i ai i le itu tau tupe, aemaise o aseta ua matua aafia tele i afa, Tsunami faapea aoga o ia meatotino ua tuuititia le aoga i tausaga sa faaaoga ai talu mai le tausaga e 2000, depreciation of assets. O suesuega la nei na faia e le kamupani mai fafo i Amerika o le Nathan Association na filifilia e le Faletupe o le Lalolagi ua masani i ituaiga faatauga faapenei e aafia ai kamupani tetele o le lalolagi. E 4 metotia eseese sa faaaoga ina ia saili ai se tau tau talafeagai, sa faaaoga le net asset, discounted cash flow comparable sale ma le economic model. O metotia ia e 4 na filifilia e le kamupani lenei o le Nathan Associates na filifilia mai e le World Bank, le Faletupe o le Lalolagi, e fesootai pea ma le tatou Malo pe a oo loa i ni mataupu lavelave faapenei. E 4 la metotia na faaaoga e saili ai se tau talafeagai o aseta ona ua tele le mau aafiaga ua oo i ai meatotino a le SamoaTel, e aafia ai foi ma le tulaga gauaano o ana pisinisi. 1. I le 2009, na silia ai tupe alu a le SamoaTel nai lo tupe maua. E \$48 miliona o aitalafu mai le Malo e faagaoioi ai le SamoaTel na tatau ona totogi mai i le Malo, na faamagalalo, write off ina ia le aafia le cash flow a le SamoaTel a le tatou Malo, o tupe ia e matua moomia e faaauau ai pea gaoioiga a le tatou SamoaTel.

Lua, i le 2010, na toe faia ai foi se isi meaalofo e le Malo e \$1,800,000 ona o aafiaga o le Tsunami a o tapena le faamatuuese atu o sea o le SamoaTel. O faaletonu nei e aafia ai foi lava ma ofo e tapena i ai so o se kamupani e bid, e matua aafia ai lava. Na fautua ai le Kapeneta i le Komiti o Tauofoga, o le ofo lenei mai le Bluesky e \$11 miliona ua matua talafeagai ma le tulaga ua i ai meatotino o le a faamatuuese atu.

Lau Afioga i le Fofoga Fetalai, o se vaaiga i le itu taua a le privatization policy, faamatu i tua o aseta a le SamoaTel i le BlueSky. Talu mai ona privatize pe faamatuuese atu share e 75% o le SamoaTel i le Bluesky i le 2011 seia oo mai i le taimi na toe fai ai le isi suiga, o suiga tetele nei ua mataituina. 1. E \$74,500,000 na faaalu e le Bluesky e toe faaleleia atoa ai ma faatele atili lana auaunaga i Samoa nei mai le 2011 e tau mai i le taimi nei. 2. E \$56 miliona ua totogi mai i le Malo e auala i lafoga. 3. E \$1 miliona e totogi i tausaga taitasi i laisene ma isi tupe totogi e pei o **Spectrum fees**, i le Regulator, aofai i le tausaga, i le 9 tausaga o gaoioiga a le Bluesky e \$9 miliona. Tufatufaga na fai i le UTOS e \$7 miliona \$500,000 ua maua talu mai le 2011. E miliona le isi tufatufaga lea e sosoo nei. O lona uiga o le aofai atoa o tufatufaga a le UTOS, e \$8.5 miliona talu mai ona faatuina. O le UTOS o le teugatupe faapitoa lea na faatu

faapitua lava na te umia le 25% o le share o le Bluesky. Ma nisi foi Kamupani tetele mai fafo e ono faatu i Samoa i le lumanai, e fai share i ai o tatou tagata, i pisinisi e ola, ae le o pisinisi e gau. Na sponsor pe faatupe le tatou au o le Taitoafitu i le lakapi i le \$5 miliona i le 4 tausaga talu ai. O lo o i ai foi fesoasoani e ave i le Sosaiete o le Cancer, o le Red Cross ma isi galuega alofa, aofai o tupe alu a le Bluesky i vaega uma ia e 5 ua ou taua, e le i lalo ifo o le \$153 miliona talu mai le 2011. O le faalautele atu o share umia e tagatanuu o Samoa, i totonu o le Bluesky po o le Vodafone. Lau Afioga i le Fofoga Fetalai, o le tausaga e 2015, na faatau ai shares a le Bluesky, e Kamupani telefoni a le Atu Kuki ona o lo o i ai le tatou UTOS i totonu o le Bluesky. O lea foi la, o lo o umia ai foi e le UTOS a Samoa, ia share i le Kamupani telefoni a le Atu Kuki, auala atu i ana share i totonu o le Bluesky. Ua tatou agai atu ai lava, e faalautele a tatou faiga pisinisi i lea foi Malo o le Pasefika. I le tausaga 2019, na faatau ai le **Eighty Age o le Almulcommated Telecommunication Is Holdings Limited**, o se Kamupani tuufaatasi lea a Fiti, Vanuatu, Kilipati ma Papua New Guinea. E faatau ai e latou share a le **Ampire Group, o le Ampire Group** i totonu o tatou Bluesky, o Kamupani telefoni ia, sa tatou fai paaga o Sepania i Europa ma Amerika Latina, sa tatou faipaaga faafaaiipoipo i totonu o le Bluesky a o lea ua tatou tetea aloaia faale-tulafono. O lea ua tatou usugafa faaulugalii nei i le Kamupani fou o le **Eighty Age**. O le paaga e afakasi, e Fiti le isi itu, Papua le isi itu, Vanuatu le isi itu, Kiripati le isi itu ma sui ai ma le igoa mai le Bluesky mai le Vodafone. Ma ua auala atu ai foi, i le Vodafone, o lo o umia faaauau ai share a le UTOS, o le au fai share lava lea a tagata o le tatou atunuu. Tatou te maua ai avanoa le aumaua mo le lumanai. O avanoa for investment opportunities. E invest ai le UTOS i atunuu nei e 4, o lo o tatou faipaaga i le Vodafone, i Fiti Vanuatu Kilipati Papua New Guinea. E atili tele ai tupe maua a le UTOS. Mo le tatou au fai share i le taimi nei ma e lua, lau Afioga i le Fofoga Fetalai, o se lui ogaoga lea, mo tatou faipisinisi. E laititi lava si o tatou atunuu, **we are very tiny market. Our businesses is ban outward toward our neighbours thats what UTOS is exploring through its investment in Vodafone**. Mo le agai atu i le lumanai, talu mai le uluai laasaga tele lava taua, na tatou laa ai i le 1999, na atiae ai faapisinisi tatou fesoataiga faaneionapo. Ma le fuafuaga mamao mo le faamatuu atu i tua o aseta a le Malo. O lo o faaauau ai pea i le malosia e tatau ai, ona **modernize** le faaleleia atili o auala eseese o tekonolosi fou, ina ia ausia e Samoa, le maualuga e tatau ai, a tatou fesoataiga ia sosolo lava i suiga fou e faatulai mai i le lalolagi o suiga fou. Mo le manuia alu i luma mo o tatou tagata uma i le lumanai. O le manulauti lena o nei fuafuaga uma, o le faatuina lea o le tatou pulega o suiga lelei o fesoataiga, tau digital. Ua pasia nei e le Kapeneta o le a faatonutonu tatau ai le faaogaina tatau, o metotia tau fesoataiga televavave mo vaega uma o le tamaoiga, i le 10 tausaga o lo o lumanai ai nei.

Lau Afioga i le Fofoga Fetalai, o se faamaninoga puupuu saasaa lena, o mataupu lavelave sa laga e nisi o sui usufono ia latou sauniga. A o le i

faia sau upu faaii, lau Afioga i le Fofoga Fetalai, ou te fia avea le minute lenei e avatu ai lau faamalo i lau Afioga Laauli. O lea ua tuanai atu ia fatia, faamalo foi ia Peseta Vaifou le finau. E le mua uma ni sa, o le a le tulaga ua i ai le faamasinoga, ave lena i uta ae sagai ane ai o le tai. Alo mai i le tatou galuega, o lo o i ai pea nai masina o lo o totoe o le tatou Nofoaiga. Aua a tatou tautoga i o tatou itumalo. Lau Afioga i le Fofoga Fetalai, tatou agai loa i le auiliiliina o le tatou Tala o le tupe 2020/2021. Manuia le tatou Fonotaga.

**FOFOGA FETALAI:** Malo faafetai.

**Susuga Hon Laauli Polataivao Leuatea:** Lau Afioga i le Fofoga Fetalai, malie lava sina avanoa lava leaga o lea ua agai lava le saunoaga a le Palemia i le tulaga lea. Sa ota nofo lava ma matau, leaga e le faigofie, e puupuu lava lau Afioga i le Fofoga Fetalai.

**FOFOGA FETALAI:** Ia saunoa mai le sui usufono. Faapuupuu mai.

**Susuga Hon Laauli Polataivao Leuatea:** Faafetai mo le avanoa. E manatu lea sa o matou seu lava i fale tapuai i lenei aso mai le amataga mai le taeao, o lea foi ua taunuu, ua tapau tia o le tautiaga aua le faalelegafulu a le Kapeneta. Lau Afioga i le Fofoga Fetalai, ua ou tulai i le ava ma le faaaloalo tele i lenei aso. Ou te manatu e leo toe po malae, i lenei foi mataupu e le toe lilo i lalo. Ua gagana ai le lalolagi atoa aemaise foi le atunuu atoa. Sa o ta nofo ai i luga o papagatete, aemaise le Koluse o le faalumaina a le agaga ua agai i ai le faafofoga a Samoa, e fesiligia lou faamaoni. I lou ava lau Afioga i le Fofoga Fetalai, ua ou faaogaina ai lenei avanoa taua, ua ou tulai e faaleo lou agaga o le loto maualalo i lumamea i le Palemene o Samoa. Ona o lea lava ua tatou taunuu nei, ua tini pao le uto e pei o le faiva i vai, fuga foi i upu o le seugagogo. Ua uma le faamoemoe sa fai, lau Afioga i le Fofoga Fetalai, ou te le tulai gugu, leaga o le upu na e saunoa i ai i le tauafiafi foi faapenei, na e saunoa mai. “Laauli, alu ma le Atua, ia e faamoemoe i le Atua.” O le agaga lea lau Afioga i le Fofoga Fetalai, ua ou toe faalogo i iuleo o ou matua, ina ua e gagana ia te au i le po lea. Na ou alu ai ma le mafanafana o lou loto, leaga e le faigofie le ogasami na ou asaina. Le ogasami o puapuaga ma faigata ma le faalumaina. Ta te ola fua ua ta oti, i upu ma tala, o tu ma aga na talafo ia ta ita i le mataupu lenei. Ua le faasatauro faatasi, ua le faasatauro faa-lua, ua le faa-tolu ae ua atulasi. Ae o lenei afiafi lau Afioga i le Fofoga Fetalai, o le taeao fou lenei. Ua ou manatu foi ua fuli lou tua ananafi, o ananafi ou te le toe fia manatua. Ae pau lava lea, ou te le manao i se isi o lenei Maota Fono, e na te toe savali i le ala o le ata o le oti, na ta savali ai. E ui i lea, ua tali le Atua e tusa ma faamoemoega. Lau Afioga i le Fofoga Fetalai, e momoli atu lou agaga faafetai tele, le paia ma le mamalu o le Maota, ia o lea ua outou silasila, ua outou faafofoga, e sili atu le tuga o le igoa tauleagaina ma le igoa tauleleia na i lo le fasioti o le

tagata. O au toe upu lau Afioga i le Fofoga Fetalai, ia manuteleina le faafofoga a le tatou Palemene, aemaise foi o le faafofoga mai a Samoa.

Ae o si au upu lava lea na fai, si au tusi e tuu atu i lau Afioga i le Palemia ma le Kapeneta, I may be down, but not out, and I will be back. Tonight I'm back. Faafetai mo i latou na outou lagolago ma outou tatalo i lou faamoemoe. Ua ou faamagalo foi ia i latou, o e na fai au ma o latou fili. But watch out be very careful, ou te faasaga atu.

I le agaga faaaloalo, i lau Afioga i le Fofoga Fetalai, o Samoa ua potopoto, ou aiga faafetai le toa o le tai. Lou uso ia Peseta, e mama le ma mafutaga. E silasila le lagi i lou alofa ia te oe. I'll help you man, ae ua faaaoga oe e tagata ona o isi mea. Ae ui i lea, o le a agai i luma le faamoemoe. O au nei o le tagata e tumu i le loto faamagalo, ma le agaga ou te le toe tepa i tua i nisi o tulaga. A o le agaga ma le faamoemoe, tatou o mai e fai upu a le atunuu. Tuu ia lenei mea o le fai o le faiva o matematega. O le Tulafono sili a le Atua. E sili ona inoino le Atua i le tagata na te faatupu le maseseiga o uso. Manuia lau Afioga i le Fofoga Fetalai, manuia le Palemene, manuia le faafofoga mai a Samoa. Ma le agaga faaaloalo.

**FOFOGA FETALAI:** Malo, faafetai. Ua ou manatu o lea ua faataoto e le Palemia tia o le tautiaga, maua faapena foi ona faaiu i ai lio o le masina, i saunoaga a le Afioga i le Palemia, i le saunoaga e tali fuaitau i mea sa laga e sui usufono. Ua ou manatu, e ao foi ona molimauiina e leai lava se sui usufono o le Palemene ua saunoa agai i le mataupu lenei. E oo lava i le Kapeneta, ae o lea faatoa sau le vaega lea, e le saunoaga a le Afioga i le Palemia, ona ou manatu lea, o ai ia mo i tatou, e pei foi o le tala i le tama lenei ma lana fanau e toa-lua. E le i faapea na alu le tama, toe foi mai faapea atu le tama e leai. Na matua tapena le faataliga o le atalii ina ua faapena ona toe foi mai. O le agaga lea e pei ona saunoaga a le Palemia. Ou te faafetai atu i le Afioga i le Palemia, i lou finagalo ina ia faapena..... O lima lava latou e fofola, e faamafola atu e faapena ona faafeiloai. O ai lava le sui usufono ua faapena ona toe foi mai i le tatou mafutaga o le agaga mauuluga lena, leaga o le malo e avea ma maafaafuagalulu i se mea. Ioe, o le a lava le mea e ono faamanua ai le tulai mai o ni eseese e maafaafuagalulu lava le malo. Po o le va o ekalesia po o le va o Kome ma Simi, tulou i sala le gagana po o ai lava. E maafaafuagalulu le malo o lona tiute lea. O le mea la lea e momoli atu ai le faafetai ma le faamalo Laauli. Afai o lagona na, ia malo faafetai ia te oe le uso vae atu le paia o le Palemene. Avea foi lenei avanoa e momoli atu ai le faafetai ma le faamalo i lau Afioga i le Palemia. O ai a tamā i ai le Palemene? O lau Afioga o le tama o le atunuu. Malo e le laeiina pe tau selu atu ae faapena uiga o taitai, e fetai lava e tele foi i pesega ae matua lava i le finagalo o le Atua. Ia o lea ua e faafeiloai atu ia Laauli o le faafeiloaiga lena a le tama i lona atalii foi lea sa, e i ai le tala ou te le fia tauina ae e le o se atalii faamaumauoa. Ae o le atalii sa faapena ona leiloa ona o le tele o lenei foi vaitau leaga e i ai foi le taimi tatou te mafatia ai i le tiapolo. E malo ai le tiapolo ia i tatou vagana lava o le mana o le Atua

faatoa o tatou malo lea i le tiapolo. O le mea la lea malo faafetai. Nei fao umi se lagona a o le tatou galuega ia e faapena foi maia tatou galulue faatasi. Ua maea ona talifuaitau le malo e tusa o mataupu na laga e sui usufono i saunoaga faalauaitale i le tulaga tau tupe ma le tamaoiga o Samoa ma faiga faavae tau tupe a le malo. Ua maea ona faatu le lafo ma faapea foi ona faaluaina mo le faitauga faalua o le Tulafono Tau Faaofi i le aso 26 o Me 2020.

*Na tuuina atu le Fesili ma faamaonia ai le lafo na faatuina i le aso 26 Me 2020, ma faitau faalua ai le Tulafono Tau Faaofi o le Faatatauina o Tupe Faaopopo (Nu.2) 2018/2019 ma le Tulafono Tau Faaofi o le Faatatauina o Tupe 2019/2020.*

### **TULAFONO TAU FAAOFI O LE FAATATAUINA TUPE FAAOPOPO (NU 3) 2019/2020 - iloiloga auiliili**

**FOFOGA FETALAI:** O le a sagai atu loa le Fono Aoa mo le iloiloga auiliili o le Tulafono Tau Faaofi o le Faatatauina o Tupe Faaopopo (Nu 3) i le 2019 i le 2020. I le faagasologa o le iloiloga auiliili, i le Tulafono Tau Faaofi, e mafai ona saunoa faatepa sui usufono i mataupu o lo o tusia i le pepa 2020/2021 (Nu 1). Tala Faatatau (Nu 3) o tupe maua ma tupe totogi, o le Malo o Samoa mo le tausaga faaiiina i le aso 30 Iuni i le 2020. Atoa ai ma le pepa 2020/2021 Nu 23, Lipoti a le Komiti o tupe Maua ma Tupe Totogi i Tupe Maua ma Tupe Totogi a le Malo o Samoa mo le tausaga faaiiina i le aso 30 Iuni 2020.

E tusa ai ma Tulafono Tumau e 134, e amata le Iloiloga auiliili o le Tulafono tau Faaofi i ona Faamatalaga.

### **FAAMATALAGA**

#### **VAEGATUPE MA TALA FAATATAU**

#### **O TUPE FAAOPOPO I TUPE FAATATAUINA**

#### **MATAGALUEGA FAAMATALAGA AOFAI TUPE ALU**

<b>FESOOTAIGA MA FAAMATALAGA TEKONOLOSI</b>	<b>\$40,700.</b>
-----------------------------------------------------	------------------

*Faamaonia.*

<b>AOGA TAALOGA</b>	<b>-\$500,000.</b>
---------------------	--------------------

## MA AGANUU

**FOFOGA FETALAI:** O lo o i ai Teuteuga a le Komiti i le Matagaluega o Aoga, Taaloga ma Aganuu. Tapa le afioga i le Taitaifono o le Komiti o Tupe Maua ma Tupe Totogi

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Teuteuga i le Vaegatupe Faaopoopo a le Matagaluega o Aoga, Taaloga ma Aganuu e faapea,

### “TEUTEUGA:

Ia aveese le Vaegatupe Faaopoopo e \$500,000 mai le Tala Faatatau o Tupe Faaopoopo (Nu 3) 2019/2020 mai le Matagaluega o Aoga, Taaloga ma Aganuu. O le mafuaaga, na maua e le Komiti o lo o tele tupe totoe a le Matagaluega i le tausaga faale-tupe o faagasolo nei e faaiuina ia Iuni 2020, ma o lo o gafatia ai le faatinoina o totogi a le aufaigaluega a le Matagaluega o Aoga Taaloga ma Aganuu.”

*Faamaonia le Teuteuga.*

**MATAGALUEGA  
O TUPE** **\$3,161,155.**

*Faamaonia.*

**MATAUPU TAU LE  
VA I FAFO:** **\$124,200**

*Faamaonia.*

**SOIFUA  
MALOLOINA:** **\$1,000,000**

**FOFOGA FETALAI:** Tulai mai le sui usufono mo Gagaifomauga Nu 3.

**Susuga Hon LAAULI POLATAIVAO LEUATEA:** E avatu ai se tuualalo ma se fautuaga foi i le Afioga i le Minisita, ona o le faatulai mai

o lenei vaiatau o le tatou puipuiga. E le gata i le faamai o tatou feagai ai nei i le Koviti ma le Misela, ma le tele o isi faamai oti, kanesa ma isi mea eseese. Na ona ou toe faatepa lava ma avatu le faamanatu i lau Afioga i le Minisita e aoga ona faamapue ma fesoasoani atu. Pe faamata e mafai ona toe silasila le Afioga i le Fofoga Fetalai i le tatou Komiti faa-palemene foi lea o le SPAGHL. O lea sa tulai ai le paia ma le mamalu o le Palemene e faagasolo uma i tua mo le non communicable diseases. E cover uma ai asiasiga i falemai o faleaiga, faleaoga e asiasi ai le tulaga o le cleanness ma tulaga uma i faleletaua ma mea sa i ai. O lou taofi lau Afioga i le Fofoga Fetalai, sa taua tele lenei mataupu. Ona sa fanafanau mai ai le nisi o tatou poloketi lelei, ina ua matau ua tapunipunia nisi o faleaoga ona o le faaletonu. Ae na ona o lau tuualalo i le silasila mamao ma le effective, o le silasila mai o le tatou atunuu i le aafia atu o le tatou Palemene lenei i le Komiti faa-Palemene, ina ia mafai ona uunaia le puipuiga, i le taua o le afio atu ma tala atu aao o le Komiti faa-Palemene, e asiasia uma tulaga uma e fesoasoani i le tatou Malo. E na ona faapena atu lau Afioga i le Minisita, ma le agaga taua ina ia fesoasoani atu i mea lava ua tatou i ai i puipuiga i lenei taimi. Aemaise ua feagai tatou ma le tele o faamai oso faalalava mai. Ma lou agaga faaaloalo lau Afioga i le Fofoga Fetalai.

**FOFOGA FETALAI:** Malo faafetai. Tulai mai le sui usufono mo Salega.

**Tofa OLO FITI AFOA VAAI:** Faafetai lava i lau Afioga mo le avanoa, e puupuu foi lava nai...ou te iloa sa matauina i le taimi o le misela, le uiga o lau faamatalaga ia le tulaga o le toe aumai o le tatou supply okesene i Tutuila. Ou te manatu lau Afioga i le Fofoga Fetalai, e ao ona toe silasila le Minisita ma le Matagaluega i le tatou oxygen plant. E tatau ona faatele ma ia lava ai ni mai aemaise le Corona lea ou te vaai atu e manaomia ai tagata mamai foi ia. E 20 tagata pe 30 ae le lava a tatou okesene o lo o i ai. Na o sina fautuaga e silasila i ai. O le isi vaega lau Afioga i le Fofoga Fetalai, o le tulaga lea i se tatou back up o le tatou CT Scanner. Ou te iloa foi lena sa i ai le taimi sa tuu ai gasegase o le tatou atunuu i Tutuila, ina ua faaletonu mai le tatou CT Scanner, e tele lava nai mea ia e tuu ae ave le faamuamua i mea ia ona o le tulaga o le Soifua Maloloina o le tatou atunuu. Ma le faaaloalo.

**FOFOGA FETALAI:** Se i tulai mai le Palemia.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, masalo toe 8 itula o le Tala o le tupe lea ona uma loa lea. Ne i te i ua soona faaopopo mai ni mea. Ae o taeao e uma ai le tausaga faaletupe e agai i ai le tala faaopopo ne i te i ua galo i sui usufono.

**FOFOGA FETALAI:** O le tala autu lea, e i ai mataupu lea e te lua saunoa i ai, ae o le Tala Faaopoopo lea e tatou te i ai. Ae ua manaia foi le aumai se i tapena i ai.

*Faamaonia le \$1,000,000 mo le Soifua Maloloia.*

**FAAMASINOGA  
MA PULEGA TAU  
FAAMASINOGA:** **\$530,600**

*Faamaonia.*

**PUNAOA  
FAALENATURA  
MA SIOSIOMAGA:** **\$134,400.**

*Faamaonia.*

**TIUTE MA TUPE  
MAUA:** **\$150,000.**

*Faamaonia.*

**KOMISI  
O LE AUFAI-  
GALUEGA  
A LE MALO** **\$107,930.**

*Faamaonia.*

**FUAINUMERA  
FAAMAUINA:** **\$123,020.**

*Faamaonia.*

**PULE MA  
SUETUSI SILI.** **\$39,950.**



*Faamaonia.*

**FONO AOA O FAITULAFONO: \$86,300.**

*Faamaonia.*

**KOMISI O FAIGA PALOTA: \$210,642.**

*Faamaonia.*

**KOMESINA O SULUFAIGA: \$115,000.**

**FOFOGA FETALAI:** O lo o i ai le Teuteuga a le Komiti o Tupe Maua ma Tupe Totogi i le Ofisa o le Komesina o Sulufaiga.

Tapa ma le faaaloalo le Afioga i le Taitaifono o le Komiti o Tupe Maua ma Tupe Totogi.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le Teuteuga i le Ofisa o Komesina o Sulufaiga e faapea:

**“TEUTEUGA:**

Ia aveese le \$95,000 mai le Vaegatupe Faaopoopo a le Ofisa o le Komesina o Sulufaiga mo le faatauina o le taavale ma suia le aofai o vaegatupe i le \$20,500. O le mafuaaga, ua maua e le Komiti o lo o faatatauina i le Tala Autu o le Tupe 2020/2021 le \$125,000 mo le faatauina o le taavale fou lava lea e tasi ma le faaaloalo. Sa le tatau la ona faatatauina se vaegatupe i le Tala Faatatau o Tupe Faaopoopo (Nu.3) 2019/2020.

*Faamaonia le Teuteuga.*

**AOFAI FAAOPOOPOGA I TUPE ALU AOA O 2019/2020 e \$6,324,398**

**FOFOGA FETALAI:** O lo o i ai le Teuteuga i le Aofai Faaopoopo i Tupe Alu Aoa 2019/2020.

Tulai mai le Afioga i le Taitaifono o le Komiti o Tupe Maua ma Tupe Totogi.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le Teuteuga i le Aofai Faaopoopoga i Tupe Alu Aoao mo le 2019/2020 e faapea:

**“TEUTEUGA:**

Ia aveese le fuainumera \$6,324,398 ma suia i le fuainumera \$5,729,398.

*Faamaonia le Teuteuga.*

**FAAMATALAGA LONA LUA.**

**FAAITITIGA I TUPE FAATATAUINA**

**MATAGALUEGA FAAMATALAGA FAAITITIGA I TUPE ALU**

**TUPE** **-\$ (950,000).**

*Faamaonia.*

**MATAUPU TAU** **-\$ (45,872).**  
**LE VA I FAFO.**

*Faamaonia.*

**FAAMASINOGA MA** **-\$ (223,200).**  
**PULEGA TAU**  
**FAAMASINOGA.**

*Faamaonia.*

**PUNAOA FAALENATURA** **-\$ (105,000)**  
**MA SIOSIOMAGA.**

*Faamaonia.*



**FUAIUPU 1 MA LE IGOA:**

**FUAIUPU 1: Igoa Puupuu ma le Amataga.**

**IGOA: Faatatauina o Tupe Faaopoopo (Nu.3) 2019/2020.**

*Faamaonia.*

*Na faagasolo le Tulafono Tau Faaofi mo le Faatatauina o Tupe Faaopoopo (Nu.3) 2019/2020 faatasi ma Teuteuga.*

**TULAFONO TAU FAAOFI O LE FAATATAUINA O TUPE  
FAAOPOOPO (Nu.3) 2019/2020 – faitauga faatolu.**

**FOFOGA FETALAI:** Ma lou faaloalo ou te tapa le Afioga i le Minisita o Tupe.

**Afioga Hon SILI EPA TUIOTI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.3) 2019/2020 i lona faitauga faatolu.*

*Faaluaina e le Minisita mo Aoga, Taaloga ma Aganuu ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.3) 2019/2020 i lona faitauga faatolu ma ua faapea ona pasia e le Fono Aoao Faitulafono.*

**TULAFONO TAU FAAOFI O LE FAATATAUINA O TUPE  
2020/2021 – iloiloga auiliili.**

**FOFOGA FETALAI:** O le a sagai atu le Fono Aoao i le Iloiloga Auiliili o le Tulafono Tau Faaofi o le Faatatauina o Tupe 2020/2021 ma Tala Faatatau Autu o Tupe Maua ma Tupe Totogi a le Malo o Samoa mo le tausaga Faaletupe Faaiuina aso 30 Iuni 2021 faapea le Pepa 2020/2021 Nu.24, Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le malo o Samoa mo le Tausaga Faaletupe Faaiuina aso 30 Iuni 2021.

E tusa ai ma Tulafono Tumau 134, e amata Iloiloga Auiliili o le Tulafono Tau Faaofi i lona Faamatalaga.

## FAAMATALAGA MUAMUA

### VAEGATUPE MA TALA FAATATAU

#### MATAGALUEGA: FAAMATALAGA AOFAI TUPE ALU

**FAATOAGA MA FAIGAFAlVA:** **\$19,383,976.**

**Susuga Hon LAAULI POLATAIVAO LEUATEA:** Lau Afioga i le Fofoga Fetalai...

**FOFOGA FETALAI:** Tulai mai le sui usufono o Gagaifomauga.

**Susuga Hon LAAULI POLATAIVAO LEUATEA:** Faafetai, faafetai mo le avanoa. O nai fautuaga ma manatu e avatu e ala i le tatou poloketi mo le faaleleia auiliili o tatou faalapotopotoga e fesoasoani i ai le Matagaluega. E matauina pea le agaga faafetai i le ave pea o le \$300,000 lea i le tatou WIPDI i tausaga uma ona o lo o taua foi le latou galuega e fai. Na ala ona matou soso atu, o lo o i ai ia tatou Asosi o Faifaatoaga i Upolu ma Savaii. Pe mafai ona silasila mamao lau Afioga i le Minisita, i talosaga a Faalapotopotoga o le afaifaatoaga mo Savaii ma Upolu. E taua foi le latou galuega faaauau mo mea ia.

Ia malie lau Afioga i le Fofoga Fetalai ua ou tapa le tulaga lea i le talosaga lea a nai tagata fai faatoaga i Savaii e 12 talosaga lea i totonu o le tatou Agrobusiness. Masalo o lena e silafia foi e le Minisita o Tupe. Ua leva ona aumai talosaga nei i totonu. Ae na ona avatu lau Afioga i le Minisita se i alofagia, ua i ai le faaupuga faapea e fai lava si faigata o requirements ma mea o lo o aumai. Ia na ona lafo atu i ina, e 12 talosaga a le faalapotopotoga o le aufai faatoaga i Savaii se i faamanatu atu ma lou agaga faaaloalo.

**Tofa OLO FITI AFOA VAAI:** Lau Afioga i le Fofoga Fetalai...

**FOFOGA FETALAI:** Tulai mai le sui usufono o Salega.

**Tofa OLO FITI AFOA VAAI:** O le vaega lea 6 faamolemole. E leai e na o le... talu ai lau Afioga i le Fofoga Fetalai ona o le Tala o le Tupe Autu mulimuli lena o le Paeaiga... ae i le 2018, sa ou fesiligia ai lava le tulaga lea i le tupe maua lea a le Ofisa o Faigafaiava i mo dividends ia mo le lesitalaina o vaafagota. O lea ou te fesili atu ai i le... ua ou toe fesili atu aifo ai aua e le i taliina foi lena fesili i le 2018, po o fea o i lalo i i lea e agai ai le tupe lena? O le fesili lena lau Afioga i le Taitaifono ma...

**FOFOGA FETALAI:** Malo faafetai, ia se i tulai mai le Minisita.

**Tofa Hon LOPAOO NATANIELU MUA:** Lau Afioga i le Fofoga Fetalai, e pei lava sa i ai i lena vaitaimi sa faamalamalama e le Minisita o Tupe, o tupe na e sau mai le Va i Fafu Foreign Affairs alu ai i le teugatupe a le Matagaluega o Tupe. O lena ua uma ona faamanino i lena vaitaimi, ia o lea lava... o lea ua toe fesili mai ae pei o le tulaga lena, o na sa i ai i lena vaitaimi 2018 e pei ona tuuina mai le fesili ma le faaaloalo.

**FOFOGA FETALAI:** Malo faafetai se i...

**Tofa OLO FITI AFOA VAAI:** Lau Afioga e pei ona ou tulai atu, leaga o lea e manino lava le tupe lea i lalo o le Ofisa o le Tupe le tupe lea i lalo o le space, le space... O lea la e i lou mafaufau e tataua ona maoti mai faapena le tupe. Ae o lea la ou te fia iloa po o fea tonu la o le Matagaluega o Tupe lea e tuu ai? Leaga o lea ou te iloa o la e tutusa mai ma isi tausaga.

**FOFOGA FETALAI:** Masalo o lea sa... masalo o lea sa faamanino e le saunoaga a le Minisita o Tupe ia tulaga uma lea. E tele lava le ogasami lea sa taualo i ai le tulaga lea, ui i lea... se i tulai mai lava le sui usufono o Gagaifomauga Nu.3.

**Susuga Hon LAAULI POLATAIVAO LEUATEA:** Lou avanoa faalua lau Afioga i le Fofoga Fetalai, o le mataupu lava lea o faifaatoaga. E matau lava ma le faanoanoa le saunoaga a le Minisita i le tatou fai lea Isaraelu. Ua fai lava si tele o le tatou poloketi lenei. Na ou taunuu atu i le Matagaluega o se poloketi na amata e le Afioga ia Le Mamea. Ia ona ou alu atu lea o au faaauau ona o le talitonuga ua uma ona fai le suesuega a le Matagaluega, tele ma anoanoai le suesuega na fai i lalo o le tatou SACEP Programme. Ae o lea ua ou matau atu nei ua fai, fai, fai a tatou toga fai ae toe faalava le Matagaluega toe ban lava e tatou, tatou fai. Ia ua ou vaai foi ma le atugaluga ua matua tumu i le faanoanoa le au fai faatoaga fa'i pei e foliga mai ua toe autago i le mea lenei a o lea na fai le poloketi ae o tatou o lea toe taofi. O le mea e leaga ai e le o polokaina mai fafo le avatuina o le fai, toe poloka lava e tatou, tatou. Na ona ou faapena atu lau Afioga i le Fofoga Fetalai, e le matagofie le mea lea ua uma ona fai suesuega a le Matagaluega ma Minisita sa i ai muamua, ia ae alu atu le isi Minisita toe taofi. O le agaga lea ma le faaaloalo.

**FOFOGA FETALAI:** Ia o lea ua maua atu ia...

**Tofa Hon Lopao Natanielu Mua:** Faafetai mo le finagalo ua faaalua. Ia o le mea muamua, o le a ou le toe taea i tua suesuega na fai ma le tulaga ua i ai. Na pau lava le mea ua silafia uma e le aufai fa'i i le taimi lenei o le tau o le tausiga o le fai e le maualalo, ma o le toatele o i latou e le mafai ona gafatia. A o ai e tuuaia? ou te le o tuuaia atu se isi pau lava le mea o le tilotilo i results. A o le tulaga lea e uiga i le fai e le i taofia,

na o matou taofia le Asosi i le ave o le fai i fafo ona ua taunuu atu le latou container i Niu Sila e 60 pusa fai e le taliaina.

Toetiiti lava ban ma taofi ai i ina ma le tatou pathway. O le auala na fai ai le tulaga lea ma le faaiuga na fai, na vave ai ona toe aumai le confidence a le NPI ona o lea tatou te faia auala tatau e talafeagai foi mo le vaavaaia o le latou interest mo le aafia o a latou faatoaga. Taunuu atu le pusa fai lea i Niu Sila, 60 pusa fai ua pula ae le tatau ona pula, o le ala la lina na matou taofia ai le Asosi aua nei toe aveina se tou container fai sei outou omai e galulue ma vaavaai i le mea na ala ai ona fail le tou container muamua le la. O le auala lina lau Afioga na ala ai ona taofi ona o le puipuga o la tatou pathway ma le puipuga o Niu Sila ma le faaaloalo.

**FOFOGA FETALAI:** Ia malo faafetai, o Laauli o le tagata faifaatoaga, o le taimi. O le taimi a sese le taimi e taunuu atu i o ua pula le fai. E faigofie lava. O le mea foi lea ua uma foi avanoa o sui, o le a tatou faasee atu i le tatou.... O le a tuua tu le fesili...E i ai se isi mea aua ua uma avanoa tai 2 o sui usufono ia. Lelei.

**TULAFONO TAU FAAOFI O LE FAATATAUINA O TUPE  
2020/2021 – iloiloga auiliili.**

**FAAMATALAGA MUAMUA**

**VAEGATUPE MA TALA FAATATAU**

**MATAGALUEGA: FAAMATALAGA AOFAI TUPE ALU**

*Faamaonia.*

**PISINISI ALAMANUIA MA LEIPA: \$20,139,982.**

**Susuga Hon LAAULI POLATAIVAO LEUATEA:** Lau Afioga i le Fofoga Fetalai...

**FOFOGA FETALAI:** Tulai mai le sui usufono o Gagaifomauga Nu.3. Saunoa lau Afioga...

**Susuga Hon LAAULI POLATAIVAO LEUATEA:** Si mea laitiiti lava lea, ua atagia foi i lenei vaitau ia mea o lo o tatou vevesi ai, i pisinisi lea mai fafo lea e omai tauave mea o manufactures i inei i lo tatou atunuu. Ia tuu tuu atu pea i tafatafa o lau Afioga i le Minisita ia le mea lea o le tatou Reserve List. Ia toe silasila ifo lava i pisinisi ia e tatau ona fai e tatou, ia ma pisinisi e tatau ona e fai e Investors ia mai fafo.

E matauina lava ma le faanoanoa o le a i ai le mea lea o le take over. Ia ae manaia ia le toe faamalosia o le tatou reserve list lea mo tatou tagata. I tulaga ina ia aua ne i fesopoai latou e maualuga le tamaoaiga, ia ma le taumafai atu o nai o tatou tagata. E faamanatu atu ai lava ma silasila lau Afioga i Minisita aemaise ai foi le faatulagana o oloa ia e faataga ai tagata mai fafo i le standard control.

Aua e pei o le mea lea sa ou taua i le mea foi lea o le aveina o le ava, ia ua tuu talaloga tele ia mea ia na tatou vaai ai toeitiiti lava atoa le 10 tausaga o tatou mafatia i le leai o se ava e mafai ona toe ave i fafo. Ia ona o le mea lenei o le faatamala ma le tuulafoai, ia na ona o atu e vaai ae leai se restriction o mea o lo o gaosi ai mea i atunuu i fafo.

Tautala lava ma le faaaloalo i le mea lea o le nonu lea na ou taua foi. O la e faalogologo mai ia le Asosi o le Aufainonu. Quality control is very important. Ae o lea na ou fai atu, ua tau faasoloatoa ma mea moto. A tapuni la le maketi o le kamupani lea, ua tapuni Samoa atoa. O lea foi ua ou maua le finagalo o le Minisita o Faatoaga, ia o le puipuiga lena o borders o tatou. Na ona ou faapena atu lau Afioga i le Minisita, ma lou agaga faaaloalo.

**Tofa OLO FITI AFOA VAAI:** Lau Afioga...

**FOFOGA FETALAI:** Tuu atu le avanoa i le sui usufono o Salega. Tulai mai e saunoa.

**Tofa OLO FITI AFOA VAAI:** Leai na ona ou faafesili atu lava i le tulaga lea mea nei o asosi ma kamupani i latou financial statements. E talitonu lava e le o mulimulitai le... pe le o faamalosia e le Matagaluega tulaga na. Aua e tele lava nai mau faafitauli na ou te maua i le tatou Matagaluega i le leai o ni a latou monthly financial statements. E oo foi i se tala o le tupe a le HRPP, ou te iloa foi e le o i ai foi mea faapena i le tou Matagaluega. E pei o lea ua amata soli atu ai e le HRPP le Tulafono, mea ia o le avatuina o le mea na.

O le mea lona lua lau Afioga i le Fofoga Fetalai, o le tulaga foi lea mo mea o police reports a Investors foi ia e omai mai fafo. Aemaise o atunuu foi ia e...

**FOFOGA FETALAI:** Po o fea mea taitasi ia e faasino i ai le saunoaga a le sui usufono?

**Tofa OLO FITI AFOA VAAI:** O le 6 lau Afioga. Ia ma le isi la mea o le Police Report ia aemaise la si vaega ia e ese ia le latou gagana. Ou te talitonu lava e leai se siaki lelei, siaki lelei o latou Police Report pe FaaSaina pe FaaAsia le latou... o lea e avatu ai se fautuaga i lau Afioga i le Minisita, se i silasila ifo ai i le vaega lea ma le agaga faaaloalo.

**FOFOGA FETALAI:** Taoto atu i lau Afioga i le Minisita, ia se i tulai mai le Minisita.



**Afioga Hon LAUTAFI FIO SELAFI PURCELL:** O le mataupu lea sa laga e le sui usufono i le tatou reserve list, ia o la e lava e tumau ia le tatou reserve list i le lisi na. E le mafai e investors mai fafo e le o ni tagata Samoa, ona faaauau ia isi lisi ia o i lalo o le tatou reserve list.

O lisi o tatou investors ia e omai i nuu ia o Saina, ia o lea ua tagatanuu o Samoa. O lea la e mafai ai ona latou faia mea ia o lo o i totonu o le tatou reserve list. Ae o la foi ua toe i ai le review a le tatou reserve list a e fai, ia pe le tatau ona faaopoopo i ai nisi vaega. Ae o le reserve list na lea e tumau, o lea lava e tumau. E pei ona fai atu e faafaigofie i nisi, ia leaga o lea ua sitiseni Samoa. O lea ua mafai ai ona latou faafoeina, ma o lo o mataitu e le Matagaluega ia latou nei e fou, ma e le o ni tagata Samoa, e le mafai ona latou faia mea ia.

O le tulaga lea na saunoa i ai le sui usufono mamalu lea, e le o... o tatou investors, e pei ona ou talanoa foi analeila, e i ai le naunautaiga, e faafaigofie ia investors na omai. O le mea lena e fiafia ai e omai, e le tele ni restrictions. E pei la o mea ia e tatau ona avatu ia le financial statements, i masina uma po o tulaga faapena.

E pau le vaega lea e faamalosia, o tagata foi ia e omai i lalo o tatou citizens by investment, citizenship by investment. O latou na e i ai le tulaga lena, e aumai ia latou financial statements i masina uma faapena. O vaega ia e lesitala ia le HRPP, e leai se manaoga e avatu ai ia latou... seiloga e i ai se manaoga pe afai e i ai se... there is a reason to doubt, o la e le o sao ia latou mea ia. Ia a leai, o la e...

**Tofa OLO FITI AFOA VAAI:** Lau Afioga i le Fofoga Fetalai...

**FOFOGA FETALAI:** Se i tulai mai le sui usufono.

**Tofa OLO FITI AFOA VAAI:** O le avanoa faalua, a e alofa lau Afioga i le Minisita se i e silasila i ai o lena e i ai.

**Afioga Hon LAUTAFI FIO SELAFI PURCELL:** Ia e fai mai lava oe o la e i ai, ae o lea ou te fai atu e leai, ua uma lau faalua.

**Susuga Hon LAAULI POLATAIVAO LEUATEA:** Lau Afioga, o si mea laitiiti lea o le a ou fai atu sao o mea ia tau faatoaga. A lea ua ou vaai o la ua faatu le fruit shop and vegetable shop a isi tagata mai fafo. O le manumanuga lena ia te au. Ua ou vaai foi ua o le isi au... e i ai le Initia lea na tau mai i le atu Falealili i le isi vaitaimi o le alu atu e fai lava ia le commercial farm, taro farm. Ia ma le toatele o isi Asia e ta ma ta mou pe a ota alu atu i le maketi o saofai mai se isi tagata ese ma faatau mai ia ta ita talo ma vegetable garden.

E pei o le agaga lena, ia tumaoti mai pea leaga o le tatou atunuu e agai i le laueleele. O se mea le matagofie ia le tatou oo atu i le isi 5 tausaga, tatou o atu, ua tumu mai tagata mai fafo le maketi e toe faatau mai ia tatou ia fua o faaeleeleaga. Agai pea latou i se category, export

manufactured only. Ae o le maketi lava ia o le tatou local produce, ia o lea ua ou vaai, o tagata o nai tagata faifaatoaga ma vegetable garden ia sa latou supply uma vaafagota ia o le Longline ma le vaega lea sa i tai i le uafu, e 20 ma ona tupu vaafagota mai fafo, ua leai ma se Samoa ua toe supply ina. O la ua supply uma lava e tagata Saina ia vaafagota ia. O le talosaga lena. O lea ua avatu ai le talosaga i le Minisita, e fuafua ai ia le tatou reserve list.

**FOFOGA FETALAI:** Tulai mai lau Afioga i le Minisita...

**Tofa Hon LOPAOO NATANIELU MUA:** O le mataupu lea leaga o lea ua oo i le Matagaluega e... ua tea le Matagaluega o Faatoaga, e le i fai mai le fesili lea. Ae o le mea la lena o lea e fai atu leaga e tatau foi ona ou tu atu e tau faasao mea ia. Ana o isi foi tagata Saina ia e pei ona taua i le taimi ua tea, o tagata ua sitiseni Samoa. E fai foi o latou aiga Samoa ma fai o latou faatoaga e pei o le tulaga lena lau Afioga e tau faamalamalama atu ne i te i ua ave sese le mataupu lea, o la e faafogafoga mai le atunuu. Lau Afioga ma le faaaloalo, ae e pei o tulaga ia i mea tau ia o la e faatau lava ia vegetables a le tatou aufaifaiva.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai, se o au lea e paso i mea nei e tatou te fai... e leai ma ni mea faapena o lea ua tatou oo i le MCIL. Ou te leiloa po o a mea ia e talanoa mai ai, e ala la ona ou fai atu, o le a tauau ina agai i luma agai i tua ia le... ia ona talanoa mai lea i Saina, ae o le alii le la e tele ana Saina ia e feoi solo. O le a la le mea o le a tusingitua ai i isi Saina ae le vaai i ana ia Saina?

**FOFOGA FETALAI:** Ia, malo faafetai...

**Susuga Hon LAAULI POLATAIVAO LEUATEA:** Ne i te i ua tau le pua ma lafo mai, e le o ni au Saina, o Saina e international e o i fafo. O tagata e omai i totonu o le atunuu. O tagata faipisini i le Malo ae e le o se Saina a au. O ia o lo o faipaaga ma lou itumalo.

**FOFOGA FETALAI:** O lea ua tolu ou avanoa ua uma ou avanoa.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai, e i ai le mea lea e tupu. Leaga o lea ua uma ona faamatala atu e le Afioga i le Minisita, e i ai tagata Saina ia ua sitiseni. O lea foi e ia te au ia le tusi mai o o lau Saina la e te lua fia o i o i Sina e fai ia lua pisinisi i Saina. O le a la le mea e te tusingitua ai i Saina ae faafefea au Saina? Se o le mea lea e ala ai ona pisa tatou.

**FOFOGA FETALAI:** Ia, malie, malie...

**Susuga Hon LAAULI POLATAIVAO LEUATEA:** Ioe lau Afioga i le Fofoga Fetalai, e ese le mataupu lea sa ou tulai atu ai. E le faamaonia foi le la upu ou te alu e ave ia au Saina i fafo. O le mea lea e tele ai lo tatou pisa o le tau o le pua ma lafo mai. O lea e talanoa atu aua le tatou reserve list.

**FOFOGA FETALAI:** E a foi... e faapena. Ia e faigata ona faamanatu le itu lea leaga ua faafia ona ou tuualalo i le tulaga lea e lelei lava ona saunoa foi lenei, i se mea e laga e le Malo, ia ona ta mei ese lea, aua e le faapea e lilo i lalo, e tatau foi ona tulai atu le Malo ia e talifuaitea e faatusa foi i le mea na saunoa i ai le sui usufono mamalu. Ia o le mea la lea, tatou see ese ia ma lea tulaga... ae...

**Afioga FUIMAONO TEO SAMUELU TEO:** Lau Afioga i le Fofoga Fetalai...

**FOFOGA FETALAI:** Ae a pe a malie...

**Afioga FUIMAONO TEO SAMUELU TEO:** Leaga o lea e faafofoga ia si o matou itumalo, o lea foi sa afea i le saunoaga a le sui usufono, ia ma le faafofoga tapuai mai o le itumalo o Falealili. Masalo o le Initia lea e tau afe, aua o lea ua uma Saina ae o lea o le a oo i Initia, se i ou tali atu la i si Initia lea. O si Initia lea sa tau fesoasoani mai i si o matou itumalo, talu ai ona ua avatu ia le tatou container talo lea, lea la ua...

**FOFOGA FETALAI:** E leai se mea o le a te i ua taua ai fua lau Initia ae le o aafia i i le talanoaga lea.

**Afioga FUIMAONO TEO SAMUELU TEO:** Ia, leaga o lea e taua le igoa o le itumalo. Mo le faapuupuuga foi lea, na manao le Initia e sau e fai le faatoaga tele lava i le matou itumalo e sapalai atu ai le vaega lea, ae te i ua ou vaavaai atu, e leai se mea a le itumalo e maua ai. Ia o la e la ua ou toe tulia, o la e ua toe foi i Niu Sila le Initia lea, e le o toe i ai la i inei, e le o lavea la i lalo o le reserve list le mea lea. Ma lou faaaloalo.

**FOFOGA FETALAI:** Se i malie lava le Palemene, se i tuu atu lava le avanoa i le... Ia, se i saunoa mai le sui usufono mo Palauli Sisifo.

**Afioga AFOA AMITUANAI FALEULU MAULI:** Faafetai i lau Afioga i le Fofoga Fetalai mo le avanoa...

**FOFOGA FETALAI:** O fea le mea taitasi lea e te saunoa i ai?

**Afioga AFOA AMITUANAI FALEULU MAULI:** O le sitiseni pisinisi lea sa taua e le Minisita faamolemole.

**FOFOGA FETALAI:** Tatou te le o i ni sitiseni.

**Afioga AFOA AMITUANAI FALEULU MAULI:** Mo pisinisi foi nei e fai mo tagata sitiseni foi ia.

**Susuga Hon TUILAEPA AUJELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, se i ou fesoasoani atu lava. A saunoa le sui usufono, tau mai po o fea o i lea e laga ai lau mataupu. E leai se mea o i ai i i. Talanoa i le Budget, a o lea o le a e toe lauga faalauaitete. E tutusa lelei lava outou na e toatolu. Ia, talanoa i le mataupu ma tau mai po o fea le mataupu po o fea le numera pe \$200,000 lea e i i.

**FOFOGA FETALAI:** Malo faafetai. O le mea lena e tau fesoasoani atu ai, ioe, ua avea se lota alofa atu ia outou ma le ava atu ia outou ma mea... ia taoto maia. Ia ae aua le toe faia. Ia a toe ae aua le toe faia?

*Faamaonia le \$20,139,982 mo Pisinisi, Alamanuia ma Leipa.*

**FESOOTAIGA  
& FAAMATALAGA  
TEKONOLOSI:** **-\$7,711,384.**

*Faamaonia.*

**AOGA, TAALOGA  
& AGANUU:** **-\$124,636,643.**

*Faamaonia.*

**TUPE:** **\$133,339,464.**

*Faamaonia.*

**MATAUPU TAU LE  
VA I FAFO MA** **\$26,749,153.**

**FEFAATAUAIGA:**

**Susuga Hon LAAULI POLATAIVAO LEUATEA:** Lau Afioga i le Fofoga Fetalai, ou te tulai ou te tulai atu ma le faaaloalo, o le mea 3.0 seia oo i le 3.11.

**FOFOGA FETALAI:** Ia, tulai mai le sui usufono mo Gagaifomauga Nu.3.

**Susuga Hon LAAULI POLATAIVAO LEUATEA:** O tupe faaalu nei o tatou post foi ia i fafo, o Amapasa ma tatou tagata foi nei e fai ma sui o le tatou Malo e represent ina le tatou atunuu i fafo. E talosaga lava ma le faaaloalo i le mamalu o le Kapeneta ma lau Afioga i le Palemia, ona ua fai lava si leva o tatou maua mea nei o post foi nei, pei foi lea air point. A o lou agaga ma le faaaloalo ma se tuualalo, pe faamata ua tatau ona oo i se taimi e faasalalau aloaia ai avanoa nei ina ia mafai ona saofaga uma i ai le atunuu e mafai ona apply uma i ai tagata. O le agaga lena ina ia...

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, e le mafai ona faasalalauina tulaga ia, o tulaga faapitoa. E le mafai ona faasalalauina o tulaga faapitoa mo i latou e manatu le Malo ua talafeagai.

**FOFOGA FETALAI:** Ia, o le tali lena.

**Susuga Hon LAAULI POLATAIVAO LEUATEA:** Ia, o le a foi se lagona lau Afioga i le Fofoga Fetalai ona e matauina pea performance duty ma le tauavega ina ia afea le atunuu atoa, o ai e fia apply i avanoa ia, apply. Ae pei o le agaga lena na ala ai ona avatu le tuualalo, ae pule outou.

**FOFOGA FETALAI:** Malo faafetai.

*Faamaonia le \$26,749,153 mo Mataupu Tau le Va i Fafo ma Fefaatauaiga.*

**SOIFUAMALOLOINA:** **\$128,495,959.**

*Faamaonia.*

**FAAMASINOGA & PULEGA TAU FAAMASINOGA:** **\$13,817,618.**

*Faamaonia.*

**PUNAOA  
FAALENATURA  
MA SIOSIOMAGA: \$26,846,930.**

*Faamaonia.*

**LEOLEO: \$35,141,515.**

*Faamaonia.*

**PALEMIA: \$8,411,237.**

*Faamaonia.*

**TUPE MAUA: -\$13,172,045.**

*Faamaonia.*

**TINA MA TAMAITAI,  
ATINAE O NUU MA  
AFIOAGA MA  
AGAFESOOTAI: \$10,755,210.**

*Faamaonia.*

**GALUEGA,  
FELAU AIGA &  
ATINAE ESEESE: \$70,858,658.**

*Faamaonia.*

**OFISA O LE LOIA SILI:** **-\$5,337,037.**

*Faamaonia.*

**PULE MA SUETUSI SILI:** **-\$3,978,992.**

*Faamaonia.*

**KOMESINA O FAIGA PALOTA:** **-\$8,270,121.**

**Susuga Hon LAAULI POLATAIVAO LEUATEA:** Lau Afioga i le Fofoga Fetalai...

**FOFOGA FETALAI:** Ia, se i tulai mai le sui usufono mo Gagaifomauga Nu.3. Tulai mai Laauli.

**Susuga Hon LAAULI POLATAIVAO LEUATEA:** E fia avatu lava le talosaga ma le agaga faaaloalo i le tatou Komesina o Faiga Palota e pei foi ona saunoa atu nisi o sui usufono o le motu nei, a maua lava le fesoasoani mo le vaa, ua lava lea mo matou mo lenei taimi. Taatia ia pasi ma mea uma e fai e isi.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai se i tau tonu mai lava le mea lea e agai i ai le saunoaga, o le a le numera?

**Susuga Hon LAAULI POLATAIVAO LEUATEA:** O le tapenaga o le tatou faiga palota. Ma lou agaga faaaloalo.

**FOFOGA FETALAI:** Lau Afioga i le sui usufono mamalu, e pei lava foi o oe sa e seei i inei i le Nofoa. O le tulai mai lava o mea taitasi e tatau ona faamuamua mai po o fea mea taitasi o lea e te fia saunoa i ai lau Afioga o taua ai le tulaga lea e te fia saunoa i ai. Afai e le mafai o le a faapena ona faaauau le tatou galuega.

*Faamaonia le \$8,270,121 mo le Komesina o Faiga Palota.*

**FONO AOA O FAITULAFONO: - \$6,886,059.**

*Faamaonia.*

**KOMESINA O SULUFAIGA: - \$1,583,361.**

*Faamaonia.*

**KOMISI A LE AUFALUEGA A LE MALO: - \$5,154,961.**

**Tofa LEALAILEPULE RIMONI AIAFI:** Lau Afioga i le Fofoga Fetalai, ou te fesili atu i mea taitasi na 1 e tau i le 8.

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:** Lau Afioga se i aumai po o le a tonu lava le numera lea e 1 e oo i le 8. O le a tonu lava le mea lea e fia saunoa i ai le sui usufono, o lea matou te fia tilotilo i ai.

**Tofa LEALAILEPULE RIMONI AIAFI:** Ia ua lava ia le 8 lau Afioga e faaoga. Aua o lea ou te fia fesili i le Taitaifono o le Komiti o Tupe i le vaega tonu lea ona o lea foi e tuufesili mai le matou Matagaluega po o le a le justification e ao ai pea ona fesiitai ese totogi nei o le principal level a le PSC fuafua i Matagaluega uma a le Malo. Ua leva ona tau mai o le a stream line totogi, a o lea e foliga mai e matua fesiitai lava totogi o le vaega lea pe a fuafua i Matagaluega uma a le Malo. E pei e atagia ai e le o talafeagai. O isi principal level ia e ia matou, ua tai 10 tausaga tai 20 tausaga o la e lava e i lalo o le entry point, a o lea e faasalalau entry point a le vaega lea e i luga i le totogi maualuga i le \$60,000. E fia maua se faamalamalamaga ma le faaloalo lava. Faafetai.

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:** O le faamalamalamaga o le mea lena, afai lava e tumau ai pea le entry point o lona uiga e le tatau lava ona suia.



**KOMISI A LE  
AUFALUEGA  
A LE MALO:**

**-\$5,154,961.**

*Faamaonia.*

**GALUEGA TAU  
ALAMANUIA  
MA ATINAE  
A LE MALO:**

**\$2,888,293.**

*Faamaonia.*

**OFISA O  
FUAINUMERA  
FAAMAUINA:**

**-\$5,629,929.**

*Faamaonia.*

**KOMISI O LE  
TOEFUATAIGA  
TULAFONO  
A SAMOA**

**\$1,445,678.**

*Faamaonia.*

**AUAUNAGA TAU  
FALEPUIPUI MA LE  
TOEFUATAIGA:**

**\$8,060,410.**

*Faamaonia.*

**AOFAI O TUPE ALU AOA O FAATATAUINA A  
MATAGALUEGA 2020- 2021 - \$688,694,610.**

*Faamaonia.*

**FAAMATALAGA:**

*Faamaonia.*

**FUAIUPU 2: Faamatuu atu ma le Faatatauina o le \$688,694,610 mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faamatuu atu ma le Faatatauina o le \$490,045 mai le Teugatupe a le Tausi Mavaega.**

*Faamaonia.*

**FUAIUPU 4: Faamatuu atu ma le Faatatauina o le \$20,660,838 mai le Faaputugatupe a le Matagaluega o Tupe.**

*Faamaonia.*

**FUAIUPU 1 MA LE IGOA**

**FUAIUPU 1: Igoa Puupuu ma le Amataga.**

**IGOA: FAATATAUINA O TUPE 2020/2021.**

*Faamaonia.*

*Na faagasolo le Tulafono Tau Faaofi o le Faatatauina o Tupe 2020/2021 e aunoa ma se Teuteuga.*

**TULAFONO TAU FAAOFI O LE FAATATAUINA O  
TUPE 2020/2021 – faitauga faatolu**

**FOFOGA FETALAI:** Ou te tapa lau Afioga i le Minisita o Tupe.

**Afioga Hon SILI EPA TUIOTI:** Lau Afioga i le Fofoga Fetalai, ae ou te le i faatuina le lafo le lafo. E muamua ona momoli atu le faamalo ma le faafetai i lau Afioga ia faapea le paia ma le ma mamalu i sui usufono o le Palemene. E momoli atu foi le faafetai, i Ofisa Sili o Pulega o Matagaluega ma Faalapotopotoga a le Malo, i latou sa fesoasoani i le Tala o le Tupe, ia faamalo faafetai,

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2020/2021 i lona faitauga faatolu.*

*Faaluaina e le Minisita mo Aoga, Taaloga ma Aganuu ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.*

**FOFOGA FETALAI:** Malo le galulue, aumai se pati. Malo faafetai.

*Na faaalua le fiafia o le Maota i le patipati o latou aao i le pasia ai o le Tala Faatatau o le Tupe 2020/2021.*

**FOFOGA FETALAI:** O lea ua tatou toai i siui o le tatou galuega i lenei aso. O lea tatou te le i oo i le taimi na faatu ai le lafo. O le lafo o le a lava le taimi e uma le maea ai le tatou...e pasia ai le Tala o le Tupe o le a faapena ona maea ai le tatou galuega i lenei tauafiafi. O le mea la lea, ou te tapa lau Afioga i le Palemia mo sau saunoaga.

## **LAFO MO LE TOLOPOINA**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:**

Lau Afioga i le Fofoga Fetalai, ou te tulai atu ma le agaga faaaloalo, e momoli atu le faamalo i lau Afioga faapea foi sui mamalu o le tatou Palemene, e masalo e talu ona tulai mai le Paeaiga lenei, faatoa umi lava lenei o se tatou Tauaofiaga. Ma ua tatau ai ona o le Tala Faatatau Autu o le tupe lenei, e faaiu ai le tatou Paeaiga o le Tala o le Tupe Autu. Ona toe i ai foi se tatou Tala o le Tupe Faaopoopo, e pei o le Tala o le Tupe Autu lenei, o le a faavae ai le tele o tatou galuega, ua tatau ona fai mo le tatou tapena atu ai mo le Faiga palota i le tausaga fou. E momoli atu le faamalo i lenei taimi ona ua leva ona faaaaogagase le mamalu o le Palemene. E faapea foi ona momoli le faafetai i le tapuaiga a Samoa, i tulaga faalupe aua le aiga ma a latou aiga, tama foi ma o latou aiga, faapea le usuga a Tumua ma Puleono i Salafai. Tainane foi o le faafogafoga mai o le faanonogamanu a le afaigaluega paia a le Atua, tapuai foi le Ao mamalu o le Malo, Sui Tofia faapea le lala i le Faamasinoga, le Faamasino sili ma le latou foi vasega o le faamasinoga. Faapea foi le mamalu i le afaigaluega a lo tatou Malo. O lo o i ai a tatou galuega lau Afioga i le Fofoga Fetalai, o lo o totoe pea. Tatou te agai i ai i le aso a taeao, atonu e le o toe tele foi ni galuega, ae o le a mataitu pea le faagasolo polokalame ua uma ona atofa mo le tatou Fonotaga lenei.

Ae mo lenei po, e momoli atu le faamalo. E le faigofie le tatou galulue i le ao ma le po, a o lenei lava ua tatou taunuu i le faaiuga manuia o le tatou Tala o le Tupe, o le a faagasolo ai nei a tatou galuega, aua le manuia lautele o le tatou atunuu o

lo o tapuai mai. O se faamatalaga lea, ae faatu le lafo, *Ina ia fai se tatou malologa ona toe foi ai lea i taimi masani o le tatou Fonotaga mai le 9.00 i le taeao seia oo foi i le ta o le 1.00 i le aoauli.*

*Faaluaina e le Sui Palemia.*

*Na faamaonia le lafo.*

**FOFOGA FETALAI:** E momoli atu foi le faamalo ma le agaga faafetai, i le paia i sui mamalu o le Palemene aemaise foi o le Kapeneta. O le a foi se taumafaiga a le Fofoga Fetalai, ina ia faapena, ona faatino le tulaga o le tatou galuega faamalulu atu o galuega masani lava e faapena. Ana tou oo mai foi outou i le Nofoa, o lena e molimau Laauli, e faapena ona tatou o e tulei le tatou galuega ina ia faapena ona vave ma tuu atu i o outou aao, se i tali mea o lea e finagalo i ai sui mamalu e faatino i o outou itumalo. O le mea lea, e faamalulu atu afai ua i ai se upu ua paopapa pe taugalemalie pe sopotuaoui foi, tofa ia i le fiangalo o le Atua e magalo ai. Ae tatou te le i tolopo mo le aso a taeao, o le a ou faaiuina le tatou Fonotaga i se tatalo.

*Na tolopo Galuega a le Fono Aoao Faitulafono i le itula e 10.15 i le po, seia aulia le itula e 9.00 i le taeao o le Aso Lua, 30 Iuni 2020.*